

Isoquijajeitantanajari Ishanincajeitaniri Israel Egiptoqui

ÉXODO

Oca sanquenarentsi irotaque apitetatsiri isanquenare Moieshini. Ocamantacotiri Tasorentsi yoipacaacoventantajariri ishanincajeitaniri Israel iperanajeitantavetacariri egiptosati. Impoiji yareetimojeitantarori toncaari Sinaí, aisati ipaqueri Tasorentsi Moieshi Icantacantiri. Impoiji yovetsicajeitaqueneri Pancotsi Yapatotimentantariri Tasorentsi.

Yashinoncaajeitancari ishanincajeitaniri Israel anta Egiptoqui

1 1-4 Jero oca ivajiro itomipee Jacoboni icarajeitanaqueri peerani ijabatancari Egiptoqui:
Rubén, Simeón, Leví, Judá,
Isacar, Zabulón, Benjamín,
Dan, Neftalí, Gad jeri Aser.

⁵Yora ishanincajeitaniri Jacoboni icarajeiti yapatoajeitanaca 70, irintiquea José ijabataca Egiptoqui.

⁶Ari icamaqueni José aisati irirentipeeni jeri maaroni icarajeivetanacari. ⁷Iro cantaincha itimajeitanaque oshequi catsini itomipee iriori. Ishequiasanojeitanaque, oshequi imajeitaqueri. Itsoteanaquero ora quipatsi isavicajeitapaquenta.

⁸⁻⁹Ari osamaniiteanaque iqueanaji pashini pincatsariventajeitajerine egiptosati caari ioterine José. Icantajeitiri ishanincapee: “Pamenajeite, yora ishanincapeeni Israel aiqero ijabatii yoshequiasanojeitanaque, yanaacojeitanaquee ainti ishintsitasanojeiti. ¹⁰Tsame amperanatasanojeiteari antacaayeteri paitapeerica, eiroquea itimacantayetajarotsi ijinapee yoshequiasanojeitanajicari. Arioyeata incarajeitaqueri manajeiteeneri ariorica impoque iromanajeitanaquee, irosati irijajeitantanajea, irojocantajero aipatsite.”

¹¹Irosati icoyeantajeitaca ishanincapee egiptosati antaveetacaasanojeiterine ishanincajeitaniri Israel. Ari yovetsicacaajeitaqueri pancotsipee anta apite nampitsi irashiteari yora faraón pincatsaritsiri, inquempoyeacantapinijeitanteo ri panquirentsipee yoyeetari. Opajita Pitón jero Ramsés. ¹²Ari yoashinoncaasanojeivetacari, iro cantaincha aiqhero catsini yoshequiasanojeitanaitii. Ineajeitantariri egiptosati, oshequi iquenqueshireacojeitanaqueri aisati itsaroajeitanaque.

¹³Iro cantaincha aiqhero ishintsinatapinijeitanaqueri yoashinoncaasanojeitaqueri. ¹⁴Icantanentacaacari, te irisavicajeite cameetsa. Icantani ishintsinatapinijeitaqueri ijavatsatacaapinijeitaqueri quipatsi yovetsicacaqueri adobepee, aisati yantaveetacaajeitaqueri oantsipeequi. Oshequi catsini yoashinonqueetaqueri ishanincajeitaniri Israel.

¹⁵⁻¹⁶Aisati icantaqhero pincatsari ora apite tsinane pajitachari Sifrá jero Puá, amenirori ishanincapee hebreo timajaniyetatsiri. Icantiro:

—Ariorica pamenero tsinane hebreo timajaniyetatsiri, iriorica ontimeri shirampari ocameetsati poavaqueri. Irompa iroorica timatsine tsinane, eiro poirotsi.

¹⁷Iro cantaincha te onquemisanteriji icantavetacarori; tempa oshequi opincatsatasanojaqueri Tasorentsi, irotaque caari oajeitantari. ¹⁸Irosati icajemacantantacaro pincatsari. Icantavaqhero:

—¡Paita pishinejeitantariri yaneajeitaque jananequipee!

¹⁹Ari acanajeitaqueri iroori. Ocantiri:

—Novincatsarite, ora tsinanepee oshanincapeeni Israel, te onquempjeitearopi egiptosato, intsipaite otimajanitita irointi tequerata narori nareeteaji namenanteorori.

²⁰⁻²¹Aitaque icantacari yora ishanincajeitaniri Israel yoshequiasanojeitantanacari catsini. Aisati aiqhero cantsini ishintsitasanotanaitii. Tempa ora amenantatsiri opincatsataqueri Tasorentsi, irotaque icavintsantacarori, yoshequiacasanojeitantanacaron i oshanincapee.

²²Iro cantaincha yora pincatsari icantaqueri maaroni ishanincapee: “Poviincajeiteri nijaqui maaroni itomipee ishanincapeeni Israel iroaquera timayetatsi. Irointiquea tsinanejaniqui, eiro poviincajeitirotsi.”

Itimantacari Moiseshi

2 ¹Itimi aparo ishanincataniri Leví yaaqhero ishanincasanori iriori. ²Ari otsomontetanaque, irosati otimantacari itomi. Oneaqueri icameetsajaniquitaque, irotaque omanantavetacariri icarataque mava cashiri. ³Iro cantaincha oneaqueri aiqhero ijatatii iquimotanaque, tecatsi oncantajea omanasanotajeri. Irosati ojatantaca otsapijaqui nija, aayetaiti

shiocayetatsiri icanteetiri junco. Ari ovetsicaquero tsivoo oshiacantaquero pitotsijaniqui. Impoiji otsineyetaquero maaroni omorojaniquipeequi eiroquea oqueajatantatsi nija. Irosati otetantacari otomijaniqui, ashitacotaqueri. Ari oimajatacotaitiri otsapijaqui Nilo otimayetaquenta joncopee. ⁴Ari ocantiro ishinto: “Noshinto, pincatiye ara nijanteaji, pamenacoventeri pijaririjaniqui jaocayeata incanteeteri.”

⁵Impoiji opoquaque irishinto pincatsari nijaqui oncaate, otsipajeitacaro onampirepee. Ari oshiteajatacaayetapaacaro oneatiiro tsivoojaniqui amajaataque otitacaro joncopee. Ari ocantiro: “Pijate paitero.” ⁶Irosati ojatantaca, ari amapaaquenero. Irosati ashitareantavacaro, oneatiiri jananequi iraitacha. Ari intacoshireacari ocavintsaqueri, ocanti:

—Yoca jananequi, irinti itomi hebreo.

⁷Ainero iroori iritsiro otsititaca nijanteaji, amenacoventaqueri. Oneacoventantacariri aaqueri irishinto pincatsari, irosati ojatashitantacaro osampitapaquero:

—¿Picoimpa namenaitempi noshaninca antsotayempirine yoca?

⁸⁻⁹Ari acanaquero:

—Je, pijatequeti.

Irosati ojatantanaca apatiro oashitanaquero iniro. Oquemantavacarori, irosati opocantaca. Oneantavacarori irishinto pincatsari, ocantavaquero:

—Paanaquenari yoca jananequi anta pivancoqui, pamenenari. Arinea nompinataquempi.

Irosati aantanaajari irinero amenajiri. ¹⁰Impoiji iquimotanaque, irosati opantajaro. Ora irishinto pincatsari oquempetacantaqueri irio ashi otomisanori. Ocanti: “Iriotaque yoca naaqueri nijaqui.” Irosati opajitantacari Moiseshi.

Ishiantacari Moiseshi

¹¹Ari yantearitasanotanaque Moiseshi. Aparo quitaiteri ijataque iquivantiri ishanincapee anta quipatsiqui Gosen. Ineapaatiri ishanincapee yantaveetacaasanoyetaqueri. Aisati ineacotatiiri aparato egiptosati ipasanatiri ishaninca. ¹²Ari intsipaite yamenayevetanaca anta, iro cantaincha tecatsi irineaque, irosati yaantapaacari irinti, yoaqueri. Ari itijanaqueri impanequiqui. ¹³Ari pashiniqui quitaiteri ipianaja aisati ineapaatiri apite ishaninca yantavacaaca. Ari icantavetapaacari yora pasanataqueriri itsipa:

—¿Paita pipasanatantacariri? Tempa iriotaque pishaninca.

¹⁴Iro cantaincha icantanaqueri:

—¡Jaoca pijitari avirori! ¡Avirompa cantacoventantatsiri picantantapaanari! ¿Picoaquempa poyena narori, piquempetaqueri egiptosati poaqueri oshaiteji?

Iquemantacarori icantaqueriri, irosati itsaroasanotantanaca. Iotanaque iotacoyetaqueri yoaqueri egiptosati. ¹⁵Ari iquemacotaqueri pincatsari

Moisheshi, irosati itiancantayevetaca amenayetajerine iroantajeariri iriori. Iro cantaincha te irineajeriji, shianaca ini. Ijataque anta quipatsiqui Madián, isaviquimotapaaquero quempeji quianarentsi.

¹⁶Anta quipatsiqui Madián aitaque isaviquiri atiri pajitachari Reuel, antaveetiniriri Tasorentsi. Otimi irishintopee ocarati 7. Ari opocajeivetapaaca quianarentsiqui ojayetajenerime irantapiniyetariqui irovishatepee iri. ¹⁷Iro cantaincha ipocayetapaaque pashinipee ashiyetachari irovishate, itiancajeitapaaquero. Ainiro iriori Moisheshi isavicaque ara, ineacoventaquero. Irosati icatiantanaca irinti ipiacoventacaró. Impoiji iquitaataque nija irirajeiteri ovishapee. ¹⁸Irosati opiajeitantanaja iriqui. Ineantavajarori, icantajeitavajiro:

—¿Paitaquea meeca pipiitantajari? ¿Picatimaitacampa pijaayetaitiniri nija ovishapee?

¹⁹Ari acajeitanaqueri iroori:

—Nareejeivetantapaacarori quianarentsi, ipocajeitapaaque pashini ashiyetachari irovishatepee, itiancajeivetapaaquena. Iro cantaincha noneapaaqueri aparo shirampari egiptosati isavicaite ara. Iriotaque piacoventavaquenari. Impoiji iquitaataque nija ijaayetaqueneri ovishapee irajeitaqueri.

²⁰Iquemantacarori irishinto, irosati isampitantanacaró. Icantiro:

—¿Jaoaquea meeca iriori? ¡Paitaquea caari pamantacari! Pijate meeca pimpianaque, pincantaiteiri impoqueta aca iroapempata.

²¹Aitaque ocantari onimotaqueri Moisheshi irisavicapee ivancoqui Reuel. Impoiji ipacantacari irishinto pajitachari Séfora ijinantacaró.

²²Irosati itimacantacaró itomi, icanti: “Caari nonampisanori oca quipatsi. Tempa naro pashinisati atiri. Irotaque meeca nompajitanteiriri yoca notomi Guersón.”

Icamaque pincatsaritatsiniri Egiptoqui

²³Ari avisayetanaque oshequi osarentsipee, irosati icamantaca pincatsariveitachaniri anta Egiptoqui. Iro cantaincha yora ishanincajeitaniri Israel, irosati icanta icavintsaapinijeitaca, oashiretacaacari iperاناتapiniyeetacari. Iro cantaincha iquemaqueri Tasorentsi iraatsatapinijeitaca aisati icavintsaapinijeitaca.

²⁴Iquenqueshiretaji ro icantasanotaqueriri peerani Abrahamani, Isaacani jeri Jacoboni: “Noncaratanojeitempi.” ²⁵Ineaqueri Tasorentsi ishanincajeitaniri Israel, ari iquenqueshiretaquero avishimojeitaqueriri.

Yonijaacari Tasorentsi Moisheshi

3 ¹Yora Moisheshi icantani yamenaqueneri irovishatepee iriconquiri Jetró, antaveetiniriri Tasorentsi quipatsiqui Madián. Aparó quitaiteri yaajeitanaqueri anta caaraiteriqui iroacaajeiteari paashito, irosati

yareetantacaro toncaari inashitacaari Tasorentsi pajitachari Horeb. ²Ari yonijaacari Inampire Tasorentsi paamariqui amorecaque quitotseequishi. Ineantacarori, ari yamenasanotanaquero, ineaquero amorecasanotaque, iro cantaincha te ontsonquimateaji. ³Ari iquenqueshireanaca: “¡Paita ojitari morecaintsiri, te noneapiniteroji! Nojate namenaiterota paitampa caari otsoncantaro ontayero quitotseequi.”

⁴Ari ijatanaque. Irovetaicha inquempejitapemparome, iquematiiri Tasorentsi amorecasanotaque quitotseequi. Icajemaqueri ivajiroqui:

—¡Moiseshi! ¡Moiseshi!

Ari yacanaqueri:

—Jaa, ¿paitani?

⁵Irosati icantantacari:

—Eiro piquempejitanatsi. Pisapatorempa, tempa oca quipatsi irotaque nonashitacaari, ocameetsatasanotaque.

⁶Icantiri aisati:

—Narotaque Tasorentsi, iquemisantajeitaqueri intacantajeitaquempiniri, yora Abrahamani, Isaacani jeri Jacoboni.

Iquemantacariri Moiseshi Tasorentsi, oshequi itsaroasanotanaque catsini. Irosati ipashivorotantanaca, eiro yamenantaritsi. ⁷Iro cantaincha aiqero icantasanotanaitiiri:

—Noneasanotaqueri noshanincepee yashinoncaapinijeitaca anta Egiptoqui. Aisati noquemapinijeitaqueri icavintsaapinijeita yoashinoncaapinitiri yora antaveetacaapinijeitiriri. ⁸Irotaque meeca naniireantapaacari noavisacotantajariri iperanajeitacari egiptosati. Impoiji naajeitanajeri anta otiminta antearoite quipatsi cameetsaiteri. Oshiocasanoyetapai maaroni panquiveerentsiyetatsiri, eiro ocoiteimojeitajaritsi paitapeerica. Irotaque quipatsi isavicantajeitari cananeopee, ititapee, amorropee, ferezeopee, heveopee jeri jebuseopee. ⁹Queario, noquemapinijeitaqueri ishanincepeeni Israel icavintsaapinijeita aisati noneasanojeitaqueri yora egiptosati, yoashinoncaasanojeitaqueri catsini. ¹⁰Meeca pijate Egiptoqui, nontianquempi anta pincatsariqui poimishitoajeitantajariri noshanincepee, yora ishanincajeitaniri Israel.

¹¹Iquemantacarori Moiseshi icantaqueriri Tasorentsi, irosati icantantanacari: —Tecatsi nojitea narori nojatashitanteari pincatsari Egiptoqui, naajeitantajariri noshanincepee.

¹²Ari icantanajiri iriori:

—Quiso noanaquempi. Jerocha piotasanotanteari narotaque tiancaquempiri, ariorica pamajeitajeri noshanincepee aca toncaariqui, aitaque pimpincatsajeitapaajenari.

¹³Ari icantanajiri aisati Moiseshi:

—Jaaquea ariorica nojatashivetaqueari noncantajeivetapemparirica: ‘Itiancana Tasorentsi, yora iquemisantiri intacantajeitaqueerini.’

Ariorica irisampijeitavaquena iriori: ‘¿Jaoca ijitari Tasorentsi?’ ¿Jaoca noncantanaqueriri narori?

¹⁴Ari yacanaqueri iriori:

—Narotaque Tasorentsisanori Timitachari. Pincantajeiteri: ‘Itiancana Tasorentsisanori yora Timitachari.’ ¹⁵Aisati pincerter: ‘Triotaque iquemisantiri intacantajeitapeerini: yora Abrahamani, Isaacani jeri Jacoboni.’ Oca novajiro ocantaitatiani otimi. Aitaque nopajitasanotari noncantaitiyempani, irotaque inquenqueshirea cotapiniyeetanenari. ¹⁶Ariorica pareetapempa, pampatoyetapeeri jivatacaajeitiriri pishanincapee, pincantajeitapeeri: ‘Yonijaaquena Tasorentsisanori anta toncaariqui, iriotaque iquemisantajeitapeerini: Abrahamani, Isaacani jeri Jacoboni. Icantaque: Noneajeitapeerini pishanincapee, oshequi yoashinoncaapinijeitapeerini egiptosatipee.’ ¹⁷Icantaque aisati: ‘Nocoaque noipacaacoventajeitajeri yoashinonqueetaqueri Egiptoqui, naajeitanajeri anta iipatsitequi cananeopee aisati hititapee, amorroopee, ferezeopee, heveopee jeri jebuseopee. Ora quipatsi oshequi oshiocantayetaro maaroni panquiveerentsiyetatsiri, eiro ocoiteimojeitajimpitsi paitapeerica.’

¹⁸Yora jivatacaajeitiriri pishanincapee ariorica pincantajeitapeeri, aitaque inquemisantajeitavaquempi. Irosati irojajeitantanauquempi anta itiminta pincatsari, pincantantapempariri: ‘Tasorentsi, yora pincatsariventajeiteri ishanincapeeni Israel, yonijaaquena. Icantaque nojajeitaje anta caariteriqui nompincatsajeitapaajeri, nontaajeitapeeneri Notasorentsite novirapee. Irotaque ocameetsatantari pishinejeitajena nojajeitaje oncarate mava quitaiteri nanijeitanaje.’ ¹⁹Iro cantaincha yora pincatsari notasanotaqueri, eiro ishinejeitimpitsi pimpocajeitantajeri, eirorica pishintsinatapinitiritsi. ²⁰Naroquea nijayeterine notasorenca, noamaajeiteri egiptosati, iroajeitanaquero cavaco maaroni caari ineapinijeiti. Irosatiquea irishinejeitantanajempi pojocajeitantanajearori iipatsite. ²¹Aisati noncantacaashireacaajeiteari egiptosatipee, irineacameetsajeitantempiri, impayetantavaquempiri paitapeerica timimoyetiriri, eiroquea pijatashijeitantanajatsi. ²²Aparopeeni tsinane oncoacoyetanaquero otsipanampiyetari, ompantayetavaquearori ashiyetari vetsicayetachari plata, oro jero quitsaarentsi cameetsamaotasanoyetatsiri. Irotaque pinquitsaajeitanaqueriri pitomipee jero pishintopee. Aitaque oncanteari pintsonquitajeitanaqueri maaroni timimoyevetariniri egiptosatipee.

4 ¹Ari icantanajiri Moiseshi Tasorentsi:

—Eiro iquemisantajeitavaquenatsi noncamantajeivetapaaqueari, aisati eiro ishirejeitavacarotsi; irointi incantajeitavaquena: ‘Pitseeaya, te ironijayempiji Tasorentsi.’

²Ari isampitiri iriori:

—¿Jaoca ojitari pajiricaquerira?

Ari yacanaqueri Moiseshi:

—Irointi ninchaquiire.

³Irosati icantantacari Tasorentsi:

—Jentsite, pojoquero quipatsiqui.

Ari yojocaquero. Ineatiro opeanaca maranque. Ineantacariri, icoaveta irishiapitsatanaquerime.

⁴Iro cantaincha icantavaqueri Tasorentsi:

—Pajiricajeri irointi irishiqui.

Irosati yajiricantajari irishiqui, ineajatiro peanaja aisati irinchaquiire.

⁵Irosati icantantajari:

—Pineaquero meeca, irotaque irishirejeitantavaquearori pishanincepee ora pincantapeeriri: ‘Yonijaaquena Tasorentsisanori, yora Tasorentsi iquemisantajeitaqueri intacantajeitananiri: Abrahamani, Isaacani jeri Jacoboni.’

⁶Ari icantajiri aisati:

—Meeca pisatevacotea pinejiqui.

Irosati isatevacotantanaca. Isatevacoreantajari, ineatia quitamaropaconi quempetanaca sharaca.

⁷Irosati icantantajari Tasorentsi:

—Pisatevacotajea aisati.

Ari isatevacotanaja. Impoiiji isatevacoreaja, ineajatia te aneajeroji. Peanaja oni, quempetanaja tecatsi oyerine.

⁸Ari icantanajiri:

—Ariorica ponijaavetaqueari ora nojivataquempiri, eirorica ishirejeitavacarotsi aisati eirorica iquemisantavaquempitsi, impoiijiquea ponijayeri pashini irotaque inquemisantantempiri. ⁹Irompa eirorica shirejeitimpitsi aisati eirorica iquemisantimpitsi, ariorica ponijaavetaqueari oca apitetatsiri, irosati paacojatantaitea nija Nilo pisacotapeero quipatsiqui. Osacotanaquearica quipatsiqui, irosati ompeantanaquea irajantsi.

¹⁰Irosati icantantanajari Moiseshi Tasorentsi:

—Notasorentsite, eirove nomatirotsi. Oshequi opomerentsitimotana noneaveete cameetsa. Aitaque nocanta, irosati meeca nancasanotimaitempiri avirori, irointita notinotitaro noneaveeti.

¹¹Ari yacanaqueri icantiri:

—¡Paitampa vetsicaqueneriri ivaante atiripee ineaveetantari!

Tempa narotaque mayetirori. Noncoaquerica, nomasontitacayeri eiro ineaveetantanajatsi, aisati nomayempitacayeri eiro iquemantanajatsi, aisati nomaviteajatacayeri eiro yamenantanajatsi. Tempa narotaque amenacaajeitiriri yamenajeitantari. ¹²Pijatequeti meeca. Noncanteani quiso noyempi. Narotaque neaveetacayempine cameetsa, pineaveetanteari paitapeerica pincanteri.

¹³Ari icantanajiri aisati Moisesi:

—Notasorensite, te noncoyero. Pintianque pashini atiri.

¹⁴Irosati iquisantacari Tasorensi Moisesi, icantiri:

—¡Timatsi pirenti Aarón ishanincani Leví, iotasannotirori irinti cameetsa ineanati! Aitaque meeca aca intonquiotavajempiri.

Ariorica irineajeitavajempi oshequi inquimoshireventasanotapempi.

¹⁵Pinquenquetsatacaavaqueri. Plotacayeri maaroni incanteri.

Narotaque tsipatearine aisati avirori ariorica pineanajeite. Aisati

niotacayempiro paitarica pantayeteri. ¹⁶Aviro canterine pirenti,

pinquempetacantea naro neanataqueriri. Irioquea oavaquenerine

pishanincepee paitarica pincanteriri. ¹⁷Paanaquero oca pinchaquiere,

irotaque nomatacayetantempirori caari ineapinijeiti pishanincepee,

iroajeitanaquempiri cavaco.

Ijantanjari Moisesi Egiptoqui

¹⁸Ari ipianaja Moisesi ivancoqui iriconquiri Jetró, icantajiri:

—Coqui, ocameetsati nompianaje Egiptoqui isavicajeitinta noshanincasanori. Nocoli namenajateri savicajeitatsirica.

Ari icantanaqueri:

—Pijatequeti, cameetsayea pijate.

¹⁹Ainiroquera isaviqui Moisesi anta quipatsiqui Madián, ari icantajiri Tasorensi:

—Ocameetsati pimpianaje Egiptoqui. Te aneajeriji maaroni coavetachari iroyempime, camaque.

²⁰Ari yovetsicaarantayetaca, yovetsicaqueri iriori iraashinote inquijacotanaqueari itomi jero ijina. Aisati yaaquero irinchaquiere icantaqueriri Tasorensi. ²¹Ari icantajiri Tasorensi.

—Ariorica paretapaaquea anta Egiptoqui, ponijaapeeriyea pincatsari ora nomatacaaquempiri, irineantearori caari ineapinijeiti.

Naroquea cantacaashireacayemparine inquisoshiretantanaqueari,

eiro ishinetantajaritsi irisotoajeitaje pishanincepee. ²²Irosati

pincantanaqueari, ‘Icanti Tasorensi: Yora ishanincepeeni Israel

noquempetacantasanojeitaqueri irio notomi jivatatsiri itimi; tempa

iriojeitaque noshanincatacari. ²³Noncantempi, pishinejeitajeri

irijajeitajeta anta toncaariqui caaraiteriqui impincatsajeitantapaajenari.

Irompa eirorica pishinejeitajiritsi, irosati noamantaqueari pitomi, yora

jivatatsiri itimi.’

²⁴Irosati ijajeitantaca. Ari nianqui avotsiqui irimaajeitanajenta,

irosati inijantavajari aisati Tasorensi, icoaveta iroavaquerime. (Tempa

te irimoncarateroji icantitacariri peerani Tasorensi: “Pintoyeantajeitea

maaroni shiramparipee.”) ²⁵⁻²⁶Oneacoventantacariri ijina, oshequi

otsaroanaque. Irosati aantana mapi tsaampitatsiri ototitaqueri otomi

omeshina ishiramparitantari. Impoiji opantaqueri ojime iitiqui, ocantiri: “Queario, aviro nojimesanori irajatacantatsiri.” Irotaque ocantantacariri ojime, tempa otoyeantaqueri otomi. Irosati ishinetantajari Tasorentsi Moiseshi irijajeite.

Ineantajariri Moiseshi irirenti

²⁷Yora Aarón ainiro quipatsiqui Gosen. Ari iquemaqueri Tasorentsi icantaqueri: “Coraquetaji pirenti Moiseshi. Pijate meeca anta caaraiteriqui, aitaque pintonquiotavajeariri.” Ari ijatanaca Aarón anta toncaariqui pajitachari Horeb, ora inashitacaari Tasorentsi. Aitaque itonquiotavajeariri. Oshequi iquimoshiretasanotapaaque ineantavacariri. Ivetsatapaacari, inintavorotapaaqueri. ²⁸Ari icamantayetaqueri maaroni icantayetaqueriri Tasorentsi aisati irimatacayeriri caari ineapiniyeti ironijanteariri pincatsari. ²⁹⁻³⁰Irosati yoiijajeitantanajari. Yareejeitantapaajari quipatsiqui Gosen, yapatojeitapaaqueri Aarón maaroni jivatacaajeitiriri ishanincepee. Icamantayetaqueri maaroni icantayetaqueriri Tasorentsi Moiseshi. Irioquea Moiseshi nijayetapaaqueriri caari ineapinijeiti, ora ironijayeriri pincatsari.

³¹Ineajeitantacarori, irosati ishirejeitantavacaro. Iojeitanaque queario iriotaque Tasorentsi tiancaqueriri, aisati iotanaque queario ineajeitaqueri yoashinoncaapiniyeetaqueri. Aisati iotanaque queario icavintsaajeitaqueri. Irosati yovotashijeitanacari ipincatsanaqueri Tasorentsi.

Ijatashitaqueri Moiseshi jeri Aarón, pincatsari

5 ¹Irosati ijatashitantacari Moiseshi jeri Aarón pincatsari, icantapaaqueri:

—Aitaque icantiri Tasorentsisanori, yora iquemisantajeitiri ishanincepeeni Israel: ‘Pishinejeitajeri noshanincatacari irijajeitajeta anta caaraiteriqui irimpatotimentajeitena, inquimoshireventajeitena impincatsajeitantapaajenari.’

²Iro cantaincha icantanaqueri pincatsari:

—¡Jaoca ijitari Tasorentsi nonquemisantanteariri noshinejeitantajeariri pishanincepee! Te nioteriji yora picantaqueri, eiro meeca noshinejeitiritsi.

³Aiquero icantanaqueriri Moiseshi jero Aarón:

—Yora Tasorentsi iquemisantajeitiri noshanincepee, queario yonijaaquena. Icoacaquena nojajeitaje anta caaraiteriqui naniijeitanaque mava quitaiteri. Nareetantearori, nontaantapempanariri Novincatsarite Tasorentsi virantsi. Eirorica noquemisantajeitiritsi, aitaque intiancajeitaquenaro caamanentsi, teerica, oayeritantsi.

⁴Iro cantaincha yora pincatsari ishintsitsatanaqueri, icantiri:

—¡Jaoca pijijeitacari avirori! ¡Paitaquea pojocacaajeitanteariri atiripee irantaveere! ¡Pimpiajeitanajatiyeri, meeca pantaveerequi avirori!

⁵Pamene, oshequi catsini inajeitaque, jiro cantaincha meeca avirori picoaque pojocacaajeiteri yantaveeti!

⁶Ari icantiri iriori pincatsari ishanincapee antaveetacantajeitatsiri jeri jivatacaajeitiriri ishanincapeeni Israel:

⁷—Aitapaaji meeca pamacantayetaqueneri ishanincapeeni Israel casaveshipee. Eiro piquempetacantajirotsi pipacantapinijeitirini yovetsicantayetarori adobepee. ¡Irisati aanontajantachane!

⁸Irointiquea pishintsinajeiteri irimoncaratapinijeitantearori ocarati yovetsicapinijeitiri, eiroquea ocoiteantapaatsi aparoni. Tempa iriojeitaque peranti, irotaque icantajeitantarari: ‘¡Tsame ajajeite anta caaraiteriqui antaajeitantapempanariri Atasorents site virantsi!’ ⁹Meeca pantaveetacaasanojeiteri catsini. Eiro pishinejeitiritsi irimaoreajeite, eiroquea iquemisantantaritsi Moisheshi jeri Aarón; tempa itsee yashita.

Opomerentsitimotasanotanacari ishanincajeitaniri Israel

¹⁰Irosati ijajeitantanaca antaveetacaajeitiriri incamantajeitantariri. Ari icantapaaqueri:

—Icantaquena pincatsari: ‘Eiroyea meeca nopacantapinijeitajimpitsi casaveshipee. ¹¹Meeca avisati aanontajantachane povetsicajeitantajejarori adobepee, aisati pinquempetajero pimoncaratajero ocarati povetsicapinijeitiri.’

¹²Iquemantavacariri ishanincapeeni Israel, irosati iquenantayetanaca iramenajeite casaveshipee, ipesaarantayetiri aapiniveitanariniri. ¹³Yora egiptosati antaveetacantatsiri, icantani maaroni quitaiteripeequi ishintsinatapinijeitaqueri jivatacaajeitiriri ishanincapeeni Israel. Icoacaasanovetacari irimoncaratacayerime iquempetapinitirini ainiroquerani ipacantapinijeitirini casaveshipee. ¹⁴Iro cantaincha te irimatacaajeitajeri irimoncaratajero, irosati ipasanatapinijeitantanacari. Icantajeitiri:

—¡Paitaquea caari pimoncaratacantajeitajeri pishanincapee povetsicacaajeitajeri piquempetacaapiniveitarini oshequi povetsicacairini! ¡Te meeca pimoncaratacaajeitajeriji pintacaro oshaiteji, irosati meeca!

¹⁵Ineantacari ipasanatapinijeitaqueri, irosati yora jivatacaajeitiriri ijatashitantajeitanacari pincatsari yora icanteetiri faraón, incamantacotanteariri antaveetacaapinijeitiriri. Icantajeitapaaqueri:

—Novincatsarite, ¡Paita poashinoncacantajeitantaquenari! ¹⁶Te impacantapinijeitajenaji casaveshipee. Irointi ishintsinatapinitashije itaquena. Icantapinijeitana: ‘¡Pishints site, povetsicajeitero adobepee!’ Aisati ipasanatapinitashijeitaquena. ¡Irio cantacaashitacarori yora pishanincapee antaveetacaapinijeitanari!

¹⁷Ari iquisatsajeitavaqueri, icantajeitavaqueri:

—¡Avinti peranti! Irotaque piquenayetantacari picantashinirojeitaca: ‘Tsame ajajeite caaraiteriqui antaantapempanariri Tasorents

virantsi.’¹⁸ ¡Pimpiajeitanaje, pantaveejeitapaaje! Omaveteata eirorica ipacantajeitajimpitsi casaveshipee. Iro cantaincha ontimatiye pimoncarajeitero ocarati povetsicapinijeitiri.

¹⁹Iquemantajeitacarori oca icantaqueriri, oshequi ocantimonentasanotanacari catsini. ²⁰Isoquijajeitantanajari ineajeitapaajiri Moiseshi jeri Aarón, yoyeajeitiri. ²¹Ari icantajeitapairi: —Avirotaque cantacantajeitaquenari, irotaque iquisasanojeitanaquenari pincatsari aisati antaveetacantajeitatsiri. Avirojei coatsiri iroajeitena. Irio Tasorentsi oasanquetaajeitempine.

Iquenquetsatacaqueri Moiseshi Tasorentsi

²²⁻²³Irosati iquenquetsatacantacari Moiseshi Tasorentsi, icantiri:

—Notasorentsite, ¿paitaquea pishinecoventantacariri yoashinoncaapinijeiyetaqueri pishanincepee? ¿Irompa meeca pitiancantamempeaqueenari aca? Nocamantavetapaacari pincatsari ora picantaquenari. Iro cantaincha aiqero yoashinoncaasanotanaqueriri, te poipacaacoventimateriji.

6 ¹Ari icantanaqueri iriori:

—Aitaque pineaqueri jaoca noncanteriri pincatsari. Eiro ishinetashitimpitsi pijajeitaje, icoatii nonijayeteri notasorenca. Ariorica irineayetavaquero, irosati incantajeitantajempi: ‘¡Pijajeitaje, pojocajeitanajero noipatsite!’

²Icantiri aisati:

—Narotaque Tasorentsisanori. ³Nonijaacari Abrahamani, Isaacani jeri Jacoboni aisati nocamantaqueri novajiro Tasorentsi, mayetirori maaroni. Iro cantaincha te noncamantasanoterini novajirosanori: Tasorentsi Timitachari. ⁴Nocantasanotaque noncarajeiteri, aisati nocashiacaqueri nompeeri quipatsi Canaán. Tempa aitaque isavicajeivetapaacaniri iquempevetantacariri pashinisati atiri. ⁵Meeca noneaqueri pishanincepee icavintaapinijeitaca, yoashinoncaapinijeitaqueri egiptosati, icantani yantaveetacaapinijeitaqueri; nonquenqueshiretanajero nocantasanotaqueriri noncanteani noncarajeiteri. ⁶Irotaque nocantantimpiri, pijate pincantajeitapeeri pishanincepee: ‘Narotaque, Tasorentsisanori, oipacaacoventajeitajempineri, eiro yantaveetacantanajimpitsi egiptosati. Nonijaajeiteri notasorenca aisati noavisaacojeitantajempiri, nontianqueneri covencatatsiri noashinoncaimentajeitajeri yantimotaquenari caari cameetsatatsi. ⁷Noquempetacantempi noshanincasanoripee aisati narotaque Pintasorentsiteteari oipacaacoventajeitajempine, eiro yoashinoncaajeitantanajimpitsi egiptosati. ⁸Irosati naajeitantanajempi anta quipatsiqui nocantasanotitacariri Abrahamani, Isaacani jeri Jacoboni, irotaque nompajeitempiri pashitasanojeitajeari. Narotaque Tasorentsisanori.’

⁹Ari yovaaajeitajiniri Moiseshi ishanincepee. Iro cantaincha te inquemisantajeitavajeriji; tempa oshequi ocantimonentasanotanacari

yoashinoncaapiniyeetaqueri. ¹⁰⁻¹¹Impoiiji icantajiri aisati Tasorentsi Moiseshi:

—Nocoi meeca pijatashitajeri aisati pincatsari, pincantapaajeri: ‘Nocoi pishinetajena naajeitanajeri noshanincepee, nojajeitaje.’

¹²Ari icantanaqueri iriori:

—Te inquemisantenaji noshanincepee; jaoca incanteari pincatsari inquemisantantenari iriori. Tempa oshequi opomerentsitimotana noneaveete cameetsa.

¹³Ari icantasanotiri Tasorentsi Moiseshi jeri Aarón:

—Pincerteri pishanincepee jeri yora faraón pincasaritatsiri Egiptoqui: ‘Iriotaque Tasorentsi coacaasanotanari nomishitoajeitajeri noshanincepee.’

Jero ivajiro ishanincepeeni Aarón jeri Moiseshi

¹⁴Yora itomi Jacoboni pajitachaniri Rubén, jivatatsiri itimi. Itimayetanaque itomipee iriori. Ipajiyetanaqueri Hanoc, Falú, Hesrón jeri Carmí. Iriojeitaque ishanincasanori Rubén.

¹⁵Ari itimayetanaque itomipeeni iriori Simeón. Ipajiyetanaqueri: Jemuel, Jamín, Óhad, Jaquín, Sóhar jeri Saúl, (Iriotaque otomi canaasato). Yoca iriojeitaque ishanincasanoripeeni Simeón.

¹⁶Yora Leví ocaratapaaque 137 irosarentsite. Itimayetantanacari itomipee iriori. Ipajiyetanaqueri Guersón, Quehat jeri Merari. ¹⁷Ari itimayetanaque itomi iriori Guersón. Ipajitaqueri Libní jeri Simí. ¹⁸Yora Quehat ocaratanaque 133 irosarentsite iriori. Itimayetantanacari itomipee. Ipajiyetaqueri Amram, Ishar, Hebrón jeri Uziel. ¹⁹Ari itimayetanaque itomi iriori Merari. Ipajitaqueri Mahlí jeri Musí. Iriojeitaque ishanincasanoripeeni Leví.

²⁰Yora Amram ijinantajaro irairo pajitachari Jocabed, iritsiro iriri. Ari ocaratanaque 137 irosarentsite itimacantacarori itomi. Ipajitaqueri Aarón jeri Moiseshi.

²¹Ari itimayetanaque itomipee iriori Ishar. Ipajiyetaqueri Coré, Néfég jeri Zicrí.

²²Ari itimayetanaque itomipee iriori Uziel. Ipajiyetaqueri Misael, Elsafán jeri Sitrí.

²³Ari yaaque ijina Aarón, opajita Elisabet, ora irishinto Aminadab. Irotaque iritsiro Nahasón. Ari itimacaaquero itomipee. Ipajiyetaqueri Nadab, Abiú, Eleazar jeri Itamar.

²⁴Ari itimayetanaque itomipee iriori Coré. Ipajiyetaqueri Asir, Elcaná jeri Abiasaf. Iriojeitaque ishanincasanoripeeni Coré.

²⁵Yora Eleazar, itomi Aarón, yaaquero irishinto Futiel. Ari itimacaaquero itomi ipajitaqueri Finees. Iriojeitaque jivatacaayetiriri ishanincasanoripeeni iriori Leví.

26-27 Yora Aarón jeri Moiseshi, iriojeitaque icantaqueri Tasorentsi: “Pomishitoajeitajanteri pishanincapée Egiptoqui.” Aisati iriotaque jatashitaqueriri pincatsaritatsiri Egiptoqui.

Iquenquetsatacotajiro icantaqueriri Tasorentsi Moiseshi jeri Aarón

28-29 Chapinqui iquenquetsatacantacariri Tasorentsi Moiseshi anta Egiptoqui, icantasanotaqueri:

—Narotaque Tasorentsisanori. Pincamanteri yora ivincatsarite egiptosati maaroni nocantaquempiri.

³⁰ Icantanaqueri iriori:

—Notasorentsite, oshequi opomerentsitimotana noneaveetanteari. ¿Jaoca incantea inquemisantantenari pincatsari?

7 ¹ Ari icantanajiri Tasorentsi Moiseshi:

—Pamene, nocoacaquempi pinquempetacantea narorica anta pincatsariqui. Irioquea pirenti quempetempine pineanate.

² Pincamanteri maaroni noncantempiri. Impoiiji iriori incanteri pincatsari irishinejeitantajeariri pishanincapée irijajeitaje ipatsitequi. ³ Iro cantaincha noncantacaashireacayempari inquisoshiretantanaqueari.

Aisati nonijaajeiteri egiptosati oshequi caari ineapinijeiti, iroajeitanaquero cavaco nomayeteri. ⁴ Yora pincatsari eiro

iquemisantavaquempitsi. Iro cantaincha nonijaasanoteri notasorenca Egiptoqui. Noasanquetaasanojeiteri, irosati noimisoquijajeitantajeariri ishanincapée Israel, tempa iriojeitaque noshanincapée ⁵ Ariorica irineajeitaquero ora nonijaajeiteriri aisati ariorica paajeitanajeri pishanincapée, impoiiji iriojeitanaque narotaque Tasorentsisanori.

⁶ Yora Moiseshi jeri Aarón imoncarataquero maaroni icantaqueriri Tasorentsi. ⁷ Yora Moiseshi ocarataque ⁸⁰ irosarentsite, irioquea Aarón ocaratanaque ⁸³ irosarentsite, iquenquetsatacantacariri pincatsari.

Opeaca irinchaquiire Aarón maranque

⁸⁻⁹ Ari icantajiri aisati Tasorentsi Moiseshi jeri Aarón:

—Ariorica incantavaquempi pincatsari: ‘Jentsite, ponijayenaro caari noneapiniti, queariorica itiancaquempi Tasorentsi’, irosati pincantantaqueari Aarón irojoquimoteri irinchaquiire quipatsiqui, irineavaquerota ompeanaquea maranque.

¹⁰ Irosati ijatashitantajari ineajeitapaaqueri icarajeitiri amitacoyetiriri. Ari yojoquimotaqueri Aarón irinchaquiire quipatsiqui, irosati opeantanaca maranque. Imoncarataquero icantaqueriri Tasorentsi.

¹¹ Irosati icajemacantajeitantanacari pincatsari iotincaripee jeri sheripiaripee iotashiyetarori paitapeerica. Aisati iquempejeivetapaacaro iriori. ¹² Aparopeeni yojocajeitapaaquero irinchaquiire quipatsiqui, opeajeitanaca iroori maranque. Iro cantaincha yora irashi Aarón

iniitajeitavaqueri irashipee iriori. ¹³Ineajeivetacaro pincatsari oca yonijaaqueriri. Iro cantaincha aiquero iquisoshiretanaqueri, te inquemisanteriji Moiseshi jeri Aarón. Moncarataca icantaqueriri Tasorentsi: “Eiro iquemisantimpitsi.” Irotaque yonijaaqueriri, irosati ipiantanaja.

Intarori oashinoncantsi: opeaca nija irajantsi

¹⁴Impoiiji icantajiri Tasorentsi aisati:

—Pineaqueri meeca pincatsari, aiquero iquisoshiretanaqueri. Te incoyeji irishinetajempi paajeitantanajeariri pishanincepee. ¹⁵Iro cantaincha pijatamane capichaji quitaite nijaqui, aitaque poyeamaneriri pincatsari. Paanaqueroyea pinchaquiire peaintachari maranque. ¹⁶Ariorica pineavaqueri impocaque, pincantavaqueri: ‘Tiancana Tasorentsi, yora iquemisantajeitiri noshanincepee, icanti: Pishinejeitajeri noshanincepee irijajeitajeta caaraiteriqui impincatsajeitantapaajenari. Iro cantaincha te pinquemisantenaji. ¹⁷Irotaque icantantacari Tasorentsi: Meeca piotasanotantenari narotaque Tasorentsisanori. Nompasaajatantaquearorica ninchaquiirequi nija, irosati ompeantanaquea irajantsi. ¹⁸Incamaarantayetanaque shimapee, oshitijencatasanotanaque catsini. Tecatsi paajeitanajero pirajeitajeri.’

¹⁹Icantiri aisati Tasorentsi Moiseshi:

—Pincanteri pirenti iroanquerota pinchaquiire, irijicotantayetearota nijapee, nijatenipee, opiojayetanta incajarepee, jero yoantayetaroriqui injatepee egiptosati, onquiramotijayetanaqueta maaroni.

²⁰Ari ijatamanaque Moiseshi jeri Aarón capichaji quitaiteni nijaqui, yoyeapairi pincatsari. Ineantavacariri ipocaque itsipajeitacari amitacoyetiriri, irosati icantantavacari icantaqueriri Tasorentsi. Irosati ipasaajatimotantacari Aarón nija. Aisati ijicoyetanaquero maaroni otimayetinta incajare jero nijatenipee, irosati oquiraajayetantanaca. ²¹Tecatsi irajeitajero irirajeitajeri, aisati icamajeitanaque shimapee. Oshitijencatasanotanaque catsini, otsoteanaquero maaroni Egiptoqui.

²²Ineantacarori pincatsari, irosati icajemacantajeitantanajari iotincaripee jeri sheripiaripee jitasorentsiweeyetatsiri; aisati iquempajeitapaajiro iriori. Aiquero iquisoshiretasanotanaqueri pincatsari, te inquemisanteriji Moiseshi jeri Aarón. Moncarataca icantaqueriri Tasorentsi: “Eiro iquemisantimpitsi.” ²³Irosati ipiantanaja iriori pincatsari ivancoqui, oquempetimotacari tecatsi irineaque. ²⁴Ineajeitantacarori maaroni savicajeitatsiri Egiptoqui, te oncameetsajatanajeji, tecatsi irajeitajero irirajeitajeri. Irosati iquianontantayetanaca otsapijapeequi nija Nilo irajeitajiri.

²⁵Ari avisanaque 7 quitaiteri iquiraajatacantacarori Tasorentsi nija Nil o.

Apitetatsiri oashinoncantsi: yoshequianaque masheropee

8 ¹Irosati icantantajari Moiseshi:
 —Meeca pijatashitajanteri aisati pincatsari, pincantapaajeri:
 ‘Icantaji aisati Tasorentsi: Pishinejeitajenari noshanincepee
 irijajeitajeta anta caaraiteriqui, impincatsajeitantapaajenari. ²Eirorica
 pishinejeitajiritsi, irosati noashinoncaimentasanojeitantempiri.
 Nontiancajeitempiri masheropee intsoteanaquero maaroni Egiptoni.
³Aisati inquempetanaquero nija Nilo, irijaasanotanaquearo catsini.
 Inqueayetanaque pivincatsarimentoqui, pimaamentoqui, maaroni
 ivancopeequi amitacoyetimpiri jeri saviquimoyetimpiri. Aisati
 inqueayetanaque pivetsicacantapinitantaroriqui pitantanepee. ⁴Yora
 masheropee impatacayetanaquempi maaroni pitsempequipeequi, aisati
 iriori amitacojeitimpiri jeri maaroni atiripee.’

⁵Ari cantajiri:

—Pincanteri pirenti iroanquerota irinchaquiere. Irijicoyetantearota
 nijatenipee, osantenipee jero incajarepee, irishitoantanaqueari oshequi
 catsini masheropee, intsoteantanaquearori maaroni Egiptoni.

⁶Irosati yoancantanacaro Aarón irinchaquiere, ijicoyetantanacaro
 nijapee. Irosati yoshequiasanojeitantanaca catsini masheropee. ⁷Ari
 icajemacantanajiri iriori iotashiyevetarori paitapeerica jeri sheripiaripee.
 Aisati iquempejeitapaaqueri iriori yoshequiajeitapaaqueri masheropee.
 Irosati ipiantanaja Moiseshi jeri Aarón. ⁸Icantani yashereapinijeitaqueri
 masheropee pincatsari. Irosati icajemacantantajari Moiseshi jeri Aarón.
 Yareetantapaajari, icantavaqueri:

—Meeca pincantajeri Pitasorentsite impeajeitajerita masheropee.
 Ariorica impeajeitanajea, irosati noshinejeitantajempi paajeitanajeri
 pishanincepee, pintaantayetapaajejanariri Pitasorentsite virantsi.

⁹Ari icantanaqueri iriori:

—Pincantena meeca jaoca oncarate picoi noncantacoventajempi
 Tasorentsiqui aisati amitacojeitimpiri jeri pishanincepee,
 impeajeitantajeari masheropee eiro itimantanajatsi pivincatsarimentoqui.
 Aintiquea intimajeitanaje nijaqui.

¹⁰Ari icantanaqueri pincatsari iriori:

—Nocoaque osaitequera pincantacoventajena.

Irosati icantantanajari iriori Moiseshi:

—Jee, aitaque oncanteari picantaquenari, piotanteari tecatsi pashini
 quempetearine Novincatsarite Tasorentsi. ¹¹Aitaque impeajeitanajea
 masheropee pivincatsarimentoqui, tecatsi ashereanajeitanajempine,
 aintiquea intimanaje nijaqui.

¹²Irosati isoquijantanaja Moiseshi jeri Aarón, ijatanaji inampiqui.
 Irosati icantantajari Tasorentsi impeajeitajeru masheropee. ¹³Irosati

icamajeitantanaja. Iro cantaincha ishitijencatasanotanaque catsini, itsoteanaquero Egiptoni. ¹⁴Yora atiripee yapatojeitajiri, ipioyetaqueri. ¹⁵Iro cantaincha yora pincatsari ineantajari itecatsitacojeitanaji, irosati iquisoshiretantanaja aisati. Te incoanaje irishinejeitajeneri ishanincepee irajeitanajeri. Aisati te inquemisanteroji icantavetapaajariri Moiseshi jeri Aarón. Moncarataca icantaqueriri Tasorentsi: “Eiro iquemisantimpitsi.”

Mavatatsiri oashinoncantsi: ishequianaque shineequipee

¹⁶Ari icantajiri aisati Tasorentsi Moiseshi:

—Pincantajeri Aarón irijicotero irinchaquiere impasatero quipatsi osamampojencatanaqueta, ompeantanaqueari shineequi, intsoteajeitantapemparori Egiptoni.

¹⁷Aitaque icantaquerori. Irosati ijicotantanajaro Aarón irinchaquiere ipasataquero quipatsi. Irosati opeantanaca shineequi yoajeitapaaqueri atiripee aisati ivirapee. ¹⁸Yora iotincaripee jeri sheripiaripee, icoajeivetanaja irishequijajeitantajearime shineequipee ishiacaaveementopeequi. Iro cantaincha te irimajeitajeroji. Aiquero yoshequiasanotanaitii catsini shineequipee, yashereajeitanaqueri atiripee aisati ivirapee. ¹⁹Irosati icantantajeitacari pincatsari:

—Iriotaque Tasorentsi mataquerori oca.

Iro cantaincha te inquemisanteriji icantavetacariri, aiquero iquisoshiretanajiri. Moncarataca icantaqueriri Tasorentsi Moiseshi: “Eiro iquemisantimpitsi.”

Cuatrotatsiri oashinoncantsi: yoshequianaque shimpoquipee

²⁰Irosati icantantajari Tasorentsi Moiseshi:

—Pintinaitamanempa capichaji quitaite, pijatamane nijaqui poyeamaneri pincatsari; aitaque impocamaneri. Pincantantavajeariri: ‘Icantaji aisati Tasorentsi: Pishinejeitajeri noshanincepee irijajeitajeta impincatsatantapaajenari. ²¹Eirorica pishinejeitajiritsi, irosati nontiancajeitantempiri shimpoquipee oshequi catsini. Intsoteapaaquero ivancopee equi egiptosati aisati pivincatsarimentoqui, irosati maaroni quipatsiqui. ²²Ariorica avishimojeitaquempi oca, nonashitacayemparo quipatsi Gosen isavicajeitinta noshanincepee, eiro catsini aneimatiritsi aparoni shimpoqui. Irotaque piotanteari narotaque Tasorentsi pincatsariventantatsiri aca Egiptoqui. ²³Nonashitacaajeitacari noshanincatacari aisati pishanincepee avirori. Osaitequerani pineajeitavaqueri nontiancajeitempiri.’

²⁴Aitaque icantaquerori Tasorentsi, itiancaqueri oshequi catsini shimpoquipee iquempevetapaacaro tsitenishaatsiri mencori. Iqueayetapaaquero maaroni pancotsipee aisati ivincatsarimentoqui pincatsari jero ivancopee iriori amitacoyetiriri. Itsoncajeitapaaquero maaroni quipatsi Egiptoni.

²⁵Irosati icajemacantantajari pincatsari Moiseshi jeri Aarón. Yareetantapaajariri, icantavajiri:

—Pijate meeca, pintaajeiteneri Pitasorensite pivira. Iro cantaincha eiro pijatitsi anta, aitaque meeca aca pintaajeiteneriri.

²⁶Ari icantanajiri Moiseshi:

—Te onimotenaji nontaimojeitempiri aca, tempa yora virantsi notainiriri Tasorensisanori Notasorensite, iriotaque ipincatsatiri pishanincepee inashitacaari. Ariorica irineacojeitaquenari nontayeneriri Tasorensi, aitaque iroimentajeitaquenari impicheimentajeitaquenari.

²⁷Aintiquea ocameetsati nojajeite anta caaraiteriqui, oncarate mava quitaiteri naniijeitanaque nareejeitantarori. Aitaque nontaajeitapeneriri Tasorensisanori Notasorensite virantsi. Tempa aitaque icantasanotaquenari.

²⁸Irosati icantantanajari aisati pincatsari:

—Jee, cameetsataque, pijate pintaantapempanariri virantsi picantiri Tasorensisanori Pitasorensite, iro cantaincha eiro pijatasanotitsi areejiqui. Pincantacoventajenayea narori impeantanajeari shimpoquipee.

²⁹Ari icantanajiri iriori Moiseshi:

—Ariorica meeca noshitoanaje aca, irosati noncantantajeari Tasorensi iroimpeajeitajeri shimpoquipee. Iro cantaincha meeca noncantasanotempi: ‘Eiroyea papiitajirotsi pamatavitajena aisati eiro pitsaneapitsajeitajaritsi noshanincepee naajeitanajerita nontaajeitapeneri Notasorensite virantsi.’

³⁰⁻³¹Ishitoantanajari Moiseshi ivincatsarimentoqui pincatsari, irosati iquenquetsatacantacari Tasorensi. Irosati imatantajaro Tasorensi icoacotaqueriri Moiseshi, ipeajeitanaja shimpoquipee; tecatsi timanajantsine catsini inampiqui. ³²Iro cantaincha ineantajari pincatsari itecatsitacojeitanaji, aiquero iquisoshiretanajiri aisati. Te incoyeji irishinejeitajeri ishanincajeitaniri Israel irijajeitantajeari.

Cincotatsiri oashinoncantsi: icamajeitaque virantsipee

9 ¹Ari icantajiri aisati Tasorensi Moiseshi:

—Pijatashitajanteri aisati pincatsari, pincantapaajeri: ‘Aitaque icantiri Tasorensisanori, yora ipincatsajeitiri noshanincepee: Pishinejeitajeri noshanincepee irijajeitajeta anta caaraiteriqui impincatsajeitantapaajenari. ²⁻³Eirorica pishinejeitajiritsi, irosatirica pintsaneajeiteari, irosati nontiancantajempiro pashini oashinoncantsi incamaarantayetanaque pivirapee: piyavayotepee, paashinotepee, piyameyotepee, pivacatepee jeri povishatepee. ⁴Irintiquea irashipee ishanincepeeni Israel, nonashitacaajeiteari; tecatsi catsini aparoni camayetatsine.’

⁵Aisati icantasanoti:

—Osaitequera nomatasanotero.

Ari ijatashitanaqueri Moiseshi pincatsari, icamantavetapaacari. ⁶Ari oquitaiteamanaji irosati itiancantacanari Tasorentsi oashinoncantsi; oamaarantitayetanaqueriri ivirapee. Irintiquea irashipee ishanincapee Israel, tecatsi camatsine aparoni. ⁷Ineantacariri pincatsari icamaarantayetaque, irosati itiancantaca amenerine irashipee ishanincapeeni Israel. Ineantapaacariri irosati icantajeita, tecatsi catsini camatsine. Iro cantaincha aikuero iquisoshiretasanotanajiri aisati, te irishineteriji irijajeitaje ishanincajeitaniri Israel.

Seistatsiri oashinoncantsi: isompojeitanaque egiptosatipee

⁸Irosati icantantajari Tasorentsi Moiseshi jeri Aarón:

—Pijatashitajanteri aisati pincatsari. Paavanejeitanaque samampo pojocavanetimotoapeeri jenoqui. ⁹Osamampojencaiteanaquerota maaroni Egiptoni, irosati ompeantanaquea sompotsijenca oantachari. Ontsoncajeitapeerita maaroni savicajeitsiri jeri iriori ivirapee timaaranatayetanajantsiri.

¹⁰Ari yaavanejeitanaque samampo irosati ijatashitantajari pincatsari. Ari yojocavanetimotoapaaqueri jenoqui. Irosati opeantanaca sompotsijenca, otsoncajeitapaaqueri maaroni atiripee jeri iriori ivirapee. ¹¹Aisati oquempjeitapaaqueri iriori iotincaripee jeri sheripiaripee, irotaque caari imatantaja impiatavajeari Moiseshi. ¹²Iro cantaincha yora Tasorentsi icantacaashiretacari pincatsari iquisoshiretasanotantacari. Irotaque caari iqumisantantari Moiseshi jeri Aarón icantavetapaajari. Moncarataca icantaqueriri Tasorentsi: “Eiro iqumisantimpitsi.”

Sietetsiri oashinoncantsi: opariaque iriniqui

¹³Ari icantajiri aisati Tasorentsi Moiseshi:

—Pintinaitamanempa capichaji quitaite, pijatashitajeri aisati pincatsari, pincantapaajeri: ‘Aitaque icantaqueri Tasorentsisanori, yora ipincatsajeitiri noshanincapee: Pishinejeitajeri noshanincapee irijajeitajeta caaraiteriqui impincatsajeitantapaajenari. ¹⁴Eirorica pishinejeitajiritsi, irosati nontiancajeitantempro pashini oashinoncantsi. Irotaque piojeitanteari queario narotaque Tasorentsisanori mayetirori maaroni, tecatsi quempetenane aca quipatsiquica. ¹⁵Ariorica nonintaqueme, nonijayempirome notasorenca nontiaquempirome aparoni oashinoncantsi, noasanquetayempime avirori aisati pishanincapee. Aitaque nompoyereajeitaquempime maaroni. ¹⁶Iro cantaincha noshinetaquempi panee, pineantearori notasorenca aisati iriotantenari savicajeitatsiri maaroni quipatsipeequi. ¹⁷Pineajeivetacaró oca, iro cantaincha aikuero pitsaneajeitanacariri yora noshanincapee; te pincoyeji pishinejeitajeri irijajeitaje. ¹⁸Meeaquea osaitequerani

onquempetamanempa, nontianquempiro antearoinapee iriniqui, caari piquemacotapiniti peerani quempetearone pariatineri. ¹⁹Ocameetsati pincantajeiteri amenajeitimpiriri pivacatepee iroiminqueajeitempirita, piquempoyeapinijeitantaririqui. Ariorica ompariaque iriniqui, oajeitapaaqueri atiripee aisati ivirapee caari quempoyeajeitacha ivancopeequi.’

²⁰Timatsi aparopeeni amitacoyetiriri iquemajeitavaquero ora icantapaaqueriri, oshequi itsaroasanojeitanaque. Irosati icantantayetacarí inampirepee inqueayetanaqueta ivancoqui aisati yominqueacantayetaqueri ivirapee. ²¹Iro cantaincha ainiro itsipapee caari quemisantavaquerone; te iroiminqueayeteriji irinti atiripee aisati ivirapee. ²²Irosati icantantajari Tasorensi Moieshi:

—Poanquero paco ompariayetantanaqueari iriniqui anta Egiptoqui, ontsoteantayetapemparori maaroni atiripee jeri ivirapee aisati iroori panquirentsipee.

²³⁻²⁴Ari yoancanaquero jenoqui, irosati itiancantacaró Tasorensi antearojenca otireatireatanaque aisati omanamanatanaca. Irosati opariantayetanaca antearoinapee iriniqui. Antearoite catsini opariaque iriniqui aisati otireatireatanaca, te oncaratanajeji; otsotanaquero maaroni Egiptoni. Tecatsi catsini quemacotapiniterone oca antearoinapee iriniqui te ompariapiniteni Egiptoqui. ²⁵Ari oayetapaaqueri maaroni atiripee aisati ivirapee caari queayetanaitsi. Aisati oquempejeitapaaquero shiocayetatsiniri oantsipeequi aisati ocaaracompiyetanaquero inchatopee. ²⁶Ari opariasanovetaca catsini. Iro cantaincha anta quipatsiqui Gosen, isavicajeitinta ishanincapeeni Israel, te catsini ompariimateji.

²⁷Ineantacarori oca pincatsari, irosati icajemacantantanajari Moieshi jeri Aarón. Yareetantapaacari, icantavajiri:

—Niotacotasnotaca ainiro nantane. Narotaque cantacaacarori aisati iriori noshanincapee; irintiquea Tasorensi yantayetiro cameetsayetatsiri. ²⁸Oshequi aneajeitaquero antearo omanamanatataca aisati oparianaque iriniqui. Meecaquea eiro notsaneajeitajaritsi pishanincapee. Nocoli meeca pincantacoventajeitajena Tasorensiqui. Irosati noshinejeitantajempi irijajeitaje.

²⁹Ari icantanaqueri iriori:

—Jee. Meeca ariorica noshitoanaje aca, irosati noancantapaajeero naco, nonquenquetsatacajeri Tasorensi. Irosati ompeantanajea iriniqui aisati eiro aneavajirotsi otireatireatini. Irotaque piojeitanteari iriotaque Pincatsariventajeitirori maaroni quipatsi. ³⁰Iro cantaincha notasanotaquempi jeri amitacoyetimpiri, te pimpincatsajeiteriji Tasorensi. ³¹Maaroni ipanquiyetiniri egiptosati: ora lino teaquiyevetajachari jero cebada iroaquera omotiyevetaja, otsoncanaca

maaroni otsinacapetaatanaca. ³²Irointiquea ora tirico jero centeno itsacayetajiri, tecatsi oyerone, tempa tequerata oshiocayeteta.

³³Isotoantanajari Moiseshi inampiqui pincatsari, irosati yoancantajaro iraco, iquenquetsatacaajiri Tasorentsi. Irosati opeantanaja shintsini opariini iriniqui aisati te aneajeroji omanamanatani. ³⁴Iro cantaincha ineantavetajarori pincatsari opeanaja, yapiitajiro yantajiro caari cameetsatsi. Te apaniro inquisoshirete aisati iriori amitacojeitiriri ³⁵Yora pincatsari iquisoshiretanaji te irishinetajeri irijajeitaje ishanincepee Israel. Moncaratata icantitaririri Tasorentsi Moiseshi: “Eiro iquemisantimpitsi.”

Ochotatsiri oashinoncantsi: yoshequianaque tsinaropee

10 ¹Ari icantajiri aisati Tasorentsi Moiseshi:

—Pijatashitajeri aisati pincatsari. Tempa narotaque cantacaashireacaacariri aisati amitacoyetiriri inquisoshiretasanotanteari, nonijaasanojeitanteariri antearoite caari ineapinijeiti ora nanteri, ²pincamantajeitanteariri coajicani pitomipee aisati picharinepee, noshirontimentajeitacari egiptosatipee aisati nonijaasanojeitaqueri caari ineapinijeiti. Irotaque piojeitantenari narotaque Tasorentsisanori.

³Irosati ijatashitantajari Moiseshi jeri Aarón pincatsari, icantavetapaajari:

—Aitaque icantiri Tasorentsisanori, yora ipincatsajeitiri noshanincepee: ‘¿Jaoca oncarate pojoquero pitseencana, pimpincatsatantajenari? Pishinejeitajeri noshanincepee irijajeitaje, impincatsajeitantapaajenari. ⁴⁻⁵Irosatirica pincantea pimpiatsatena, eirorica pishinejeitajiritsi irijajeitaje, osaitequerani nontiancajeitempiri tsinaropee piipatsitequi. Oshequi catsini irinajeitapee, intsoteanaquero maaroni Egiptoni, eiro oconijatanajitsi quipatsi. Impoiji iroajeitapemparo ora capichaji panquirentsipee caari otsoncayetanaque iriniqui, aisati inquempejeitanaquero iroori inchatopee oantsipeequiniri. ⁶Aisati ijaanaquearo pivincatsarimento jero ivancopee amitacoyetimpiri aisati maaroni pishanincepee egiptosati. ¡Oca pineajeiteri, teeyea irineeroni pirini jeri picharinepeeni irosati meeca!’

Itsoncantanacarori ineaveeti Moiseshi pincatsari, irosati isoquijantanaja ivincatsarimentoqui faraón. ⁷Irosati icantantajeitanaca amitacoyetiriri:

—¿Jaoca oncarate iroashinoncaacantaapinijeitee yoca shirampari? Novincatsarite, ¡pishineteri irijajeitajeta impincatsatapaajeri itasorentsite, icantiri Tasorentsisanori! ¿Tempa pinquenqueshiretimateroji aneajeitaqueri oashinoncantsipee, otsoncaarantajeitaquee?

⁸Irosati icajemacantantanajari Moiseshi jeri Aarón. Ari icantavajiri:

—Pijajeitajequeti pimpincatsajeitapaajeri picantiri Tasorentsisanori, Pitasorentsite. Iro cantaincha noci pincamantena, jaanica jajeitatsine.

⁹Ari icantanaqueri iriori Moisesi:

—Maaroni naajeitanaqueri noshanincepee. Tecatsi savicajeitanajantsine aisati iriori novishatepee jeri novacatepee. Irotaque nonquimoshireventas anojeitantariri Notasorentsise.

¹⁰Iro cantaincha icantanaqueri pincatsari:

—¡Niotacotaquempi te oncameetsateji picoajeitaqueri!
¿Pijijeitimpa quiso iroanaquempi Pitasorentsise, aisati pijijeitimpa ario noshinetaquempiri jananequipee irijajeite? ¹¹Eiro pimatirotsi paajeitanaqueri. Irintiquea paajeitanaque antearipee, pimpincatsajeitantariri Pitasorentsise, tempa irotaque picoajeitaqueri.

Irosati yojocacantantacari isavicamentoqui. ¹²Ari icantajiri aisati Tasorentsi Moisesi:

—Poanquero paco, pijicotajero Egipto impocajeitanteari tsinaropee iroajeitantapemparori panquirentsipee aisati maaroni caari otsoncanaque iriniqui.

¹³Ari yoancanaquero iraco, irosati itiancantacaro Tasorentsi tampea oquenapaaque isoquijapiniti catsirincaiteri. Ocantani ojeoncapinitaque quitaiteriqui aisati tsiteniriqui. Ari oquitaiteamanaji, irosati amajeitantacari oshequi catsini tsinaropee. ¹⁴Itsoteajeitapaaquero maaroni Egiptoni. Peerani te intimeji, aisati eiro itimajitsi coajicani iquempetaca meeca yoshequiasanotaque catsini. ¹⁵Yapataapaaquero quipatsi, te onconijatanajeji. Yoajeitapaacaro maaroni panquirentsipee aisati oitsoquipee timaaranantayevetanajanchari otsoncaarantanaqueri iriniqui. Te catsini ontimanaje inchatoshipee, eereshiyevetanajanchari oantsipeequi.

¹⁶Ineantacariri pincatsari, intsipaite icajemacantanajiri Moisesi jeri Aarón. Icantavajiri:

—Oshequi nantimojeitaqueri caari cameetsatatsi picantiri Tasorentsisanori pitasorentsise aisati noquempetaquempi avirori.

¹⁷Iro cantaincha aparo meeca noncantajempi, pimpeacotajenaro oca nantaqueri caari cameetsatatsi. Aisati pamanacoventajena Pitasorentsisequi, arioyeata iroimpeajeri yocapee tsoncantatsiri.

¹⁸Isotoantanajari Moisesi jeri Aarón, irosati iquenquetsatacantapaajari Tasorentsi. ¹⁹Irosati yoipiantajaro antearo tampea oquenanaqi iqueapiniti catsirincaiteri. Aajeitanajiri tsinaropee, oviincajeitajiri incajarequi Quitioncari. Tecatsi catsini timanajantsine aparo Egiptoqui.

²⁰Iro cantaincha icantacaashireacaajari Tasorentsi pincatsari iquisoshiretantanajari aisati, te irishinejeitajeri ishanincepee Israel irijajeitaje.

Nuevetatsiri oashinoncantsi: otsitenitanaque

²¹Ari icantajiri aisati Tasorentsi Moisesi:

—Poancajero paco jenoqui, ontsitenitanaqueta maaroni Egipto. Ora tsiteniri tsmoirotasanotatsiri imayeetiri impamiyeetero.

²²Irosati yoancantanajaro, irosati omapocantanaca antearoite otsitenitasanotanaque maaroni Egiptoqui. ²³Ocarati mava quitaiteiri te irimajeitanajeaji irineavacaajeitanajea. Icantani isavicajeitaque ivancopeequi. Aintiquea isavicajeitinta ishanincajeitaniri Israel, te ontsiteniteji; irosati ocanta oquitaiteti.

²⁴Irosati icajemacantantanajari pincatsari Moiseshi jeri Aarón, icantavajiri:

—Pijatequeti meeca anta pimpincatsatanteariri Pitasorentsiti, paajeitanajeri pitomipee. Iro cantaincha pojocajeitanajeri povishatepee jeri pivacatepee.

²⁵Iro cantaincha icantanaqueri iriori:

—¡Eirovee, avirotaque pavaquenane pivirapee nontaapeeneriri Novincatsarite Tasorentsi nompincatsatanteariri! ²⁶Ontimatiye naajeitanaqueri maaroni novirapee, tecatsi aparoni timanajantsine. Iriotaque noncoyearanteri nompincatsatanteariri Notasorentsiti. Tequerata meeca nareejeitea, te niojeiteji paitarica incoacayenari nonashitacayeari nompincatsatanteariri.

²⁷Iro cantaincha icantacaashireacaajari Tasorentsi pincatsari iquisoshiretantanajari. Te irishinejeiteriji irijajeite. ²⁸Irosati iquisatsatantacari Moiseshi, icantiri:

—¡Pijatanaje meeca aca! ¡Paamaventea pipocajicari pineajena aisati! ¡Ariorica pimpiaje pineajena, aitaque pincamaque!

²⁹Ari icantanaqueri iriori Moiseshi:

—Jee, cameetsataque picantaquenari; eiro nopiajatsi noneajatempi.

Icamantiri Tasorentsi Moiseshi incamajeite itomipee egiptosati jivatatsiri itimi

11 ¹Ari icantajiri Tasorentsi Moiseshi:

—Apanivani nontiancajeneri oashinoncantsi pincatsari aisati ishanincapee. Ariorica irineajeitavajero, eiro ishinetashitajimpitsi pisoquijashitanajea apaniro, irisati tiancajeitajempi, pisoquijajeitantanajeari. ²Meeca pincanteri maaroni pishanincapee, shiramparipee aisati tsinaneppee incoacojeitapanainterita egiptosati itsipanampiyetari vetsicayetachari oropee jeri plata. ³Ari icantacashireacaajeitacari Tasorentsi egiptosati, yaacameetsajeivetajanajari ishanincapee Israel. Aisati iriori amitacoyetiriri pincatsari, iquempetacantanaqueri Moiseshi irio pincatsari aisati iquempjeitaca maaroni ishanincapee.

⁴Ari icantapaajiri Moiseshi pincatsari.

—Aitaque icantiri Tasorentsi: ‘Ariorica onianquiiteanaque, coraquena navisanaquero maaroni Egiptoni, ⁵incamajeitanaque itomipee egiptosati

jivayetatsiri itimi. Irintanaquearo itomi pincatsari jivatatsiri itimi savicantearone ivincatsarimento, irosati otomipee iveranaro jivatatsiri itimi antaveetatsiri otononcaitanta tirico. Aisati incamayetanaque maaroni irijanipee virantsi jivayetatsiri itimi. ⁶Ontsotanaquea maaroni Egiptoqui antearoite iriraacojeiteri camayetatsineri. Oca irineeri, teeyea irineapiniteroni aisati eiro inejirotsi coajicani.’ ⁷Irotaque piojeitanteeriri Tasorentsi inashitacaajeitacari egiptosati aisati ishanincapee Israel. Eiro catsini itsarotimatiritsi otsitipee atiri aisati iriori ivirapee. ⁸Irosati irijatashitantanaquena maaroni amitacoyetimpiri, intiyoashijeivetapeena. Incantajeivetena: ‘¡Meeca pijataje, paajeitanajeri maaroni pishanincapee! Incantajeivetapeenarica, eiro nojajeititsi.’

Oshequi itsimaasanotanaca Moiseshi, irosati ishitoapitsatantanajari pincatsari. ⁹Tempa irotaque icantaqueriri Tasorentsi Moiseshi incaranqui: “Eiro iqemisantajeitimpitsi pincatsari, aitaque nontiancajeitajeneri egiptosatipee oashinoncantsipee ora caari ineapinijeiti, nonijaasanotanteeriri notasorenca.”

¹⁰Yora Moiseshi jeri Aarón yonijaasanoeyetacari pincatsari maaroni caari ineapinijeiti. Iro cantaincha icantacaashireacaacari Tasorentsi iquisoshiretantacari, caari ishinetantajari isoquijajeitanaje ishanincapee Israel.

Icoacairi Tasorentsi inquenqueshiretapinitero quitaiteri Yavisantaniri, yoipacaacoventantajariri

12 ¹⁻²Ari icantajiri Tasorentsi Moiseshi anta Egiptoqui: “Yoca meeca cashiri pinquenqueshiretapinijeitanteari, iriotaque intanajarori osarentsitantajeari. ³Meeca pincantajeiteri maaroni pishanincapee: ‘Ariorica oncaratanaque 10 iitaiterite cashirica, aitaque paayeteri pivancopeequi aparopee irijani ovisha iriorica chiivo, aisati inquempejeitaquea iriori icarajeitiri pishanincapee. ⁴Teerica irishequiteji ivancoquiniri iroanteariri maaroni virantsi, ocameetsati incajemeriri itsipanampitari iroacaajeiteari impaarantayetaqueri aparopeeni icarajeitaque, irimatanteari iroajeiteari. ⁵Yora virantsi paayeteri iriotaque shirampari, moncarataquerori aparo irosarentsite, cameetsatatsiri caari amashiyetacha; iriorica ovishajaniqui, teerica, chiivojaniqui. ⁶Irosati pinquempoyeantaqueari. Ariorica omoncaratapaaquea 14 iitaiterite cashiri, irishaavijiiteanaquerica catsirincaiteri, irosati poantajeitaqueari. ⁷Paavaqueroyea iriraja, pimpantayetantearo poashinampiyetirori pashitacoropee. ⁸Ariorica ontsiteniiteanaque, aitaque poyeariri tashirentsi ivatsa, pintsipataqueri quepishiyetatsiri oshi jero tanta caari conoacha tapiacaarori. ⁹Eiro catsini poaritsi capichaji janari, aisati oncorentsi. Maaroni iito, iitipee, iramporetsapee, ocameetsati pintashijeiteri paamariqui. ¹⁰Eiro poanontajatsi poajeitamanajeari.

Ariorica intimaarantapaaque, ocameetsati pintayeri. ¹¹ Aisati pinquitsaatitajeitaquea, pisapatotitajeitaquea aisati pajiriquitayetearo pinchaquierepee; pishintsite poajeiteari. Tempa irotaque quitaiteri Navisantanaqueari, tempa narotaque Tasorentsisanori. ¹² Oca tsiteniriquica aitaque navisanaqueri maaroni Egiptoqui, irosati noamaajeitantanaqueari itomipee egiptosati jivayetatsiri itimi jeri iriori ivirapee jivayetatsiri itimi. Aitaque nontsoncajeitaqueari maaroni ijitasorentsitashiyevetari egiptosati. Tempa narotaque Tasorentsisanori cantasanotatsiri.

¹³ “Ora iriraja pimpantayetero pivancopee, ponijantantearori jaocarica pisavicayetiri. Ariorica noneapaaquero, eiro noamaitajeitiritsi itomipee pishaninca, irintiquea navisanaque noamaitajeitantariri itomipee egiptosati. ¹⁴ Irotaque oca quitaiteri pinquencheshiretapinijeitantarori aisati pinquimoshireventapinijeitero, pimpincatsatapinijeitantenari. Tempa irotaque nocantacantiri, oncantaitiyempani. Irosati inquencheshiretapinijeite iriori pishanincajeitajeari coajicani.

¹⁵ “Oncarate 7 quitaiteri poajeitearo tanta caari conoacha tapiacaarori. Ariorica pintaanaquearo, te oncameetsateji onttime tanta tapiachari pivancopeequi. Jaanicarica oajeitaquearone, eiro pishinetiritsi incarajeitempi. ¹⁶ Ora quitaiteri pintaantanaquearori jero sietetapaatsiri, ontimatiye pampatotimentajeitena; tempa irotaque pinashitacayenari ocameetsatasanotaque. Eiro catsini pantaveetantarotsi, irointiquea povetsicanontayetea poanaropee. ¹⁷ Ora quitaiteri piquimoshireventantarori tanta caari conoacha tapiacaarori. Ocameetsati pinquimoshireventajeitero. Tempa irotaque quitaiteri nomishitoajeitantajempiri Egiptoqui. Pimatapinijeitero irotaque nocantacantiri oncantaitiyempani. Irosati inquencheshiretapinijeite iriori pishanincajeitajeari coajicani. ¹⁸ Poapinijeitearorica tanta caari conoacha tapiacaarori, pintaanaquearo ishaaviniiji catsirincaiteri 14 iitaiteriti cashiri intanajearone. Aitaque pintaanaquearori poajeitearo tanta caari tapiacha irosati oncaratantanaquea 21 quitaiteri irishaavijiiteanajerica catsirincaiteri. ¹⁹ Oncarate 7 quitaiteri eiro catsini otimayetitsi tanta tapiachari ivancopeequi pishaninca. Jaanicarica oaquearone tapiachari, eiro picarajeitajiritsi. Aisati inquempjeitea iriori pashinisati saviquimojeitimpiri. ²⁰ Irotaque eiro catsini poantarotsi conoachari tapiacaarori. Jaocapeerica pisavicajeiteri ocameetsati poajeitearo tanta caari conoacha tapiacaarori.’ ”

Icantiri Moiseshi jivatacantajeitatsiri

²¹ Ari icajemacantaqueri Moiseshi maaroni jivatacaajeitiriri ishanincapee, icantajeitiri: “Pijajeite paayete aparopeeni ovishajaniqui, iriorica chiivojaniqui poimentajeiterori quitaiteri iravisanteari

Tasorentsi iroavisaacojeitanteeri. ²²Ora irirajapee paajayetavaquero covitipeequi, impoji paayete panquirentsi icanteetiri hisopo, poisopatijaniquiyetaquero. Impoji poviincaajatero irirajaqui virantsi pimpantayetantearo poashinampiyetirori pashitacoropee. Tecatsi sotoatsine aparo picarajeitiri, irosati onquitaiteantanajea. ²³Ariorica iravisanaque Tasorentsi, iroamaajeitanteariri itomipee egiptosati. Ariorica irineanaquero irajantsi pipantayetaquerori poashinampiyetirori pashitacoropee, ari iravisanaquero. Eiro ishinetiritsi inampire oamantatsiri iroamaajeiteri pitomipee. ²⁴Oca nocamantajeitaquemperi, oncantaitiyempani. Irotaque icantacantiri Tasorentsi, ontimatiye pimpincatsajeitero aisati inquempetajea iriori ashanincajeitajeari coajicani. ²⁵Ariorica preejeitaquearo quipatsiqui icashiacaajeitaquemperi Tasorentsi impajeitemperi, pincantaitiyempani pantapinijeitero oca nocamantaquemperi. ²⁶Ariorica irisampijeitempi pitomipee: '¿Paita ojitari oca quitaiteri anquimoshireventajeiteri?' ²⁷Ari pancanaqueri: 'Iro anquimoshireventantearori oca quitaiteri ampincatsajeitanteariri Tasorentsi. Aisati ayeneri virantsi anquenqueshiretantearori peerani yavisantanacarori ivancopeeni ashaninca, yoamaitajeitantacariri itomipeeni egiptosati jivayetatsiri itimi. Irintiquea avisacojeitajantsi itomipee ashanincapeeni.' "

Iquemajeitantacarori ishanincapee ora icantaqueriri, irosati yoivojeitantanaca, ipincatsajeitanaqueri Tasorentsi. ²⁸Ari ijajeitanaque imajeitaquero ishanincajeitaniri Israel maaroni icantaqueriri Tasorentsi Moiseshi jeri Aarón.

Diestapaintsiri oashinoncantsi: icamajeitaque itomipee jivayetatsiri itimi

²⁹Ari onianquiiteanaque, irosati yoamaitayetantacariri Tasorentsi itomipee egiptosati jivayetatsiri itimi: jeri itomi pincatsari jivatatsiri itimi poyetajearineme impincatsaritaje, aisati iquempetitaqueri itomi timayetatsiri caravosoqui, jeri irijani ivirapee jivayetatsiri itimi. ³⁰Yora pincatsari jeri iriori amitacoyetiriri aisati maaroni ishanincapee itinaajeitanaca tsiteniriqui. Antearoite catsini irajeitanaca aisati yoashirejeitanaca catsini, otsoteanaca maaroni pancotsipeequi, te intimeji caari camaarrantajeitatsine. ³¹Ari intsipaite icajemacantanaqueri pincatsari tsiteniriqui Moiseshi jeri Aarón, icantavaqueri:

—¡Pijajeitaje meeca! ¡Pinijantareanajeri natiritepee! ¡Pijajeite pimpincatsajeitapaajeri Pitasorentsite picantapinijeitanari! ³²Paajeitanajeri maaroni povishatepee aisati pivacatepee, tempa picoajeitaque, pijajeitequeti meeca. Pincantacoventapaajena narori Pitasorentsitequi.

³³Ari ishintsinajeitanaqueri, icoaque irijajeititanajea intsipaite. Tempa iquenqueshirejeitaca ijijeivetaca ari incamajeitaque maaroni.

³⁴Irosati yovetsicaarantajeitantaja ishanincajeitaniri Israel. Yaayetaquero aisati ora ijapatsayevetacari caari iconoayeti tapiacaarori tanta, yapinaicapatsayetaquero quitsaarentsiqui, inquijacoyetantanaquearori. ³⁵Aisati ijatashijeitapaintiri egiptosati icoacoyetapaintiri inepiniyetiri. Ipantayetavacariri maaroni timimoyetiriri: vetsicayetachari plata, oro jero aisati iitsaarepee. ³⁶Yora Tasorentsi icantashireacaajeitacari egiptosati ipashijeitantavacariri cameetsa maaroni yamanajeitapaintiriri. Aitaque ocantari yaitajeitanaqueri yashiyevetaniri egiptosatipee.

Ishitoantajeitanajari ishanincajeitaniri Israel Egiptoqui

³⁷Irosati ishitoantajeitanaja, yojocajeitanajiro inampini Ramsés, iquenajeitanajiro anta Sucot. Oshequi catsini inajeiti. Icarajeiti 600,000 shiramparipee moncaratachari imanajeitea, jero aisati tsinanepee jeri jananequipee. ³⁸Aisati oshequi pashinisati atiripee oijajeitanaqueriri. Aisati iquempetaca irovishatepee jeri ivacatepee oshequi catsini. ³⁹Iro cantaincha, te osamaniteji irovetsicanontajeitantanajeari iroajeitanajeari nianqui; tempa ishintsinajeitajiri egiptosatipee intsipaite irijajeitaje. Irointi yaanaque tanta yovetsicaqueri caari conoacha tapiacaarori.

⁴⁰⁻⁴¹Ari ocarati 430 osarentsipee isavicantajeivetacari anta Egiptoqui. Omoncaratantapaacari 430 osarentsipee, ishitoajeitantanajari Egiptoqui. ⁴²Ari nianquiteni tsiteniri aitaque yamenacoventajeitaqueriri Tasorentsi yomishitoajeitantajariri. Irotaque inquenqueshiretapinijeitantarori ishanincajeitaniri Israel osarentsipeequi. Aisati inquempejeitajea iriori irishanincajeitajeari coajicani, incanteani inquimoshireventapinijeitero.

Icantacantiro Tasorentsi inquimoshireventapinitero yavisantaniri

⁴³Ari pashini quitaiteri icantasantaqueri Tasorentsi Moiseshi jeri Aarón:

“Jero oca nocantacantiri: Ariorica pinquimoshireventero quitaiteri navisantacari caari noamaajeitantari pitomipee, te noncoacaajeiteriji pashinisati iroajeiteari ivatsa poaquenari. ⁴⁴Irintiquea oajeitearine yora pinampirepee jeri pamanantanepee, tempa pitoyeantajeitaqueri irinti. ⁴⁵Itimirica pashinisati quivantimpiri, iriorica antaveetimpiri, eiro catsini yoayetaritsi. ⁴⁶Ocameetsati iroacaajeiteari irinti itomipee aparopeequi ivancoqui. Eiro catsini ishitoacairitsi ivatsa saiteriqui aisati eiro icarajayetiritsi itonqui. ⁴⁷Aisati inquempejeitaquea maaroni pishanincepee. ⁴⁸Iro cantaincha isaviquimojeitimpirica pashinisati atiri coatsiri incarajeitempi, ocameetsati pintoyeantacantajeri aisati iriori ishanincepee. Impoijiquea pincarajeitajeri inquempejeitantanajempiri. Eiro catsini poacaajeitaritsi caari toyantajeitacha. ⁴⁹Oca nocantacantiri, ocameetsati irimoncarajeitajero maaroni pishanincepee timajeitajantsineri coajicani, jeri pashinisatipee saviquimojeitempine.”

⁵⁰Ari imajeitaquero ishanincajeitaniri Israel icantaqueriri Tasorentsi Moiseshi jeri Aarón. ⁵¹Aitaque ocantacari imishitoajeitajiri Tasorentsi ishanincajeitaniri Israel anta Egiptoqui. Ijajeitanaque iveshintsajeitanaca.

Irinashitacayeneri Tasorentsi maaroni jivatatsiri itimi

13 ¹⁻²Jero pashini icantaqueriri Tasorentsi Moiseshi: “Ocameetsati pinashitacayenari maaroni jivayetatsiri itimi, tempa maaroni itomipee pishaninca jivayetatsiri itimi, iriojeitaque nashi. Aisati pinquempeteri maaroni irijani ivirapee jivayetatsiri itimi.”

³Irosati icantantacari Moiseshi ishanincapee:

“Pinquenqueshiretapinijeitero ora quitaiteri yonijaajeitantaqueerori Tasorentsi itasorenca. Yoipacaacoventajeitantajeeri iperanajeitanteevetaqueerini egiptosati. Eiro poajeitarotsi tanta conoachari tapiacaarori. ⁴⁻⁵Tempa irotaque quitaiteri aisati cashiri icanteetiri Abib, ashitoantajeitanajari Egiptoqui. Yora cashiri irotaque piveshirementapinijeitanteariri Tasorentsi. Iraajeitantanajempiri anta quipatsiqui oshiocayetapai maaroni panquiveerentsiyetatsiri, eiro ocoiteimojeitimpitsi paitapeerica. Irotaque quipatsi icantasanotitacari intacantajeitaqueerini: ‘Coajica nompajeiteri pishanincajeitajeari; irotaque irisavicantajeitajeari.’ Tempa aitaque isavicajeitiri cananeopee, yora hititapee, amorropee, heveopee jeri jebuseopee. ⁶⁻⁷Aisati oncarate 7 quitaiteri poapinijeitantearori tanta caari tapiacha. Iro vecarantapaarori quitaiteri sietetatsiri, irotaque piveshirementasanojeitanteariri Tasorentsi, pimpincatsatanteariri. Eiro catsini otimayetitsi tanta tapiayetachari ivancopeequi ashanincapee. ⁸Irotaque pincamantajeiteriri pitomipee jeri pishanincajeitajeari coajicani: ‘Oca nantajeitiri, noquenqueshirejietiro peerani yomishitoajeitantajanari Tasorentsi nosavicantajeivetacaniri Egiptoqui. ⁹Oca pantapiniteri, irotaque pinquenqueshiretapinijeitantearori maaroni icantacantiri Tasorentsi. Irotaque pimatantearori pinquenquetsatacotapinijeitero, pinquempetacatea pisoncaatacojeitacaro pijempequipeequi ariorica pivancainapeequi. Tempa iriotaque nijaajeitaqueerori itasorenca. ¹⁰Irotaque piveshirementapinijeitanteariri. Pinquenqueshiretapinijeitero osarentsipeequi, omoncaratapaajearica oca quitaiteri Yavisantaniri.’ (Icanteetiro Pascua.)

¹¹⁻¹²“Ariorica irareetacaajeitajempi Tasorentsi anta iipatsitequi cananeopee, icantasanotaqueriri intacantajeitaqueerini, pinquenqueshiretapajaero nocamantajeitaquempiri. Ariorica otimayeteri pijinapee pitomi, maaroni jivayetatsine intime iriotaque pinashitacayeteanariri Tasorentsi. Aisati pinashiyeteanari irijanipee pivira jivayetatsine intime, iriojeitaque irashitasanojeiteari Tasorentsi. ¹³Iro cantaincha iriorica timatsine orijani paashinote, ocameetsati iroiinti pimpinaajeri irijani ovisha, teerica, chiivojaniqui. Teerica

pincoyeji pimpinayeri paashinote, ocameetsati pinquentsireeri. Aisati pitomipee jivayetatsine intime iriotaque pimpinaayereri. ¹⁴ Ariorica irisampijeitempi pitomipee jeri pishanincajeitajeri: ‘¿Paitampa pantapinijeitarori?’ Ari pancanaqueri: ‘Iro nantajeitantarori: noquenqueshirejietiro peerani yonijaajeitantaquenarori Tasorentsi itasorenca, yomishitoajeitantanajari anta Egiptoqui, iperanajeitanteevetaquenarori. ¹⁵ Aisati iquisoshiretantacari pincatsari, caari ishinejeitantanani noshitoajeitanajearo iipatsite. Irotaque yoamaitajeitancariniri itomipee jivayetatsiri itimi aparopeeni ishanincapee, aisati iquempetitajeitaqueri irijanipeeni ivira jivayetatsiniri itimi. Irotaque meeca nonashitacantayetanariri Tasorentsi irijanipee virantsi jivayetatsiri itimi, aisati nopinayetiriri notomipee jivayetatsiri itimi, virantsi nontayeneriri. ¹⁶ Oca nantapinijeitiri oquempevetaca nosatoncaajeitaca nojempequipeequi aisati novancainapeequi. Irotaque quenqueshirecaajeitempironeri yantaqueri Tasorentsi Egiptoqui antearoite itasorenca yomishitoajeitantaajeeri.’ ”

Ojivajeitaqueri mencori aisati paamari ishanincajeitaniri Israel

¹⁷ Ishinejeitantajariri pincatsari ishanincajeitaniri Israel ishitoajeitanajero iipatsite, te inquenacaanajeriji Tasorentsi avotsiqui jatantachari iipatsitequi filisteopee irareejeitantaajeameri intsipaite. Tempa ioshirejeitaqueri eiro icoajeititsi irimanajeitapeeri, irointi incoajeitanaje impiajeitaje aisati Egiptoqui. ¹⁸ Irotaque yaajeitantanacariri irishoncajeitanaquea caaraiteriqui, irosati jatantachari anta incajarequi pajitachari Quitioncari.

Ishitoajeitantanajari ishanincajeitaniri Israel, cameetsa iveshintsaajeitanaca, iquempejeivetanacari manajeitachari.

¹⁹ Yora Moiseshi yaacantanajiro itonquini Joséni. Tempa peerani icantajeititarini ishanincapee: “Queario iramitacojeitempi coajicani Tasorentsi, irajeitanajempi anta aipatsitesanoriqui. Ariorica omoncaratapaquea oca, ocameetsati paajeitanajero notonqui anta.”

²⁰ Ari yojocanajiro Sucot, yovaajeitanaja irosati yareejeitancaro Etam, intanacaronta caaraiteri. Aitaque isavicajeitapaajiri. ²¹ Icantani Tasorentsi itsipajeitacari quitaiteriqui, iquempevetacaro mencori ocatiatsantsaataca yonijaajeitantariri avotsi. Aisati tsiteniriqui iquempevetacaro paamari itsiotacojeitaqueri. Irotaque imajeitantari yanijeitanaque quitaiteriqui aisati tsiteniriqui. ²² Ora mencori ocantani ojivatapinijeitaqueri maaroni quitaiteripeequi aisati tsiteniripeequi oquitasantetacotapinijeitaqueri.

Yojajeivetacari egiptosati ishanincajeitaniri Israel irajeitavajerime

14 ¹⁻² Ari iquemajiri Moiseshi Tasorentsi, icantajiri:
 “Pincantajeri pishanincapee impiajeitanajeta anta Pihahiro, montetarori Migdol jero Baal-sefón ora incajarequiniri;

aitaque pisaviquimojeitapeerori. ³Incantashitempata pincatsari: ‘Yora ishanincajeitaniri Israel timpinacajeitaque impeashijeiteani caaraiteriqui, te iriojeiteji jaocarica inquenajeitanajeri.’ ⁴Iro cantaincha naro cantacaashiretacayearine inquisoshiretantajeari iroijanajeitantavetavajempiri, irosati nonijaajeitanteari notasorenca. Impoijiquea iriojeitanaque egiptosati narotaque Tasorentsisanori.”

Ari iquemisantajeitaqueri ishanincapee Moiseshi, irosati ipiajeitantanaja. ⁵Ari ipocashitaqueri ishanincapee pincatsari, icantapaaqueri: “Jajeitaji ishanincajeitaniri Israel.” Irosati iquenqueshire acojeitantavetajari, icantavacaajeitanaca: “¡Paitaquea ashinejeitantajariri ijajeitaji! ¡Yojocajeitanajeero yantaveejeiteeni!”

⁶Irosati yapatojeitantanacari oshequi manajeitachari; ari icantiri: “¡Pishintsite, povetsiquenaro noshiacomento!” ⁷Irosati yovetsicantayetacaró ocarataque 600 shiacomentotsipee iroperori jero pashinipee timayetatsiri. Inteyetanaqueari aparopee jivatacairiri aisati manatachari caratiriri. ⁸Ari icantacaashireacaajari Tasorentsi pincatsari iquisoshiretantanajari yoijanajeitantavetajariri, ineavetavacari isoquijajeitantanajari yonijaaqueri Tasorentsi antearoite itasorenca.

⁹Irosati ijatacantajeitanacari maaroni manajeitachari itejeitanaca ishiacomentopeequi. Irio itsipapee iquijacojeitanacari cavaayopee yoijanajeivetanacari. Ineajeivetapaajari anta otsapijaqui incajare, montetarori Pi-hahiroto jero Baal-sefón, ivancotimojeitapaacaro.

¹⁰Yamenantajeitanacari, ineajeitavaitiiri ipocajeitaque oshequi catsini egiptosati. Ari itsaroasanojeitanaque catsini ishanincapeeni Israel. Irosati yamenantanaca jenoqui, yaventajeitanacari Tasorentsi, icantajeitanaqueri: “¡Notasorentsite, poavisaacojeitena!” ¹¹Irosati icantajeitantanacari iriori Moiseshi:

—¡Paita pamajeitantanajari aca nosavicajeivetaca Egiptoqui, poamaacantajeitantenari aca caaraiteriqui! Aitaque noncamajeitemeri anta Egiptoqui. ¹²Tempa aitaque nocantajeivetaquempi ‘Pishinejeitena nantaveejeitenerita egiptosati. Iro cameetsavetachari imperanajeitename, eiroquea nocamajeitantame aca caaraiteriqui.’

¹³Ari icantanaqueri iriori Moiseshi:

—Eiro pitsaroajeititsi, irointi pishintsishirejeitanaque, pinquenqueshirejeitanaqueri Tasorentsi, tempa iriotaque oavisaacojeiteeneri. Yonta egiptosati pineajeitaqueri, eiro catsini aneajeitajiritsi aisati. ¹⁴Eiro piquenqueshireacojeitatsi ancamajeite, irio Tasorentsi piacoventajeiteene.

Imonteajeitanacaro ishanincajeitaniri Israel incajare Quitioncari

¹⁵Ainiroquera icatiajeitaca, irosati icantantacari Tasorentsi Moiseshi:

—¡Paita icantashijeitantacari pishanincapee! ¡Caarimpa ishirejeitantana! Pincanteri: ‘¡Tsame ajajeiteta!’ ¹⁶Aviroquea vanquerone

pinchaquiire, pijicotantearo incajare; ontencareajatantanaqueari nianqui ompirijatanaqueta, pavisajeitantanaqueari intatiqueronta. ¹⁷Naroquea cantacaashiretacayearine maaroni egiptosatipee inquisoshirejeitanajeta, iroijanajeitantapempiri. Nonijaasanojeitantariri notasorenca, nontsoncajeiteri pincatsari jeri manajeivetachari carajeivetariri, tejeivetachari shiacomentotsipeequi aisati quijacoyevetariri cavaayopee. ¹⁸Ariorica nonijaajeitaqueri notasorenca, impoijiquea iriojeitanaque maaroni ishanincapee narotaque Tasorentsisanori. ¹⁹Irosati ishoncantapaaca Inampire Tasorentsi itimantacaro mencori, iquenajeitapaaquenta ishanincajeitaniri Israel. Tempa iriotaque jivatapinijeitaqueriri. ²⁰Ari ocatiatsantsaatapaaca otsitenitacotasanojeitapaaqueri egiptosati. Irotaque caari imajeitanta inquempejijeitavajeari. Irintiquea ishanincajeitaniri Israel, oquitasantetac otasanojeitaqueri.

²¹⁻²²Ari yoancanaquero Moiseshi iraco ijicotantanacaro incajare, irosati itiancantacaro Tasorentsi antearoite tampea. Ocantani ojeoncapinitaque tsiteniriqui, irosati otencareajatantanaca. Oticaajatanaca acaquerocapeequi, opirijatanaque nianqui imajeitantanacari yavisajeitanaque intatiqueronta ishanincajeitaniri Israel.

²³Ari ishiacojeivetapaaca iriori egiptosati yojajeivetapaacariri irosati nianqui incajare. ²⁴Ari irotimatajantsi onquitaiteaje, irosati yamenantanacari Tasorentsi mencoriquinta amorecaquenta paamari icomitacaajeitacari egiptosati ivaraashijeitanaca. ²⁵Aisati ocarajayetanaque oiti ishiacomentopee. Oshequi opomerentsitimojeitanacari intsiquero icantajeitanaca. Irosati icantavacaajeitantanaca.

—¡Tsame ashiapitsajeitanajerita ishanincapeeni Israel! ¡Oshequi ipiacoventajeitacari Itasorentsite!

²⁶Irosati icantantajari Tasorentsi Moiseshi:

—Poancajero paco, pijicotajero incajare ompijatantapaajeari, ontsoncajeitantanaqueariri aajeitanaqueri shiacoyevetapaachari jeri quijacoyevetariri cavaayopee.

²⁷Ari yoancanajiro Moiseshi iraco ijicotanajiro incajare. Irosati opiantapaaja oquempeveitani, quitaiteanaji oni. Yora epiptosatipee icoajeivetanaja irishiapitsajeitanaquerome. Iro cantaincha itsitoncajeitacaro nija. Aitaque ocantari yoimitsitiajeitantariri Tasorentsi. ²⁸Opiantapaajari nija oquempeveitani, omitsitiajeitaquero maaroni shiacomentotsipee, quijacoyetariniri cavaayo aisati manajeitacharini oijajeivetapaacariri ishanincapeeni Israel. Tecatsi aparoni avisacotajantsine. ²⁹Irintiquea ishanincajeitaniri Israel monteajeitanaincha. Yaniijeitanaquero nianqui pirijatanaintsiri, oticaajatanaca incajare acaquerocapeequi.

³⁰ Ora quitaiteriqui aitaque yoavisaacojeitaqueriri Tasorentsi ishanincajeitaniri Israel yojijanajeivetantavajariri egiptosatipeeni. Ari yamenacojeitapaqueri otsapijaqui incajare, ineajeitaqueri yentayetapaaca egiptosatipeeni. ³¹ Ineajeitantarori maaroni ishanincajeitaniri Israel itasorenca Tasorentsi yonijaasanoaqueriri egiptosati, irosati ipincatsajeitantanacari. Ishiretasanojeitanacari, aisati iquempetanaqueri Moiseshi yora quemisantiriri.

Ivampoyeane Moiseshi

15 ¹ Irosati ipampoyeaventantanacari Moiseshi Tasorentsi, ipincatsatasanotanaqueri; icarajeitaqueri maaroni ishanincapee. Jero oca ivampoyeane:

- “Nompampoyeaventeri Tasorentsi;
tempa iriotaque noneacameetsatiri.
Tempa imatasanojeitaquero caari aneapinijeiti,
yomitsiticojeitaqueri quijacoyevetariri cavaayopee.
- ² Iriotaque nopampoyeacoventiri;
tempa irio mayetaquenari paitapeerica, yoavisaacojeitantanajari.
Iriotaque Notasorentsite, noncamantacoteri: Icameetsati;
aisati iriotaque Tasorentsi iquemisantajeitaqueri
intacantajeitaquenaniri;
ocameetsati nompincatsajeiteri.
- ³ Iriotaque Tasorentsi manatincari.
Irotaque ivajirosanori:
Tasorentsi Timitachaniri, Aneashitachari.
- ⁴ Iriotaque Tasorentsi omitsitijaiteaquerori incajarequi
ishiacomentopeeni
aisati manajeitacharini carajeivetariri pincatsarini.
Yora neaperoyevetachari amitacoyetiriniri
itsitijaiteanaque incajarequi Quitioncari,
- ⁵ Itsitiasanojeitanaque saanajariqui,
iquempejeitanacaro mapi;
omitsitiasanojeitaqueri incajare; te inconijatajeji.
- ⁶ Notasorentsite, ponijayetaqueri pishintsitasanoti,
pitsoncajeitantariri quisajeivetaquempiniri.
- ⁷ Oshequi Pitasorentsitasanotaque catsini,
pimatasanojeitantariri coajeivetachari iranaacojeitempime.
Piquisanotanaca, pitsoncajeitantariri,
iquempejeitanacaro casaveshi itayeetiri.
- ⁸ Tempa pitasoncaajataquero nija pitasorencaqui,
otencareajatantanacari.
Oticaajatanaca acaquerocapeequi,

- oquisoiteantanacari nianqui quipatsi.
- 9 Yora coajeivetachari iroajeitavajename icantavacaajeivetaca:
 ‘Aitaque aijanajeitanaqueri irosati areejeitantavajeari,
 antsoncasanojeitavajerita avajeitavajeri.
 Aapitsajeitavajerita paitapeerica yashiyetari,
 impoiji ampaarantavacaajeitearo,
 irosati anquimoshirejeitantaquea.’
- 10 Iro cantaincha pitasoncaajatajiro,
 opiaajatantapaajari antearo omotoncane.
 Iquempejeitanacaro plomo ariorica irojoqueetero saanajariqui.
- 11 Notasorentsita,
 ¡tecatsi aparoni ijitasorentsiyeevetari quempetempine!
 ¡Tecatsi catsini quempetempine cameetsatatsine,
 pipincatsaritananoti!
 ¡Aviro mayetirori paitapeerica covencayetatsiri
 caari ineapinijeiti atiri!
 Ocameetsati incantacoyeetempi: Picameetsati.
- 12 ¡Ponijaasanoaqueri pitasorenca,
 ora quipatsi otsoncajeitaqueri
 oquempeveta oniajeitaqueri!
- 13 Oshequi pinintasanojeitaquena,
 irotaque pijivajeitantaquenari.
 Tempa narojeitaque pishanincepee,
 irotaque poavisaacojeitantajanari.
 Paajeitantanajenari pitasorencaqui
 anta quipatsiqui pinashitacaacari Pinanteari.
- 14 Ariorica inquemacojeitaquero savicayetatsiri nampitsipeequi oca
 pimayetaqueri,
 intsaroajeitanaque catsini, impioncashijeitanaquea.
 Irioquea filisteopee omapoqueri incatsinentashijeitanaquea.
- 15 Yora jivatacaayetiriri anta quipatsiqui Edom
 eiro ineaperotanajatsi.
 Jeri iriori jivatacaayetiriri anta quipatsiqui Moab
 intsaroasanojeitanaque catsini
 savicayetatsiri anta quipatsiqui Canaán,
 eiro ineaperotanajatsi.
- 16 Notasorentsita, ¡aitaque oncanteari
 intsaroacaasanotearo pitasorenca!
 ¡Eiro ishevajeitanajatsi, inquempejeitanaquearo mapi,
 irosati yavisantajeitanaqueari pishanincepee yora pashijeitacari!
- 17 Notasorentsita, paajeitanajena anta toncaariqui pinashitacaari,
 ora picoyeaqueri pisavicanteari,

oncanteani ontime.

¹⁸ ¡Icantaitatiani Tasorentsi ipincatsaritasanoti!”

Ovampoyeane María

¹⁹Iquiacojeitantavetapaacari pincatsari ishiacomentopeequi aisati iyavaayotepeequi incajarequi, itasoncaajatajiro Tasorentsi opiaajatantapaajari aisati, irosati oimitsitiantajeitacari maaroni. Irintiquea ishanincajeitaniri Israel jajeitanaintsi pirijaitanaintsiri anta intatiqueronta. ²⁰Ari otimi iritsiro Aarón, opajita María, itasoncaventaquero Tasorentsi ojivatacaquero otsinaneroronte. Ari aaque pantereta opampoyeacaajeitaquero, cameetsa ovairatimentajeitaqueri Tasorentsi. ²¹Jero meeca ovampoyeane:

“Tsame ampampoyeaventajeiteri Tasorentsi;
tempa iriotaque nijaajeitaqueerori itasorenca caari aneapinijeiti.
Yomitsitajeitantariri incajarequi cavaayopee jeri quijacoyevetariri.”

Yoameetsajatajiro Tasorentsi nija quepishijatatsiniri

²²Impoiiji yovaacanajari Moiseshi ishanincapee, yojocanajiro incajare Quitioncari. Iquenajeitanaquero caaraiteriqui pajitachari Sur, ocarati mava quitaiteri yanijeitanaque, tecatsi catsini irineimate nija. ²³Irosati yareejeitancaro nija quepishijatatsiri, te irimajeiteroji irirajeitero. Tempa quepishijataque oni, irosati ipajitancaro irineanequi iriori Mará, icanteetiri Quepishijari.

²⁴Yora atiripee intanacaro icantimataqueri Moiseshi, aisati isampitaqueri: “¡Jaocaquea meeca ayerori nija irajeiteri!” ²⁵Iquemajeitantariri Moiseshi, ari iquenquetsatacaqueri Tasorentsi, irosati yonijantacari inchashimpojaniqui. Ari yoviincaquero, irosati ocameetsajatantanaja.

Aitaque anta ineantacariri Tasorentsi, aisati yoametaqueri intimantajeiteari cameetsa. ²⁶Icantasanotiri: “Ariorica pinquemisantasantaquena aisati pimajeitaquerorica maaroni nocoacaajeitaquempiri aisati pimoncarataquerorica nocantacantiri; irotaque pintimantajeiteari cameetsa, eiro notiancajeitimpirotsi oashinoncantsi quempetarori notiancaqueneriri egiptosati. Tempa narotaque Tasorentsisanori oavisaacotempine, tecatsitacaajeitimpiri caari pimantsiajeitanta.”

²⁷Ari yovaajeitanaja irosati yareetancaro Elim. Aitaque otimayetapairi amotoajapee nija ocarati 12, aisati opatiquiyetapaa compiroshipee ocarati 70. Aitaque ivancotimojeitapaacarori.

Ipaqueri Tasorentsi contonapee aisati maná yoajeitacari

16 ¹Ari iponeajeitanaja ishanincajeitaniri Israel Elim, irosati yareetancaro caaraiteri Sin, irotaque montetarori Elim

aisati Sinaí. Iro quitaiteri 15, apitetatsiri cashiri yareetantacari, omoncarataja ishitoantajeitanajarori Egiptoni. ²Anta caaraiteriqui aitaque icantimajeitapaajiriri aisati Moiseshi jeri Aarón. ³Icantajeitiri:

—¡Aviro amajeitaquenari aca, meeca paacantajeitaquena notashe, irotaque noncamajeitanteari! Anta nosavicajeitantaniri Egiptoqui, oshequi noapinijeitari poshiniri, noquemapinijeita; tecatsi coiteimojeitenane. Ariome incoacaajeitaquename Tasorentsi noncamitajeitaqueame anta, eiro nashinoncaitime aca.

⁴Irosati icantantajari Tasorentsi Moiseshi:

—Meeca nompajeitempi poajeiteari poneachaneri inquitequi. Yora pishanincapee iraanontajeitea quitaiteripeequi apatiro iraanontea ocarati iroajeiteari quitaiteriqui. Nocoi nameneri jaanica quemisanterone nocantayetiri, aisati jaanica caari quemisanterone. ⁵Ora seistapaatsineri quitaiteri, ariorica iraanontea yovetsiqueri iroyeari ivancoqui, ocameetsati iraanontajeitea quimota. ⁶Yora Moiseshi jeri Aarón icamantajeitaqueri ishanincapee:

—Ariorica irishaavijiiteanaje catsirincaiteri, aitaque piojeitanajeri iriotaque Tasorentsi omishitoajeitajimpiri anta Egiptoqui. ⁷Ariorica onquitaiteamanaje aitaque pineajeitaquero itasorenca Tasorentsi, tempa iquemajeitaquempi picantimajeitaqueri. ¡Paitampa pijitacantaqueri jaoca nojijeitacari narori, picantimajeitantaquenari!

⁸Ari icantasantotiri aisati:

—Ariorica irishaavijiiteanaje catsirincaiteri, impajeitempi vatsatsi poajeiteari aisati osaitequera impasanojeitempi tanta poajeiteari. Tempa iquemajeitaquempi picantimajeitaqueri. Te naro pincantimate, irinti Tasorentsi picantimataque.

⁹Ari oquitaiteamanaji, irosati icantantamanacari Moiseshi irirenti:

—Pincanteri maaroni ashanincapee impocajeitamaneta aca ampatotimentajeitamanearita Tasorentsi; tempa iquemajeitaqueri oshaiteji icantimataqueri.

¹⁰Ainiroquera Aarón iquenquetsatacaajeitiri maaroni ishanincapee, ari yamenajeitanaque anta caaraiteriqui, ineatiiro itasorenca Tasorentsi ishiquaireacaapaquero mencori. ¹¹Ari iquenquetsatacaajiri Tasorentsi Moiseshi, icantiri:

¹²—Noquemaquero icantaqueri pishanincapee, meeca pincantajeiteri: ‘Ariorica irishaavijiiteanaque catsirincaiteri, nompajeitempi vatsatsi poajeiteari. Aisati ariorica onquitaiteamane, nompajeitempiro tanta poasanojeitea pinquemasanojeitea. Impoiji piotasanojeitanaque narotaque Tasorentsisanori Pitasorentsite.’

¹³Ari ishaavijiiteanaque catsirincaiteri, irosati ipocajeitantaca contonapee. Itsoteajeitapaquero maaroni isavicajeitaquenta ivancopeequi. Aisati oquitaiteantamanajari ineajeitamanatiro cajashiiteri

oshoncanacari maaroni isavicajeitaquenta. ¹⁴Opirijaiteantanajari, irosati oconijaitsoquijaniquiyetantanaca maaroni saiteriqui; oquempevetacaró sharaca. ¹⁵Ineajeitantarori oquitamaroporoquijeitaque, iro cantaincha te iriojeiteroji. Irosati icantavacaajeitantanaca: “¿Jaocampa ojitari oca?” Ari icantanaqueri Moisesi:

—Irotaque ipajeitaqueeri Tasorentsi avajeiteari. ¹⁶Jero oca icantacantiri amoncarajeiteri: Ocameetsati paanontajeitea poajeiteari quitaiteriqui, pimoncaratanontaquea jaocarica picarayeti pivancopeequi. Ocameetsati paanontajeitea ariorica oncarate apite covitijaniquiqui ari nianqui, iraaquete aparopee atiri.

¹⁷⁻¹⁸Ari imajeitaquero yaanontajeitaca, aparopeeni aanontayetaíncha quimota, irio itsipapee capichamaaji, ocarati icantacantaqueri. Yora aanontayevetaínchari quimota, te ontimaarantimotanajeriji, irintiquea yora aanontainchari capichaji, te oncoiteimoteariji. Tempa icoyeanontajeitaca ocarati iroyeari.

¹⁹Irosati icantajeitavetacarari Moisesi:

—Eiroyea poanontajeitavajatsi poajeitamanajeari osaitequera.

²⁰Iro cantaincha ainiro aparopee caari quemisantajeiterine, yoanontajeivetanaja. Ineajeitamanatiiro shitipatsatanaque, ijaanacaro quenitsi. Ineacotantariri Moisesi, irosati iquishmentantarari.

²¹Icantani maaroni quitaiteripeequi icoyeanontapinijeita capichaji quitaite ocarati yoapinijeitari. Tempa ineapinijeitaquero oshequi ovejaapinita ariorica irijenoquitapaaque catsiríncaiteri.

²²Iroquea caratapaatsiri 6 quitaiteri, yaanontitajeitavaca quimota, irimoncaratantarori apite quitaiteri. Ari ineacojeivetacarari yora jivatacaajeitiriri, irosati ijatashitantavetacarari Moisesi icamantacojeivetapaacarari. ²³Iro cantaincha icantavaqueri:

—Jee, cameetsataque yantajeitaqueri. Irotaque icantacantiri Tasorentsi. Tempa osaitequera irotaque quitaiteri inashitacaacarari, ampincatsajeitantariri. Ocameetsati meeca pintashinontitayetea aisati pinconontitayetea quimota ocarati picoacayetari. Impojiji pinquempoyeajeitero timaaranontayetapaatsiri ashi osaitequerani.

²⁴Ari iquemisantajeitaquero icantaqueriri Moisesi, iquempoyeajeitaquero cameetsa. Te oshitipatsateji aisati te irijaajeitearo quenitsi. ²⁵Ari oquitaiteamanaque irosati icantajeitantanacarari:

—Meecaquea avajeitearo, tempa irotaque inashitacaacarari Tasorentsi oca quitaiteri ampincatsajeitantariri. Eiro meeca aneajeitamanajirotsi.

²⁶Tempa ocarati 6 quitaiteri acoyeanontapinijeitantari. Iro cantaincha ora caratapaatsine 7 eiro otimitsi; tempa irotaque amaoreajeitanteari.

²⁷Ainiro caari quemisantatsi, isotoajeivetanaca incoyeajeitantajeameri. ²⁸Iro cantaincha tecatsi irineajeitapee. Oca yantajeitaqueri te onimoteriji Tasorentsi. Irosati icantantarari Moisesi:

—¡Jaoca oncarate pojocajero pitseencajeitiro nocantajeivetaquempiri aisati noamevetaquempiri! ²⁹Pinquenqueshirejeitero naro Tasorentsi paquempirori aparo quitaiteri pimaoreajeitanteari; irotaque ora quitaiteri caratapaatsiri 6 nopantimpirori poajeiteari pimoncaratantearori apite quitaiteri. Iroquea sietetapaatsiri quitaiteri, aparopeeni pisavique pivancoqui, eiro pisoquijajeititsi.

³⁰Ari omoncaratapaaca quitaiteri, irosati imaoreajeitantanaca.

³¹Oca yoapinijeitacari ipajitaquero maná.

Oquitamaroitsoquijaniquiyetaque oquempyevetacaro fariña. Iro cantaincha pochajuqijaniqiiitaque oquempetacaro cayeta iconoyeetiri ija pitsi.

³²Ari icantajiri Moiseshi ishanincepee.

—Jeroica icantacantiri Tasorentsi: ‘Pijaye aparo covitijaniquiqui moncaratachari apite litro, impoiiji pinquempoyeacoyetero. Irotaque ponijaajeiteriri pishanincajeitajeari coajicani, iriojeitantanaqueari queario irotaque nopapinijeitaquempiri aca caaraiteriqui namantajeitajimpiri Egiptoqui. Tempa irotaque poapinijeitacari.’

³³Ari icantiri iriori irirenti:

—Pijaye avirori maná, aparoni covitijaniqui pinquempoyeacotasanotero. Impoiiji poyeero coajicani Pancotsiqui Irinanteari Tasorentsi. Irotaque ponijaajeiteriri ashanincajeitajeari coajicani.

³⁴Ari imataquero icantaqueriri Tasorentsi Moiseshi, ijaaque covitijaniquiqui iroyeri coajica Cajóqui ontimanteari Icantacantiri Tasorentsi, aitaque inquempoyeacoterori.

³⁵Yora ishanincajeitaniri Israel, icantani yoapinijeivetacaro maná ocarataque 40 osarentsi irosati yareejeitantacaro ovecaratapaaca quipatsi Canaán.

³⁶Ora covitijaniqui omoncarataro apite litro. Icantiro irineanequi iriori hebreo “gomer.” (Ora caratatsiri 10 gomer omoncarataro aparo efa.)

Ocontejataque nija imperitaqui

(Núm. 20.1-13)

17 ¹Yanijeitantanajarori caaraiteri Sin ishanincajeitaniri Israel, imoncarataquero icantaqueriri Tasorentsi. Jentsiquero icantajeitanaja, irosati yareejeitantacaro Refidim, iro cantaincha te aneroji nija. ²Irosati icantimentantajeitacari ishanincepee Moiseshi, icantajeiti:

—¡Pimpajeitenata nija nirajeiteri!

Ari yacanaqueri iriori Moiseshi:

—¡Paita pamanantapinijeitanari narori! ¡Paita caari pishirejeitantari Tasorentsi, pineantajeitacari!

³Oshequi, aasanojeitaqueri ishanincapee imire, irotaque iquisatsajeitantajariri aisati icantajiri:

—¡Irompa paajeitantajantanari anta Egiptoqui, paacantajeitena nomire! ¡Picoaque poamaajeitena maaroni, aisati notomipee jeri novirapee!

⁴Irosati yaventantacari Moiseshi Tasorentsi, icantiri:

—Notasorentsite, ¿jaoca noncantajeiteriri yoca atiripee? ¡Irotaintsi impichaajeitena!

⁵Ari yacanaqueri Tasorentsi, icantiri:

—Pijate pijivajeitanaqueri, pintsipajeitanaqueari aparopee jivatacaajeitiriri. Aisati paanaquero pinchaquiire pipasaajatantacarori chapinqui nija Nilo. ⁶Ari nooyempiri anta toncaariqui Horeb imperitaqui. Pimposapempero pinchaquiire imperita, osotoaajatantanaqueari nija irirajeiteri atiripee.

Aitaque icantaquerori Moiseshi, imoncarataquero icantaqueriri Tasorentsi, ineajeitaquero jivatacaajeitiriri ishanincapee. ⁷Irosati ipajitantacaro Moiseshi ora quipatsi Meribá, tempa aitaque icantimajeitaqueriri. Aisati ipajitaquero Masá, tempa aitaque ineantajeitacariri Tasorentsi, icantantacari: “¿Icarajeitaqueempa Tasorentsi? ¿Tempa incarajeiteeji?”

Imanajeitaqueri Amalec ishanincajeitaniri Israel

⁸Yora ishanincapeeni Amalec ijatashijeitaqueri ishanincajeitaniri Israel anta Refidim, irimanajeitantavaqueariri. ⁹Irosati icantantari Moiseshi Josué, yora jivatacairiri manajeitachari:

—Pincoyeajeite acarajeitica, pijajeite pimanajeitavaqueri ishanincapee Amalec. Naroquea jatamanatsine toncaariqui, naanaquero ninchaquiire icantaquenari Tasorentsi.

¹⁰Ari imoncarataquero Josué icantaqueriri Moiseshi, irosati ijatacaajeitantamanacari. Ari iquenanaque iriori Moiseshi anta toncaariqui, itsipatanacari irirenti Aarón jeri Hur. ¹¹Ari yoancapaaquero Moiseshi iracojempequi, irosati yanaacojeitantacari ishanincapee Israel yora ishanincapeeni Amalec. Iro cantaincha yora Moiseshi imaojempequitapaaque yoarianajiro iraco, yanaacojeitaqueri iriori Amalec. ¹²Ari icatsiquiitapaaque, irosati yaantacanari Aarón jeri Hur mapi irisavicanteari. Impoiji yoancajempequitaqueri irampatequi, irio itsipa iracosanoriqui, caari ipariavacotantaja, irosati ishaavijiiteantanaja catsirincateri. ¹³Irosati Josué yoarantaitiri manajeivetachari ishanincapeeni Amalec; yanaacotasanojeitaqueri.

¹⁴Irosati icantantacari Tasorentsi Moiseshi. Icantiri:

—Pisanquenatacotero oca yantajeitaqueri pishanincapee, inquenqueshireacoyeetantariri. Aisati pincerari Josué: ‘Nontsoncasanojeitajeri catsini Amalec.’

¹⁵Irosati yoirincantapaaja. Ari yovetsicacantapaaque altar ipajitaquero: “Iriotaque Notasorensite Anaacotantatsiri.” ¹⁶Aisati icanti:

“¡Iriotaque Tasorensi, anaacotantatsiri!
¡Iriotaque tsoncajeiterine ishanincajeitaniri Amalec
aisati irishanincajeivetajeari coajica!”

Ipcashitantacariri Jetró Moiseshi

18 ¹Yora Jetró, antaveetiniriri Tasorensi anta quipatsiqui Madián, iriconquiri Moiseshi, iquemacotaquero maaroni imatacaaqueeriri Tasorensi itineri aisati ishanincapee, yoimishitoajeitajiri Egiptoqui. ²⁻⁴Yora Moiseshi itianquitajaro ijina Séfora osaviquimotapaajiri iri jeri apitetatsiri itomi. Yora jivatatsiri itimi ipajitaqueri Guersón; tempa icanti: “Naro pashinisati atiri, caari nonampi oca quipatsi.” Irio itsipa ipajitaqueri Eliézer. Icanti aisati: “Yora Tasorensi ipincatsatiri apa, iriotaque amitacotaquenari aisati oavisaacotaquenari iroacantantenameri pincatsari.”

⁵Yora Moiseshi isavicajeitantapaacari caaraiteriqui iquempejitapaacaro toncaari inashitacaari Tasorensi. Irosati ijatashitantacariri Jetró irineavajeri. Itsipatanajaro ijina Moiseshi jeri apiiteroqueti otomi. ⁶Icantapaaqueri: —Naro piconquiri Jetró. Nopoqui noneavajempi. Namajimpiro pijina jeri aisati apiiteroqueti pitomi.

⁷Irosati isotoantanaca Moiseshi yovetsatavacari. Yoivotashitapaacari aisati inintavorotapaaqueri. Irosati iqueacantajeitanacari ivancojaniquiqui. ⁸Ari icamantayetavaqueri maaroni jaoca icantajeitaqueriri Tasorensi pincatsarini aisati egiptosatipee yoashinoncaajeitantacariri, yamitacotantacariri ishanincapee Israel. Jero maaroni pomerentsitimoyevetacariri nianquipeequi avotsi aisati jaoca icantacariri Tasorensi yoavimanasaacojeitantacariri.

⁹Ari iquimoshireventasanotaqueri Jetró Tasorensi. Tempa icavintsasanojeitaqueri ishanincapee Israel yoavisaacojeitantajariri, yoashinoncaasanojeivetacariri egiptosatipee. ¹⁰Icantanaque:

—Icameetsasananotiri Tasorensi, iriotaque matacayetaquempirori poipacaacoventantajariri pishanincapee Egiptoqui, iperanajeitantavetacaririniri pincatsari. ¹¹Meecaquee notasanotaquero, tecatsi catsini quempetearine Tasorensi; yanaacoyetiri ijitasorensitashiyevetari.

¹²Ari yaaque Jetró aparo virantsi, itaasanotaqueneri Tasorensi ipincatsataqueri. Impoiji yaaque pashini yoaqueneriri. Impoiji yora Aarón jeri maaroni jivatacaajeitiriri ishanincapee, ijajeitaque iroajeitea, incarajeiteri iriconquiri Moiseshi, iroimojeitantariri Tasorensi.

Icoyaeque Moiseshi jivatacantayetatsineri

(Deut. 1.9-18)

¹³Ari pashiniqui quitaiteri isavica aisati maaroni manajeivetacharimanaque Moiseshi iroameetsajeitantajeneriri

ishanincapee; yantaqueri paitapeerica pomerentsitimoyetiri aisati yantavacayetarica. Icatiaacaajeitamanacari irosati ishaavijijatashiyetariri.

¹⁴Ineantacariri Jetró icatiacaajeitacari, irosati isampitancacari:

—Nioti, ¿paitaquea pantacaajeitiriri pishanincapee icatiajeitamanaca, meeca ishaavijiitacojeitaquempi? Avintiquea savicaintsi.

¹⁵Ari yacanaqueri:

—Te nontsataashiteaji nosavique. Tempa ipocashijeitana icamantayetanaro paitapeerica pomerentsitimotariri, noncantacoventeariri Tasorentsiqui. ¹⁶Ariorica ompomerentsitimojeiteari iquisavacaajeita, ipocashijeitana. Nosampitancacari: ‘¿Jaanica poneacantacarori?’ Impoijiquea notacaasanojeiteri icantacantayetiri Tasorentsi.

¹⁷⁻¹⁸Irosati icantancacari iriconquiri:

—Te oncameetsateji oca pantaqueri, ario pimaotanaque aisati imaojeitanaque iriori pishanincapee. Eiro pamavetirotsi, aisati eiro pimatirotsi apaniro poameetsajeitero pomerentsiyetachari. ¹⁹Pinquemisasantanotero oca noncantempiri, Irio amitacotempine Tasorentsi. Aviro cantacoventerine Tasorentsiqui paitapeerica pomerentsitimoyetariri. ²⁰Aviro poametasanoteri maaroni icantacantayetiri, irotaque piotacaasanojeitancacari jaoca incanteari irisavicajeitancacari cameetsa aisati paitapeerica irantayeteri. ²¹Iro panteri meeca. Pincoyeajeite coasanotatsiri irijivatacante: pincatsatiriri Tasorentsi, neanatsatsiri cameetsa, caari coasanotatsi impinayeeteri quimota. Pincoyeajeite jivatacaajeiterine apatotashiyetainchari pishanincapee carajeitatsiri 1,000 aisati pashinipee jivatacaajeiterineri apatotashiyetainchari carajeitatsiri 100 jeri pashinipee jivatacaajeiterineri apatotashiyetainchari carajeitatsiri 50, irio pashinipee jivatacaajeiterineri apatotashiyetainchari carajeitatsiri 10. ²²Iriojeitaque oameetsajeitenerine paitapeerica pomerentsitimojeitariri. Irompa iroorica pomerentsitasanotachari, ocameetsati impocashijeitempi poameetsayetantajanariri. Iroquea caari pomerentsitasanotacha iriojeitaque oameetsajeitajenerine iriotaque amitacojeitempineri, iroquea opomerentsitimotasanotantajimpitsi. ²³Ariorica pimataquero oca, aisati icoacaquempirorica Tasorentsi, aitaque pamavetaquero. Aisati irineacameetsajeitanaquero pishanincapee inquimoshirejeitanaque; cameetsa irijajeitanaje ivancopeequi.

²⁴⁻²⁵Ari iquemisantaquero Moiseshi icantaqueriri iriconquiri, irosati icoyeantajeitaca jivatacaajeiterine ishanincapee apatotashijeitainchari carajeitatsiri aparopeeni 1,000, 100, 50 aisati 10. ²⁶Ari imajeitaquero yovetsicayetiniri ishanincapee pomerentsitimoyetariri. Iroquea pomerentsitasanoyetachari, irio Moiseshi vetsicajeitiniriri irinti. Iroquea caari pomerentsitacha irotaque yovetsicajeitiri iriori. ²⁷Avisanaque

aparopee quitaiteri, irosati yovetsatanajari Jetró itineri, ipianajaro inamp iqui.

Yareetacaro ishanincajeitaniri Israel toncaari Sinaí

19 ¹⁻²Yora ishanincajeitaniri Israel yojocajeitaquero nampitsiqui Refidim. Ari intacaro mavatatsiri cashiri isoquijajeitancariri Egiptoqui, yareejeitaquero caaraiteri Sinaíquiniri. Aitaque ivancojeitapaacari, imontetacotapaacaro toncaari.

³Ari itoncaanaque Moiseshi toncaariqui inquenquetsatacanteariri Tasorentsi. Ari icantaqueri:

—Pincamantajeitajeri maaroni ishanincajeitaniri Jacoboni, yora ipajitari Israel. ⁴Avirojei pineajeitaquero noashinoncaajeitancariri egiptosati aisati namajeitajimpi aca preejeitancari.

Noquempevetacari antearitatsiri paquitsa yaracairi irijani. ⁵Ariorica pinquemisantasanojeitaquena aisati pimincarataquerorica maaroni nocantacantiri, noncanteani noshanincatajeari. Nopincatsariventiri maaroni timayetatsiri, iro cantaincha avirojei apaniro noncoyeajeiteri. ⁶Avirojeitaque pincarajeitenane; nompeajeitempi antaveetapinijeitenaneri, pimpincatsatantenari, aisati noshanincepee nonashitacayeari.’

Irotaque pincamantajeitapeeriri maaroni pishanincepee.

⁷Ari yapatotapaaqueri jivatacaajeitiriri ishanincepee, icamantapaaqueri maaroni icantaqueriri Tasorentsi. ⁸Irosati icantajeitantanaca:

—Jee, aitaque amoncarajeitaquero maaroni icantacantaqueri Tasorentsi.

Irosati itoncaantanaja Moiseshi icamantajiri Tasorentsi icantajeitaqueri maaroni ishanincepee. ⁹Ari icantajiri Tasorentsi:

—Coraquenayea nonijayempi mencoriqui tsitenishaatsiri, inquemantenari pishanincepee nonquenquetsatacayempi, irotaque incanteani inquemisantasanojeitantanacuempiri.

Ari yapiitajiniri Moiseshi Tasorentsi icantajeitaqueri ishanincepee.

¹⁰Ari icantajiri iriori:

—Pimpianaje meeca pincamantapeeri pishanincepee irovetsicajeiteata meeca aisati osaitequera, inquivajeiterota iitsaarepee impincatsajeitantenari. ¹¹Avisanaquerica apite quitaiteri, pineajeitena maaroni naniiree toncaariqui Sinaí. ¹²Aisati poacantapeero mapiqui ovecaratapaaca toncaari. Pishoncacantaquero maaroni, iriotantearori atiripee eiroquea yavisajeitantarotsi. Pincantajeiteri ocameetsati impincatsajeitero, eiro catsini itoncaajeititsi aisati eiro iquempejijeitarotsi. Jaanicarica quempejitaquearone, poacanteri. ¹³Jaanicarica pamitashitearone toncaari, ocameetsati pimpichaanatacanteri, teerica, pinquentacanteri. Omavetaquea iriorica virantsi, ocameetsati

poacanteri. Aintiquea ariorica inquemaquero tiorentsi, aitaque inquempejijeitapemparori ovecaratapaaca otantotacotaca.

¹⁴⁻¹⁵Irosati yoirincantapaaja. Ari icamantapaajiri jivatacantajeitatsiri, icantiri: —Pivetsicajeitea, irotaintsi ampatotimentajeiteari Tasorentsi ampincatsatanteariri. Eiroyea poonaitayetajarotsi pijinapee.

Ari iquemisantaqueri, irosati iquivajeitancaro iitsaarepee. ¹⁶Ari omavatapaaque quitaiteri, irosati intantanaca iporecaporecatamanaque aisati antearoite otireatireatamanaque. Aisati aniireapaaque toncaariqui mencori tsitenishaasanotatsiri. Aitaque otimapaqueri. Irosati iquemantacaro antearojenca tiorentsi, omintsaroajeitaqueri atripee. ¹⁷Irosati yaajeitantanacari Moisheshi maaroni ishanincapee iquempejijeitapaacaro toncaari, yapatotimentajeitapaacari Tasorentsi. ¹⁸Ari ocachaajencatanaque toncaari, tempa yaniireapaaque Tasorentsi itimantapaacaro paamari. Aiquero catsini ocachaajencatasananaitii quempetanaca taaveerentsi aisati antearoite onicanaca toncaari. ¹⁹Aisati aiquero antearojencatanaqueri catsini tiorentsi. Irosati iquenquetsatacantacari Moisheshi Tasorentsi. Ariorica yacanaqueri iriori, iquempetacaro otirei.

²⁰Yaniireantapaacari Tasorentsi ochoviinaquitapaaque toncaari, irosati icantantacari:

—Caate, pintoncaapaaje pincaratena aca.

Irosati ijatantaca. ²¹Ari icantavajiri:

—Poirincanajea pincantapeeri pishanincapee. ‘¡Eiro catsini yavishirotsi otanto inquempejitantearori toncaari! ¡Te noncoacayeriji irineena, icamajeiticari!’ ²²Aisati inquempejiteaquea antaveeyetanari, ariorica inquempejitapinitena, ocameetsati irovetsicashirejeitea, eiroquea icamajeitantatsi.

²³Irosati icantantanacari Moisheshi Tasorentsi:

—Tempa picantasanotaquena: ‘Eiro itoncaajeitirotsi pishanincapee.’ Aisati picantasanotaquena. ‘Pintantotacantantayetaqueroyea mapipee. Tempa pinashitacaasanotacaro toncaari.’

²⁴Ari icantanajiri iriori:

—Pimpianajetsita meeca, impoiiquea pintoncaapaaje aisati. Pintsipataqueari pirenti; irintiquea yora antaveetanari aisati maaroni pishanincapee, te noncoacayeriji iravisajeitapeero otanto, notsoncajeitiricari.

²⁵Irosati yoirincantapaaja Moisheshi, icamantapaajiri ishanincapee icantajiriri Tasorentsi anta toncaariqui.

Ocarati 10 icantacantiri Tasorentsi

(Deut. 5.1-21)

20 ¹Jero icantiri Tasorentsi:

²“Narotaque Tasorentsisanori Pitasorentsite, oipacaacoventajimpiri iperanajeitantavetaquempiniri egiptosati.

- 3 “Eiro itimitsi pashini pintasorensiteteari; tempa apaniro noni.
- 4 “Eiro catsini povetsicayetitsi pishiacantantayeteariri paitarica pineayeteri inquitequi aisati timayetatsiri quipatsiqui jeri timayetatsiri incajarequi; eiro pijitasorensiyetiritsi. 5 Eiro catsini poivotashitaritsi pimpincatsajeitantariri. Tempa narotaque Tasorensisanori Pitasorensite tsaneacojeitaquempiriri. Ariorica pimpiatsatena, noashinoncaajeitempi aisati nonquempeteri pitomipee, picharinepee jeri intomintajeitajeari iriori. 6 Iro cantaincha, ariorica irinintajeitena inquemisantajeitena aisati irimoncarajeiterorica nocantacantiri, noncanteani nonintasanajeiteri. Aisati nonquempejeitajeri irishanincajeitajeari iriori.
- 7 “Eiro pineaveetacotashitarotsi novajiro; tempa narotaque Tasorensisanori Pitasorensite. Aitaque iroasanquetamentaqueri neaveetacotashitearone.
- 8 “Pinquencheshirejeitero ora quitaiteri nonashitacaacari pimacoreanteari; irotaque pimpincatsatapinijeitantenari.
- 9 Oncarate 6 quitaiteri pantaveejeitanteari paitarica pantayeteri.
- 10 Iro caratapaatsine 7, irotaque pimaoreajeitanteari; nonashitacaacari pimpincatsajeitantenari. Tempa narotaque Tasorensisanori Pitasorensite. Eiro catsini pantaveetacaajeitiritsi pitomipee, pishintopee, pinampirepee jeri pashinisatipee saviquimojeitimpiri, aisati iriori pivirapee. 11 Tempa ocarataque 6 quitaiteri novetsicantacarori inquite, quipatsi jero incajare aisati maaroni timantayetarori. Iro cantaincha caratapaatsiri 7, irotaque notasoncaventantacarori aisati nonashitacaacaro.
- 12 “Pimpincatsateri piri aisati piniro. Irotaque paneanteari osamani, pisavicajeitanteari anta quipatsiqui nompajeitempiri.
- 13 “Eiro poantitsi.
- 14 “Eiro paimentarotsi pijina. Eiro paimentaritsi pijime.
- 15 “Eiro picoshititsi.
- 16 “Eiro pitseeyacotashitaritsi pishaninca pincantacantashitanteariri.
- 17 “Eiro pinevetitayetaritsi ijina pishanincepee, inampirepee, ivacatepee, iraashinotepee, aisati maaroni timimoyetiriri ivancopeequi.”

Itsaroacantacariri ishanincajeitaniri Israel Tasorensi
(Deut. 5.22-33)

18 Maaroni ishanincajeitaniri Israel, iriojeitaque neaquerori otireatireatanaque aisati porecatsiri jero tiorensi. Aisati ineajeitaquero ocachaajencatantanacari toncaari. Irotaque itsaroajeitancari catsini, caari iquempejjeitantaro. 19 Aisati icantantacariri Moisesi.

—Aviro quenquetsatacayerine avinti, impoiijuea pincamantajeitenaro icantaquemperi Tasorentsi. Ari nonquemisantajeitaquempi. Te noncoyeji irineanatena iriori, nocamajeiticari.

²⁰Ari icantanaqueri Moisesi iriori:

—Eiro pitsaroacaajeitaritsi Tasorentsi, iro yonijaajeitantaquemperi iriotacaajeitantempiri pincanteani pimpincatsajeiteri, eiro pantimotantaritsi caari cameetsatsi.

²¹Ainiroquera icatijajetaca ishanincapee, irosati ijatashitanacaro Moisesi mencori tsitenishaatsiri inaquentas Tasorentsi.

Icantacantiro Tasorentsi irovetsicantearori altar

²²Ari icantaqueri Tasorentsi Moisesi: “Pincanteri maaroni pishanincapee, “Tempa aitaque pineajeitaquenari noquenquetsatacaajeitaquempi inquitequi. ²³Eiro pivetsicashiyetatsi oro, iroorica plata pimpincatsatanteariri, pinquempetacantantenari naro pipincatsataque. ²⁴Nocoaque paye quipatsi pivetsiquena altar. Impoiji pamaquenari povishate aisati pivacate, pintaarantasanotenari aisati poaranteari naacameetsajeitantajempiri. Noncanteani nontasoncacoventajeitempi jaocarica noncoacaajempiri pinquenqueshiretajena, pimpincatsajeitantapaajenari. ²⁵Iroorica povetsique mapipee, eiro poameetsayetavaquerotsi. Ariorica poameetsatantaquearo ashroyetatsiri, eiro noneacameetsatirotsi. ²⁶Irointiquea cameetsa piveviricaayetaquero. Eiro catsini anaayetatsi oshianacarocari ataimentotsi, eiroquea pimatantatsi pantaite ineanteetimpicari.’ ”

Icantacantiro irimoncarajeiteri peranantachari

(Deut. 15.12-18)

21 ¹Jero otsipa icantacantiri Tasorentsi:
²“Ariorica pamananteri aparo pishaninca pimperanantanteariri, oncarate 6 osarentsi pantaveetacayeri. Iroquea caratapaatsine 7, poimpacaajeri. Eiro ipinacovenantanajatsi irijatashitajea. ³Iriorica caari timatsi ijina, irijataje apaniro. Irompa yamaquerorica ijina, ocameetsati iraanajero. ⁴Irompa ariorica impacaaqueri nampitavacariri ijina, intimacaaquerorica itomi, iroorica irishinto; icoapaajirica irijataje, ocameetsati irojocajeitanajeneri. Irijatajeta apaniro. ⁵Irompa teerica incoye irijate, tempa inintiro ijina jeri itomipee, aisati inintiri nampitariri; ⁶ocameetsati iraanakeri nampitariri anta Nonanteariqui, yoashinampiyetiroriqui iqueantapinitarori; irisatayeri iyempitaqui. Irioyeetanteariri incanteani irinampitasanteari.

⁷“Itimirica shirampari pimanteroneri irishinto irinampiyeeetantearori, yora aavaqueroneri eiro ishinetajirotsi ojataje ariorica

omoncaravetapempa 6 osarentsi. Eiro iquempetacantiritsi shirampari ishinetiri irinti. ⁸Yora nampitarori, teerica incoyeji irijinanteoro, ocameetsati incanteri iri impinaventajero iraantanajearori. Eiroquea ipimantirotsi pashiniqui atiri. ⁹Irompa ariorica impacaaqueri itomi, ocameetsati inquempetacantajero irishintosanori. Eiro iperاناتانajarotsi. ¹⁰Ariorica iraja otsipa ijina, eiro imanintanaquerotsi yaitari. Ocameetsati quiso iroyero, irimaacotero aisati impero oitsaare jero oyeari. ¹¹Iro cantaincha, eirorica imoncaratinirotsi ocapee, ocameetsati irishinetero ojataje, Eiro opinacoventanajatsi ojatashitajea.”

Icantacantiro jaoca incanteeteriri antayetirori covencayetatsiri

¹²“Itimirica oantashiyetachaneri, ontimatiye iroyeetajeri iriori. ¹³Irompa teerica intsataashitearaji, tempa naro shinetaqueriri incame, Naro cantatsine coajica jaocarica nonashitacayeanariri nampitsi iraventeari; eiroquea yoanteetaritsi. ¹⁴Iriorica quisanentashitariri ishaninca, tecatsirica irantavetea, iroashitaquearirica; aitaque incoacoayeetanaqueri iriori. Irishiavetanaquearica iraventapemparo altar, ariorica irineetajeri; ontimatiye iroyeetajeri iriori.

¹⁵“Jaanicarica posherine iriri iroorica iriniro, otimatiye iroyeeteri iriori.

¹⁶“Aisati jaanicarica aashiyetearine ishaninca, ariorica impimantaqueri, teerica, iperاناتacari; ontimatiye iroyeeteri.

¹⁷“Aisati inquempetea tseenquimatiriri iriri jero iriniro; ontimatiye iroyeeteri.

¹⁸⁻¹⁹“Aisati inquempetea antavacaachari, ariorica imposantaqueari mapi itsipa, teerica, incapojaqueri irojoquitanaquearica imaamentoqui; yora capojaqueriri tecatsi incanteeteri, tempa yora iposaqueri aniitanaji capichaji yaniitantajaro irinchaquiere. Irointiquea impinatajeri ipeacaaqueri irantaveere aisati impinacoventajeri ocarati ovinaro yaavintacantaca.

²⁰“Intimerica perاناتantachaneri ariorica impasataqueri inchaquiqui iveranaro: iriorica shirampari, teerica tsinane, iroaqueririca, ontimatiye iroashinoncaimenteeteri. ²¹Irompa eirorica icamitatsi, intimanajerica aparopee quitaiteri, eiro yoashinoncaimenteetiritsi; tempa iriotaque irashi iveranaro.

²²“Ariorica irantavacaimotearo shirampari tsinane tsomontetatsiri, imposatsomontetapaaquerorica, iro cantaincha eirorica ocamitsi, irojocacaashitaquearorica; ocameetsati impinatajeri ojime jaocarica oncarate incoacotajeri, aisati jaocarica incante yora cantacoventantatsiri.

²³Irompa ariorica iroamaaquero, inquempyeetajeri iriori; iroyeetajeri.

²⁴Yora quitsoreajatantatsine, inquitsoreajaquieetajeri iriori. Yora ajireitantirori ajitsi, irajireiteetajeri iriori. Yora posantatsine,

imposheetajeri iriori. Yora paatiatantatsine, impaatiayeetajeri iriori.
 25 Yora taantatsine, intayeetajeri iriori. Yora satantatsine, irisatayeetajeri iriori. Yora pasatantatsine, impasayeetajeri iriori.

26 “Yora posajaquiterine iveranaro, iriorica shirampari, teerica tsinane, yamashijaquitaqueririca, ocameetsati irishinetajeri irijataje, irotaque ompinatanajeari yamashijaquitaqueri. 27 Aisati ijireitaqueririca iraji, ocameetsati irishinetajeri irijataje, irotaque ompinatanajeari yajireitaqueri.”

Icantacantiro avishimoyeteririca covencatatsiri

28 “Intimerica viratachane vaca catsimari, irisataaqueririca atiri, ariorica iroamaaqueri; ontimatiye impichaanayeeteri iriori irosati incamantaquea. Ora ivatsani eiro yoyeetarotsi. Yora ashitariri tecatsi incanteeteri. 29 Irompa iovetaririca oshequi isataanti, teerica incoyeji irashitacoteri; ontimatiye impichaanayeeteri irosati incamantaquea, aisati inquempyeetaqueri iriori ashitariri. 30 Teerica incoyeji iroyeeteri, ocameetsati irointi impinatajeri yora ishaninca camaintsiri jaocarica incantaqueri cantacoventantatsiri. 31-32 Aisati inquempetea iriorica irisataaque jananequi, iroorica tsinane, aisati iriorica irisataaque nampirentsi, teerica, tsinane; yora ashitariri vaca ocameetsati impinatajeri nampitariri incarate 30 imentaqui quireequi. Impoiji impichaanateri vaca, irosati incamantaquea.

33-34 “Intimerica quianatatsine yaajatantari nija, ipeacotanacarorica irashitanajero, inquenapaaquerica vaca iriorica aashino intetapaaquearorica; ariorica incamaque, ontimatiye impinatajeri quireequi ashitariri, irosati iraantavaqueari.

35 “Intimerica ashiyetachaneri vaca, ariorica irisataaqueri itsipa, incamaquerica; yora oamantaintsiri ocameetsati impimanteri, impoiji impaarantajeriri iriori quireequi ashitariri camaintsiri. Aisati inquempetaqueri ivatsa camaintsiri, impaarantaqueri iriori. 36 Irompa ineapinivetaririca isataavacaapinita, teerica incoyeji irashitacotapiniteri; ocameetsati iroimpiajeneri pashini, irioquea iraavajeri iriori camaintsiri.”

Icantacantiro irovetsicayeteneri antayeterone covencatatsiri

22 1 “Intimerica coshiterine ishaninca ivacate, ariorica iroaqueri, teerica, impimantaqueri; ontimatiye iroimpiajeneri incarate 5. Irompa iriorica incoshitaqueri irovishate; ontimatiye iroimpiajeneri incarate 4 ovisha.

2 “Yora coshitatsine ariorica irineetaqueri incoshitaque tsiteniriqui, ariorica iroyeetaqueri; yora oavaquerine te intsataashiteariji, eiro icantajeitiritsi ishanincapee irinti oantatsiri. 3 Irompa ariorica iroavaqueri quitaiteriqui, aitaque irijiyeeetaqueri oantatsiri.

“Intimerica coshitatsine, ontimatiye impinatajero ocarati icoshitaqueri. Iro cantaincha teorica aneeriji iireequite, ocameetsati impimanteeteri impinatantajearori.

4“Irompa ariorica irineacoyetaqueri virantsi icoshitaqueri, teorica, iroyeriji; ontimatiye iroimpiajeneri apite, iriorica vaca, aashino jeri ovisha.

5“Intimerica omishitoayerine ivirapee, ariorica irijayetanaque otsipapeequi ivaashitote ishaninca, teorica, iroantsitequi otiminta irovamashite; ariorica iraatiquitayetapaaqueri, ocameetsati impinatajari.

6“Intimerica taaveeyetatsine, ariorica ojayetanaque quitotsemashiqui areetanaquearica iroanequi pashini, ontaapaaquerorica ipioyetiri tirico, iroorica iroaquera sampaquiyevetacha; yora taaquerori ocameetsati impinatajari.

7“Intimerica atiri oacayerine ishaninca quireequi, iroorica pinatasanoyetachari, ariorica incoshitacantitaqueri, irineacotavaqueririca aavetacarori; ocameetsati impinatapinitajeri paitapeerica icoshiyetiri.

8 Irompa eiorica ineajiritsi, irosati irantanaqueari yoacaavetanacari anta cantacoventantatsiriqui, incantacoventanteariri anta Nonanteariqui; iriotacanteariri iriorica coshitaqueriri, irompa teorica.

9“Aisati inquempeyeteri aashiyetearone paitapeerica timimoyetiriri ishaninca: iriorica vaca, aashino, ovisha, iroorica quitsaarentsipee, ariorica irineavetajeoro ashitarori, incantavetapemparirica: ‘Irointi nashi,’ ariorica incantanaque itsipa: ‘Caari, irointi nashi,’ irosati iraantanaqueari anta cantacoventantatsiriqui incantacoventanteariri Tasorentsiqui, iriotacanteariri. Yora cantashitainchari ocameetsati impinatapinitajeri paitapeerica yaashiyevetacari.

10-11“Intimerica atiri oacayerine ishaninca ivirapee, iriorica aashino, vaca, ovisha, paitapeerica, iro cantaincha ariorica incamimotaqueri, incarajaquerica, teorica, icoshitacantitaqueri, tecatsirica neerine; yora amenavetanariri ocameetsati incamantasanoteri ashitariri: ‘Te noncoshitempiji, ioti Tasorentsi queario nocantasanotaquempi.’ Yora ashitariri ocameetsati inquemisantero icantasanotaqueriri, eiro icoacotashitajaritsi. 12 Irompa ariorica incoshiyeetaqueri, ocameetsati impinatajari. 13 Irompa iriorica oaquearine maniti, ocameetsati iranaqueneri yoarantacari ironijantapempariri, eiroquea ipinatashitantaritsi.

14“Intimerica atiri canterine ishaninca: ‘Pimpavaquenata aparo pivira irantaveetena,’ iro cantaincha ariorica incamimotaqueri, ocameetsati impinatajari. 15 Irompa ariorica intsipateari ashitariri, tecatsi oncantea impinatajari; irointiquea impinateri ovinaro yantaveetaqueneri.

Icantacantiro icoacaaqueri Tasorentsi atiri irantayete cameetsa

16“Intimerica atiri amatavitirori evancaro caariquera neayetiri shirampari, caari icashia irayero; ariorica irantaquero ocameetsati impinatacoventero

imperi iri ocarati yamejeitari, irosati iraasanotantaquearo. ¹⁷Iro cantaincha yora iri, teerica incoacayeriji impacayeri, ocameetsati impinatajeri irotaque yamejeitari ipinacoventiro caari neayeterine shirampari.

¹⁸“Eiro pishinetiritsi catsini intime sheripariyetatsine, ontimatiye poacantajeiteri.

¹⁹“Intimerica antayeterone virantsipee, ontimatiye poacanteri.

²⁰“Intimerica oayeterine ivira intaanteanariri ijitasorentsitashiyetari, ontimatiye poacanteri. Tempa ocameetsaveta intaasanotenarime apaniro nainti.

²¹“Eiro poashinoncaajeitiritsi pashinisati, aisati eiro piperanatashijeitaritsi. Tempa aisati avirojeitaque pashinisati, pisavicantajeivetacaniri anta Egiptoqui.

²²“Aisati eiro poashinoncaajeitirotsi camajimentaaropee aisati iriori janequpee camayetatsiri iriripee. ²³⁻²⁴Ariorica poashinoncaajeiteri, iraventaquenarica, aitaque nompiacoventaqueari nonquisasanojeitempi avirori. Nontiancajeitempiri oajeitempine, ora pijinapeeni jeri pitomipeeni intimashijeitanaquea iriori.

²⁵“Ariorica incoacotempi quireequi noshaninca coiteavetatsiri saviquimotimpiri, eiro picoacotajiritsi quimota iroanaavajempiri, piquempetaricari ashitaarantincari papinitiriri itsipapee quireequi. ²⁶Irompa ariorica irojocanaquempiro iitsaare, piotanteari aitaque iroimpiajempiri; iro cantaincha ocameetsati poimpiitajejanari irishaavijiiteanajerica catsirincaiteri. ²⁷Tempa irotaque iquitsaatapinitari, caari aantari catsincaiteri. Eirorica poipiitajanaritsi, ¿jaoca inquitsaatanajeari tsiteniriqui? Ariorica iraventaquena, aitaque namitacotaqueri; tempa oshequi nocavintsanti.

²⁸“Eiro catsini pitsenquimatanatsi, tempa naro Pitasorentsi, aisati eiro picantimatiritsi jivatacaajeitimpiri.

²⁹“Ocameetsati pimoncaratero pamapinitenaro ora pivanquirepee pinashitanari jero ovaja.

“Pinashitacayenari pitomipee jivayetatsine intime. ³⁰Aisati pinquempetaquenari iriori irijanipee pivira, iriorica vaca jeri ovisha. Iro cantaincha oncarate 7 quitaiteri intsipatavaquearotsita iriniro. Ariorica omoncaratapaaquea 8 quitaiteri, irosati pimpantajenari.

³¹“Nocoaque pincameetsatasanojeitanaque pinquemisantajeitena, tempa nonashitacaajeitaquempi.

“Eiro poajeitaritsi ivatsa poshiniripee yatsicayetiri maniti; pimperi iroyeari otsitipee.

Icantacantiro irantero cameetsayetatsiri

23 ¹“Eiro picantacotashitaritsi pishaninca, aisati eiro pacacoventiritsi atiri caari cameetsatatsi, pincantacoventanteariri pashini; pacacoventirocari caari cameetsatatsi.

2“Eiro piquempetacotaritsi avirori shequiimentirori irantane caari cameetsatsi. Ariorica pincantacoventasanojeitante cameetsa, eiro pishinetiritsi iroamejeitempi pantajeitantearori caari tampaticatasi. 3 Aisati eiro pamenashitari ashinoncaincari paitarica irantaque caari cameetsatsi.

4“Intimerica quisanentempine ashitachaneri ivacate, iraashinote, impeaquearica; ariorica pineajeri, ocameetsati paanajeneri. 5 Ocameetsati pamitacoteri quishimpiri ariorica pineeri iraashinote impariacaaquero inquijacaayeteriri. Pamitacoteri poaniireacotavaqueri.

6“Ariorica incantacotashiyeeteari coiteaveeyetatsiri anta cantacoventantatsiriqui, eiro pineashitaritsi; ocameetsati irointi pancacoventeri, eiro yoashinoncaashiyeetantaritsi.”

7“Eiro catsini pitseeycotashitaritsi yora caari antavetaro paitapeerica, iroamaashiyeetantariri. Yora tseeeyashitachari, noncantasanoteri: ‘Ainiro pantane.’

8“Eiro pairitsi quirequi poashinoncantariri pishaninca; tempa yora airiri eiro iquenqueshireanajatsi, aisati eiro imatanajirotsi incantacoventeri cameetsa yora caari antavetaro paitapeerica.

9“Eiro catsini poashinoncaajeitiritsi pashinisati atiri. Tempa piojeitaquero avirori yoashinonquejeitaquempi peerani Egiptoqui pisavicantajeivetacari.”

Icantacantiro ontimatiye irimaoreasanojeite

10“Oncarate 6 osarentsi pantaveete aisati pavitasanojeitantearori pivanquirepee. 11 Iro caratapaatsine 7, eiro pantaveejeititajatsi ontimashitavaqueata quipatsi, aisati eiro pavijeititajarotsi poovamashite jero porivomashite. Pishinejeiteri coiteaveeyetatsiri iraviinontajeitavaqueata ontimanteari iroyeari. Jeri aisati iriori poshiniripee, coquiyetatsiri iroajeitearota.

12“Oncarate 6 quitaiteri pantayetantearori paitapeerica. Iroquea caratapaatsine 7, irotaque pimaoreacaajeitanteariri pinampirepee jeri pashinisatipee, ontimantanajeari irishintsiyetanaje. Aisati pinguempetaqueri iriori pivacate jeri paashinote.

13“Pimoncarajeitero maaroni oca nocantaquempiri. Eiro catsini paventashitaritsi ijitasorentsitashiyetari pashinipee, aisati eiro pineaveetacotashitaritsi ivajiroqui.”

Mavatatsiri inquimoshirejeitanteari (Éxo. 34.18-26; aisati Deut. 16.1-17)

14 Icantiri aisati: “Oncarate mava pinquimoshiretapinijeite aparopeequi osarentsi, pimpincatsajeitantenari. 15 Piveshireimentapinijeitearo quitaiteri poapinijeitantarori tanta caari iconoyeeti tapiacaarori. Oncarate

7 quitaiteri poapinijeitantearori. Pimoncaratero nocantajeitaquempiri cashiriqui Abib. Irotaque pinquenqueshirejeitantearori pishitoantajeitanajari anta Egiptoqui. Aisati tecatsi pocashitachane pishaninca, ontimatiye iramajeitaque iriori.

¹⁶“Aisati piveshireimentajeitearo quitaiteri Yaviitanteetarori Panquirensipee Jivatatsiri Osampayeti poanepeseequi, jero aisati Yaviitanteetarori Vecarantarori Osarensipeeseequi, ariorica pintsoncaquero maaroni paviiyetiro pivanquirepee.

¹⁷“Maaroni shiramparipee ontimatiye impocapinijeite Nonantariqui oncarate mava osarensipeeseequi.

¹⁸“Ariorica poyenari pivira pintayenari, eiro pitsipatairotsi iriraja aisati tanta tapiachari. Aisati eiro paavajitsi ireji pintaantamanajearori.

¹⁹“Ora intayetearone oitsoqui pivanquirepee, ocameetsati paayetanaquero Nonantariqui.

“Eiro picotantaritsi chiivojaniqui otsomija iriniro.”

Intianqueneri Tasorensi Moiseshi inampire jivatanajerine

²⁰Icantiri aisati:

“Nontianquempiri Nonampire irojacaacoventajeitanaqueri pishanincapee, cameetsa irareejeitantearori quipatsi nocashiacaajeitaqueriri. ²¹Eiroyea pipiatsataritsi, irointi pinquemisantasanoteri; tempa iriotaque quempetanari. Eirorica piquemisantajeitiritsi, eiro ipeacojeitimpitrotsi paitapeerica pantajeitiri caari cameetsatatsi. ²²Irompa ariorica pinquemisantasanoteri aisati pimoncaratero maaroni nocantasanotaquempiri, naroquea jocaacoventajeitempine, noasanquetaajeiteri quisajeitempine aisati caari aacameetsajeitempine. ²³Yora Nonampire, iriotaque jivajeitanaquempine irajeitanaquempi isavicajeitinta canaaneopee, amorreopee, hititapee, ferezeopee, heveopee jeri jebuseopee; iriojeitaque nontsoncajeiteri. ²⁴Eiro pantajeitirotsi yantajeitiri iriori. Aisati eiro pitiyeroimentajeitaritsi ijitasorensitashiyetari aisati eiro pipincatsajeitiritsi. Irointiquea pimporoquitasanojeiteri aisati pojoquitasanojeiteri imapinepee inashitacaayevetanariri. ²⁵Ocameetsati pimpincatsatasanotena nainti apaniro. Irotaque nontasoncacoventapinijeitantempiri, eiro ocoiteimojeitantimpitsi poayetari aisati pirayeteri.

“Nonijantareacoventempi, eiro catsini opocashijeitantimpitsi mantsiarensipee. ²⁶Aisati nontasoncacoventajeitempi, eiro picamitantajeitatsi. Aisati eiro otimitsi tsinanepesee jocayetatsine aisati shiravaro.

²⁷“Jaocarica pinquenajeitanaque nampitsipeeseequi, noncantacaashireacaajeiteari maaroni quisajeitempine intsaroacaasanojeitant avaquempiri. Antearojenca inajemashijeitanaquea irishiapitsajeitanaquempi.

²⁸Noncomitacaayeari, eiro iojeitanajitsi jaoca incantajeitanaqueari. Aitaque oncanteari irishiapitsajeitanaquempi yora heveopee, hititapee jeri canaaneopee. ²⁹Iro cantaincha eirotsita noshinejeitimpitsi pintsonquitajeiteari, otimashitanajacari iipatsitepeeni; ishequijajeitanaqueari irinti covencayetatsiri yoarantajeitimpicari. ³⁰Nomatacaajeitempi pojocajeitantariri jentsiquero. Arioricaquea intimayetanaque oshequi pitomipee, irosati paajeitanaquearo maaroni iipatsitepee. ³¹Ora quipatsi nompempiri antearoite oni. Oponeanaca incajarequi Quitioncari, irosati antearojaqui incajare Mediterráneo, isavicajeitinta filisteopee. Oponeanaca aisati caaraiteriqui, irosati pashiniqui nija pajitachari Éufrates. Maaroni savicajeitatsiri narotaque matacaajeitempine, pintsoncantajeiteariri.

³²“Eiro paacameetsatacaaritsi aisati eiro pipincatsatashitaritsi ijitasorentsishiyeeetari. ³³Aisati eiro pishinejeitiritsi irisaviquimojeitempi piipatsitequi, yantacaimpirocari caari cameetsatatsi, pantimotanarocari. Ariorica pinquempejeitanaqueari, irotaque omapocantempiri oashinoncantsi pimpeashijeitanteari.”

Icantasanotiri Tasorentsi irimoncaratero icoacaqueriri

24 ¹Ari icantiri Tasorentsi Moieshi:
—Pintoncaapaaje notimaqueca; pincarajeitaqueri Aarón, Nadab, Abiú jeri carajeitatsiri 70 jivatacaajeitiriri pishanincepee. Iro cantaincha eiro iquempejijeitapanatsi, ainti intiyeroajeitapempa nianqui impincatsajeitantapeenari. ²Avintiquea quempejitapeenane, tecatsiyea oijatempine.

³Irosati yoirincantapaaja. Ari icamantapaaqueri Moieshi maaroni ishanincepee icantaqueriri Tasorentsi. Irosati icantajeitantanaca:

—¡Jee, aitaque! ¡Amoncarajeiteneri maaroni icoacaajeitaqueeri!

⁴Irosati isanquenatacotantacaro Moieshi maaroni icantaqueriri Tasorentsi. Ari capichaji quitaite itinaamanaca, yovetsicacantaque altar anta ovecaratapaaca toncaari. Aisati yoayetaquero mapipee ocarataque 12 inashitacaacari, imoncarataqueri icarajeiti ishanincasanoripee itomipeeni Israel. ⁵Ari itiancayetaque aparopee evancari yoajeitaqueri vaca. Aparo itaasanotaqueneri Tasorentsi, irio itsipa itaimentaquerori iraacameetsajeitantajariri. ⁶Ari yaarantavaque Moieshi iriraja ijaaquero aparoqui coviti, impoijsi isaque pashiniqui coviti itsiquirijantacarori altar. ⁷Irosati yaantacaro isanquenatacotaqueri icoacaqueriri Tasorentsi, ineanajeitaqueneri ishanincepee. Irosati icantajeitantanaca:

—Ocameetsati amoncarateneri aisati antajeitero icoacaajeiteeri.

⁸Irosati yaantanacaro Moieshi iriraja vaca yoacotaqueri incaaranqui, itsiquirijainajeitaqueri ishanincepee. Ari icantajeitiri:

—Oca irajantsi, irotaque iotacantatsiri icarajeitaquee Tasorentsi, irimoncaratero ocantacotiriri Sanquenarentsi.

⁹Irosati itoncaantanaja Moiseshi, yaanaqueri Aarón, Nadab, Abiú jeri carajeitatsiri 70 jivatacaajeitiriri ishanincepee. ¹⁰Ari inepaaqueri ishanincepee Israel Itasorensite. Anta iitiqui timatsi shipaquireatsiri quempevetarori sancanatasanotatsiri oshiavetacaro inquite. ¹¹Iro cantaincha te iroashinoncaajeiteriji Tasorensi yora jivatacaajeitiriri ishanincepee Israel. Ineajeivetacari, ari yoajeitaca aisati irajeitaque.

Ijataque Moiseshi toncaariqui Sinaí

¹²Ari icantajiri Tasorensi Moiseshi:

—Caatanaque aca, pincatiabee ara; nompempiro mapicota nosanquenatantacarori Nocantacantiri, poamejeiteriri maaroni pishanincepee.

¹³Iquemantacariri Moiseshi, irosati itoncaantanaca, icaratanaqueri Josué amitacotiriri. ¹⁴Icantajeitanaqueri jivatacaajeitiriri ishanincepee:

—Poyeajeitavajenatsita aca, ancaratavacaajeitantanajeari ampiajeitanaje. Jeri yoca pincarajeitateri Aarón jeri Hur. Ariorica ompomerentsitimoyetaquempi paitapeerica, iriotaque pincantajeiteri iroameetsajeitantajempirori. ¹⁵Icantantanacariri Moiseshi, irosati itoncantanaca toncaariqui, ari apataavaqueri mencori otishiqui. ¹⁶Ora ishpaquireane Tasorensi anireapaaque otimantapaacaro toncaari Sinaí; ocarataque 6 quitateri apataaquero. Iro caratapaintsiri 7 quitateri icajemaqueri Moiseshi Tasorensi otimaquenta mencori. ¹⁷Ora ishpaquireane Tasorensi ineajeitaquero ishanincajeitaniri Israel, oquempevetacaro paamari tsoncantatsiri, otimaque ochoviinaquitapaaque toncaari. ¹⁸Yora Moiseshi opeavaqueri mencori toncaariqui, itimaque anta ocarataque 40 quitateri aisati 40 tsiteniri.

Iramayeri irovetsicantearori Pancotsi Irinanteari Tasorensi (Éxo. 35.4-9)

25 ¹⁻²Ari icantaqueri Tasorensi Moiseshi: “Pincantapeeri pishanincepee iramajeitenata timimoyetiriri ocarati icoasantaqueri impajeitenari. ³Jeroca nocoacaqueriri iramajeiteri: vetsicayetachari oro, plata, cobre, ⁴tocoya quitioncanirori, asoorinirori, quitioncari, lino jentamaotasantatsiri, iviti chiivo, ⁵imeshinapee ovisha ajacachari quitioncari, meshinantsi jentameshinayetsiri jero inchato acacia. ⁶Jero oreji orivo tsiotachaneri, aisati casancajayetatsiri inconoantaquearori quejitsi pisaiyetantearori pinashitacayeteari jero aisati casancapatsayetatsiri pintayetenari. ⁷Aisati iramajeitero mapijaniquipee quitioncaquinirori jero pashinipee quiripeitsoquijaniquiyetsiri, iroveshintaantaquearori icanteetiri efod, aisati iroyeri inejiqui yora jivatacairiri antaveetanari icanteetiri pectoral. ⁸Povetsicacante Nonanteari nontimimotantempiri. ⁹Ora

Pancotsi nonanteari, jero maaroni timayetatsineri, cameetsa pinquempetacantasanotaquero ora nonijayempiri.”

Irovetsicantearori Cajón ontimanteari Icantacantiri Tasorentsi
(Éxo. 37.1-9)

¹⁰“Povetsicacante aparo Cajón. Paaque inchato acacia, oncarate ontsantsate aparo metro avishimaate capichaji 10 centímetro. Iroquea otsaranca oncarate 65 centímetro aisati onquempetaquea ojenoquite 65 centímetro. ¹¹Pimpatacotaquero oro ioshita, manacotanaqueroneri taavera tsompoinaqui aisati acaquero. Irisati poashinampitantaquearori pishoncaqueri maaroni. ¹²Irisati paaque piyempitantayetaquearori, oncarataque 4 povetsicayetaque. Iriotaque poayetaqueri aisati oititanaqueari caratatsine 4. ¹³⁻¹⁴Impoiiji pintsirajashitero acacia oncarate apite inchaquii inquijacotantearori. Poameetsaquilitashitaquero cameetsa aisati pinquempetaquero pimpatacotaquero oro. Irotaque poiminqueaqueri piyempitayeteroriqui. ¹⁵⁻¹⁶Eiroyea pitsopaajirotsi. Irotaque poantearori mapi nosanquenatacotantacarori Nocantacantiri caratatsiri 10, nompempiri.

¹⁷“Aisati povetsicacantaque otatacoro irioshitaquea oro. Oncarate ontsantsate aparo metro, avishimaate capichaji 10 centímetro. Iroquea otsaranca oncarate 65 centímetro. ¹⁸Aisati povetsique irioshitaquea oro pishiacanteri apite nonampire; povetsicantaqueari martiyo poaqueri acaquerocapeequi. ¹⁹⁻²⁰Ora otatacoro aisati apitetatsiri shiariri nonampire irishivanquitavacaaquea, aparoni irinaque. Impoiiji poatiaqueri acaquerocapeequi otsapitapaaca otatacoro, cameetsa irovotaqueri irimontetavacaaquea, iroancaqueri ivanqui irimanantearori otatacoro. ²¹Ariorica pintsoncaquero, irosati pominqueacotantaquearo Cajóqui Nocantacantiri nompempiri. Impoiiji pashitacotero. ²²Yora pishiacanteri apite nonampire, aitaque nontimimotempiri narori jenioquiji. Niotacantempirori maaroni nocantacantiri, poametapinijeitanteariri pishanincepe.”

Irovetsicantantearori meesa iroantearori tantapee
(Éxo. 37.10-16)

²³“Povetsicacante meesa, irosati paaje acacia. Pimoncarataquero oncarate ontsantsate 90 centímetro. Iroquea otsaranca oncarate 45 centímetro aisati oncarate 65 centímetro ojenoquite. ²⁴Aisati pimpatacotaquero oro manacoteroneri. Irisati poashinampitantaquearori, pishoncaqueri maaroni. ²⁵Impoiiji povetsicashitero onticaacotanaqueari onampinapeequi shonquearone meesa; oncarate 7 centímetro otsarancajaniqui. Impoiiji povetsicashitaquero oro poashinampiterori. ²⁶Aisati

povetsicashiyetaquero oro oyempitatanaqueari oncarataque 4, pimpatacayetaqueri acaqueroqui oitipeequi. ²⁷Cameetsaquea onsipataquearo poashinampitaquerori, irotaque pisaquiintantarori inchaquii inquijacotantarori. ²⁸Impoiji pintsirajashitaquero acacia oncarate apite inquijacotantarori meesa. Poameetsaquiitashiyetaquero, pampinaicacotantaquearo oro. ²⁹Aisati povetsicayetaque peraatopee, cocharapee, tasopee, jarapee jero vaasojaniquipee, poantayetearori iramayeteri jatachari; ioshitaquea maaroni oro. ³⁰Pincanteani poapinitenaro meesaqui tantapee pinashitacayenari.”

Irovetsicacantantariri tsiorontsi

(Éxo. 37.17-24)

³¹“Impoiji povetsicacante irinanteari tsiorontsi ioshitaquea oro, pimpichaayetaqueri martiyoqui. Pintaquearo irisavicanteari intincamiteriri itsomontejaniquipee, jero quempetearone oteaquipee; cameetsa povetsicaqueri apanaquiuroquea irinantanaqueari. ³²Ora irijempequiyetanaqueari oncarate 6; onttime mava araquerora aisati mava acaqueroca. ³³Aparopee ijempequiqui ontimayete mava itsomontejaniquipee quempetarori oteaqi inchato pasotiqui. ³⁴Ora intincamitanaqueari aitaque intsomontejaniquiyetanaqueari oncarate 4, pinquempetacantayetaquero oteaquipee almendra iroaquera tequireatsi. ³⁵Ora caratatsineri 6, ontimatiye poayete aparopee oteaqi timatsineri ishaaviji. ³⁶Aitaque pincantaqueriri pimpichantayetaqueari martiyo, apanaquiuroquea irinanaque, irioshitantanaqueari oro. ³⁷Impoiji povetsicayetaque 7 ivaasojaniquitepee, poayetaqueri ijempequipeequi intsotantanaqueari cameetsa. ³⁸Jero aisati pajiricantayetearori catsirincayetatsine icanteetiri tenasa, jero platiyopee, ioshitaquea oro. ³⁹Incarate intenate 33 kilo povetsicanteariri tsiorontsi aisati timayetatsineri. ⁴⁰Pinquenqueshiretajeroyea oca nonijaaquempiri aca toncaariqui, pinquempetacantasantajero catsini.”

Irovetsicantearori Pancotsi Irinanteari Tasorentsi

(Éxo. 36.8-38)

26 ¹“Povetsicacante Pancotsi Nonanteari, pintijacantayete tocoyapee linopee quitioncamaonirori, asoorimaonirori jero, quitioncamaori; oncarataque 10 ompashicantanaqueari. Aitaque pishiacantaqueriri apite nonampire irishivanquitavacaaquea, impoiji pisataacoyetaqueri. ²Cameetsa omoncaratavacaaquea maaroni, oncarayetaque ontsantsate 12 metro ari nianqui. Iroquea otsaranca oncarayetaque 2 metro. ³Ontsantsaatantanaqueari tocoyapee oncarate 5 poavitaquero, pantsiyetaquero pashinipee. ⁴Anta onsapimaoyetapempa aitaque poayetaquenerori oyempitapee quitioncanirori aisati asoorinirori

oncarataque 50; ⁵ aisati pinquempetaquero pashini, cameetsaquea omontetavacaapempa. ⁶ Impoiji povetsicashiyetaquero oro incarataque 50, paacotantayetaquearori piyempiyetaqueroriqui; ontsipatavacantanaqueari cameetsa, ampasaanterotantanaqueari.

⁷“Impoiji pintijayetaque ivitipee chiivo oncarataque 11, ompashicantanaqueari Pancotsi manacoteroneri Nonanteari. ⁸ Cameetsa omoncaratavacaaquea iroori, oncarayetaque ontsantsate 13 metro ari nianqui. Iroquea otsaranca oncarayetaque 2 metro. ⁹⁻¹⁰ Ora pintaqueari caratatsineri 5, pinashitaquearo. Iroquea otsipa caratatsine 6, irotaque manacotapeerone pinqueapinitanteariqui. Anta ontsapimaoyetapempa aitaque poayetaquenerori oyempitapee oncarataque 50 aisati pinquempetaquero otsipa. ¹¹ Aisati pivetsicashiyetaquero bronce oncarataque 50, paacotantayetaquearori piyempiyetaqueroriqui ampatsarancarotantanaqueari. ¹² Tempa ora pimpashicantearori Pancotsi antearotsantsa oni, ora timaarantapaatsiri irotaque paincatsaneri acaquerocapeequi otimanta Nonanteari. ¹³ Aitaque oncanteari omanacotanaquea Nonanteari, ora timaarantapaatsiri paincatsaneri apiiteroqueti, ora caratatsineri 45 centímetro ashi araquerori aisati 45 centímetro ashi acaquero.

¹⁴“Impoiji pisaraaque aisati imeshinapee ovisha, pajacantayetaquearo quitioncajari. Aisati pisaraaque jentameshinayetatsiri meshinantsipee, iriotaque poicotacotantanaquearori.

¹⁵“Impoiji pintsirajayetaje acacia ashi Nonanteari pimpirincayetaquero cameetsa ontampaticatsantsaayetaque onquempyetantanaquearori taaverapee. ¹⁶ Cameetsa pimoncarayetaquero oncarayetaque ontsantsate 4 metro ari nianqui, iroquea otsaranca oncarayetaque 65 centímetro. ¹⁷ Aisati pinquichatencatashiyetaquero ishaaviji, cameetsaquea poiminquiayetaquero oncatiantanaqueari otsipapee, aisati pinquempyetayetaquero maaroni. ¹⁸ Pimpirincayetaque 20 taaverapee poyeri acaquero caatonconiri. ¹⁹ Aisati povetsicayetaque 40 plata oncatiantanaqueari poayetaquero ishaaviji, poiminueantaquearori taavera ontsitacantayetapemparori cameetsa.

²⁰⁻²¹“Aisati pinquempetajero ashi araquerora, iraye 20 taavera jero 40 plata oncatiantayetanaqueari. Oncarate apite oncatianteari aparo taavera. ²²⁻²⁴ Iroquea poyeri tsompoina acaqueroqui, pimpirincashitaquero taaverapee oncarate 6. Impoiji povetsicashitero poaqueri osorinapeequi oncarate apite. ²⁵ Oncaratantanaqueari 8 taaverapee ontsipayetaquearo, oncatiantayetanaqueari oncarataque 16 plata poiminueantaquearori taaverapee ishaaviji.

²⁶⁻²⁷“Impoiji povetsicaque 5 acacia pantancotashiyeterori taaverapee araqueroraniri, aisati 5 iroyeri acaquero. Impoiji 5 pantancotashiterori taaverapee iroyeri araquerora pashini iqueanajinta catsirincaiteri. ²⁸ Ora

patancotashiterori nianqui, ontimatiye poavisayetero capichaji aisati pinquempetaquero acaqueroa; pimincaratanotaquero onianquire poatiashiyetaquerori. ²⁹Impoiji povichaacotaquero oro taaverapee aisati piyempitayetaquearo oro; irotaque poiminquentaquearori inchaquiipee poameetsataqueri pampinaicacotantacari oro. ³⁰Irotaque povetsicantearori Nonanteari, pimincaratanotaquero nonijaaquempiri toncaariqui.

³¹“Impoiji pintijacantaje tocoyapee: quitioncamaonirori, asoorimaori, quitioncamaori jero lino tijachari. Aitaque pantsitacoyetaqueriri pishiacantaqueri apite nonampire irishivanquitavacaaquea.

³²Impoiji pintsayetero piyempitayetaqueri povetsicaqueri oro otincamipeequi poatiayetaqueri acacia caratatsineri 4, pinaicantacari oro aisati povetsicashitaquerori plata oncatiantayenaquea ishaaviji.

³³Impoiji pimpaencaquero oticaashiro, pishintsaayetaquero piyempitashiyetaquerori, aitaque antaqueronta oticaashiroqui poyerori Cajón ontimanteari Nocantacantiri. Irotaque nashitacayempineri ora cameetsatatsiri, inqueapinitenta antaveetenaneri, aisati ora tsompoina, nonantasanotari cameetsatasanotatsiri catsini. ³⁴Aitaque poacanterori Cajón tsompoinaqui cameetsatasanotatsiri Nonanteari. ³⁵Iroquea otsipa araqueroraniri, aitaque poacanterori meesa omerequiqui catonconiri. Irioquea tsiorontsi poacanteri otsipaque omerequi quirincaniri, cameetsaquea pimontetantaquearori.

³⁶“Impoiji pintijacantayetaje lino quitioncamaonirori, asoorimaonirori jero quitioncamaori. Irotaque pinconoayetavaquerori pincaninayetantaquearori cameetsa, pinticaashiterori pinqueapinitenta.

³⁷Impoiji povetsicayete acacia ontincamiyetanaqueari oncarate 5, pishintsaacantantaquearori oticaashiropee. Aisati pimpatacotaquero oro pampinaicacotantaquearori manacoteroneri. Aisati pintapoyetaqueri paacotantayetaquearori. Impoiji povetsicashitero bronce, pisaquero povetsicantapinitarori omoro. Oncarate irantaque 5 poashitaquerori otin camipee.”

Irovetsicacantantearori antearo altar bronce

(Éxo. 38.1-7)

27 ¹“Nocoaque povetsicacante antearo altar. Irosati pintsirajayetaque acacia, oncarate 2 metro, avishimaataque capichaji 25 centímetro. Iroquea poaqueri osorinapeequi oncarate aparato metro, avishimaate capichaji 25 centímetro. Omoncaratavacaaquea maaroni. ²Aitaque pishevatayetaquerori jenioquiji osorinapeequi oncarate 4. Impoiji pimpichaashiyetaquero bronce omanantanaqueari tsompoina aisati acaqueroa, ampanaquirotantanaqueari. ³Irisati povetsicayetaque bronce timayetatsineri antearoqui altar:

pojocavanetantearori samampo, paarapee, tasopee, teneroripee jero tenazapee. 4-5 Irisati paaque povetsicashitaquerori pinticayerori ishaaviji ari nianqui pinquempetacantero ampitarentsi; pishoncaquero maaroni. Impoiji pantaque oyempitapee oncarate 4 poayetaqueri osorinapeequi. 6-7 Impoiji pimpirincashitero apite inchaquii aisati pampinaicacotaquero bronce omanantanaqueari. Irotaque pisaquiinteri piyempitashitaqueroriqui. Aparo iroaque acaqueroca aisati otsipa araquerora, inquijacotantearori. 8 Ora iranteri altar oncaaranaquitaque, onquempetaquearo oca nonijaaquempiri.”

Oyaaraiterite Pancotsi Inantari Tasorentsi
(Éxo. 38.9-20)

⁹Icantiri aisati:

“Pimoncaratacantero oyaaraiterite Nonanteari. Ontime onticaashitanaqueari iroori oncarate ontsantsate 45 metro. ¹⁰Ora oaticashiyetanaqueari bronce otincamipee, oncarayetaque 20. Aisati oncarate 20 bronce oncatiantayetanaqueari jero plata oyempitayetanaqueari. ¹¹Aisati onquempyetaquea acaquerocapeequi, oncarataque onticaashiyetanaqueari 45 metro ontsantsayetaque. Jero oaticashiyetanaqueari oncarate 20 aisati 20 bronce oncatiantayetanaqueari jero plata oyempitayetanaqueari. ¹²⁻¹³Iroquea acaqueroca iqueapinitinta catsirincaiteri, oncarate ontsantsate 22 metro ari nianqui, onticaashitanaqueari. Aisati oncarataque 10 otincamipee jero 10 oncatiantanaqueari. Aisati onquempetaquea araquerora isoquijapiniti. ¹⁴⁻¹⁵Anta pinqueapinitenta, pisaatencataquero nianqui oncarate 7 metro ontsantsate, onticaashitanaqueari. Aisati oncarate mava otincami jero mava oncatiantanaqueari. Aisati onquempetaquea ontsantsate anta acaqueroca. ¹⁶Ora saatencatanaintsine nianqui, oncarate 9 metro ontsantsate, onticaashitanaqueari pintijashitaquero lino, quitioncamaonirori, asoorimaonirori, quitioncamaori. Irotaque pinconoayetavaquerori incaninayetantaquearori cameetsa, pinticaashiterori pinqueapinitenta. Povetsicashiyetaquero otincamipee oncarate 4 aisati oncarate 4 oncatiantanaqueari. ¹⁷Ora otincamipee shonquearone Nonanteari ontimatiye povetsicashiyetero plata oyempitayetanaqueari jero paacoyetantaquearori. Iroquea oncatiantayetanaqueari povetsicashitaquero bronce. ¹⁸Maaroni oyaaraitere oncarate ontsantsate 45 metro. Iroquea otsaranca oncarate 22 metro ari nianqui. Impoiji pintijashitero lino pinticaashiterori, irotaque pishintsaayetaqueri. Oncarate ojoquite 2 metro, avishimaate capichaji 25 centímetro. Aisati povetsicashitaquero bronce oncatiantanaqueari. ¹⁹Maaroni coayetachari pantaveeyetanteari Nonanteariqui, ioshitaquea maaroni bronce. Aisati onquempyetaquea poatiashijaniquiyetaquerori tsompoinaqui aisati saiteriqui.”

Quejitsi tsiotachaneri

(Lev. 24.1-4)

²⁰“Pincantapeeri pishanincepee iramajeitempi orivo ioshitaquea oreji, tsiotapinitatsaneri. ²¹Yora Aarón jeri itomipee iriojeitaque amenapiniterone tsiorontsinaquipee, ontsiotacotapinitantearori maaroni tsiteniriqui Novancoqui pampatotimentantenari, acaqueroca oticaashiroqui Cajón. Oca nocantacantaqueri, oncantaitatitempani. Irotaque irimoncarajeiteri pishanincepee aisati irishanincajeitajeari irior i.”

Itsaarepee yora antaveetatsineri Inantariqui Tasorentsi

(Éxo. 39.1-31)

28 ¹“Nocoaque quiso iroyempi quempeji pirenti, jeri itomipee: Nadab, Abiú, Eleazar jeri Itamar. Iriojeitaque nocoyeaqueri antaveetenaneri.

²“Povetsicacanteneri pirenti iitsaarepee marereamaotasantatsiri, cameetsaquea iroanencanteari. ³Pincantajeiteri pishanincepee iotasanoyetatsiri maaroni niotacaasanoyetaqueri icaninatacoyetro cameetsa paitapeerica, irovetsiquenerita inquitsaateari Aarón. Tempa iriotaque nonashitacaacari antaveetenaneri Pancotsiqui Nonanteari. ⁴Jero aisati irovetsicayetaqueneriri. Iroyeri inejiqui icanteetiri pectoral; jero impashicanejiteari icanteetiri efod. Impoiji inquitsaateari vecaraachaneri itavaatoqui jero iroyeri tompokina vecaraapemparine iitiqui. Aitaque incaninatacoyetaqueneriri. Aisati intijaqueneri lino jentamaotasantatsiri irisavoinateari, icanteetiri turbante; jero irishiticacoteari itsaqui. Aisati inquempyetaqueneri itomipee, irotaque irantaveetacayeri coajica Novancoqui. ⁵Yora vetsicayetenerine iitsaarepee, intijacoyetavaqueneri oro. Aisati intsaayetaque lino quiripetsari quitioncamaonirori, asoorimaonirori jero quitioncamaori. Irotaque inconoayetavaquerori ariorica intijaqueneri.

⁶⁻⁷“Aisati inquempetaquero impashicanejiteari, incaninataroquitaqueneri. Aisati intsaayetaque lino quiripetsari quitioncatsanirori, asooritsanirori jero quitioncatsari. Irotaque inconoayetavaquerori ariorica intijaqueneri. Impoiji intijashitaquero apite irishiticacoteari ishempaqui, ampataroquitantanaqueari. ⁸Aisati inquempetaquero irishiticatsaquiteari, iquempetacantaquero impashicanejiteari.

⁹⁻¹⁰“Impoiji iraaque apite mapicotajaniqui quitioncanirori, aitaque irisanquenayetaquerori ivajironi itomipee Israel. Aparo mapicotajaniqui irisanquenate oncarate 6 ivajiro aisati inquempetaquero otsipacotajaniquiqui. Irijivataqueri jivatatsiri

itimi irosati vecarantapaarori. ¹¹ Yora vetsicayeteroneri incharincasanotaquero onconijasanotantanaqueari ivajiropee. Impoiji irivintonatashijaniquiyetero oro iroantaquearori. ¹²⁻¹³ Irosati iroantaquearo intsatotaqueroriqui impashicanejiteari. Irotaque timatsineri ivajiropee ishempaqui Aarón inquitsaatocoteari ariorica inquenquetsatacapinitena. Aisati irotaque inquenqueshireacotanteariri ishanincapeeni. ¹⁴ Impoiji irovetsicaque aparo careenatsa, oncarate apite oshivitsaare ioshitaquea oro, irishoncajetaqueri irivintonashijaniquiyeterori mapicotajaniqui.

¹⁵⁻¹⁶ “Ora pectoral iroyeri inejiqui aisati inquempetaquero efod incaninatajero, cameetsa ontontamaojaniquitaque. Oncarataque ²² centímetro otsarancajaniqui, omoncaratavacaquea. Tempa irotaque incantacoventajeitantariri cameetsa ishanincapee. ¹⁷ Ariorica intsoncayetaquero, irosati iriveshintaantayetaquearo mapijaniquipee pinatasanoyetachari: oncarate ⁴ oveshintaayetanaquea. Ora irintaqueari iroveshintsaaquero, iraaque aparo rubí, crisólito jero esmeralda. ¹⁸ Ora apishintaquitatsineri iraaque granate, zafiro jero jade. ¹⁹ Ora mavashintaquitatsineri iraaque jacinto, ágata jero amatista. ²⁰⁻²¹ Iroquea vecarantapemparone iraaque topacio, cornalina jero jaspe. Ocapee iroashiyetavaquero oro irivintonatashijaniquiyetaquerori. Oncarataque ¹², tempa aitaque icarajeitiri itomipeeni Israel. Ocameetsati incharincasanoyetaquero aparopee mapijaniqui ivajiropeeni.

²² “Impoiji irovetsicashitero iroyeri inejiqui apite careenatsajaniqui ioshitaquea oro, inquempetacantaquero ampitsarentsi soocatsa. ²³⁻²⁴ Irisati iraaque oro irantaquenerori apite oyempitajaniqui ashi jenoquiniri; aparo ashi irampatequi jero iracosanoriqui. Aitaque iroiminqueayetaquerori careenatsajaniqui. ²⁵ Irotaque iroisotacotasantantaquearori ora iroantaquearori mapicotajaniqui apiiteroqueti ishempaquiniri. ²⁶ Aisati inquempetashitaquero ashi ishaavijiiniri, iroisotacotantaquearori iroyeri inejiqui impashicanejiteari. ²⁷ Irisati iraje oro irantashitaquerori apite oyempitajaniqui impashicanejiteari, iracotantaqueari itapiiqui. Iro cantaincha intsipataimataqueneri iroisotsaquiteari jenioquiji, ari ishaaviji capichaji. ²⁸ Cameetsaquea ontsipatantapemparori oyempitajaniquipee iroyeri inejiqui jero ashi impashicanejiteari. Iroquea iracotantaquearori soocatsa quitioncanirori, cameetsa ompatacantapemparori impashicanejiteari. ²⁹ Cameetsaquea inquitsaatocotanaquearo Aarón, niotacanteariri nocoacairiri ariorica impocapinite inqueantapiniteari Nonanteariqui. Aisati onconijatacotasanotaque inejiquiniri ivajiro pishanincapeeni. Irotaque inquenqueshireacotapinijeitantariri. ³⁰ Aitaque iroyeneriri aisati icanteetiri urim jero tumim incanteani inquitsaatocotapinitearo. Tempa irotaque iotacayerine nocoacairiri

ariorica inqueapinite Nonanteariqui incantacoventajeitantariri cameetsa pishaninca.

³¹⁻³² “Impoji irovetsicaqueneri quitioncamaonirori iroicotacotearori, impashicanejiteari vecarayemparine itavaatoqui irimorontaqueneri nianqui inquitsaatantarori. Aisati irampitivitaqueneri, eiroquea otserantatsi. ³³⁻³⁴ Anta overaapempanta, oshoncaquea maaroni intsayetavaque campanajaniquipee yovetsiquiri oro. Aisati iraque lino yajacayetiri quitioncanirori, asoorinirori jero quitioncari. Intijashitaquero irishiacantayetaquero oitsoqui granada. Irotaque irisatecayetavaqueri nianquipeequi irishoncaquero maaroni, cameetsaquea oanencanaquea. ³⁵ Ariorica inquitsaatacotanaquearo Aarón, irotaque poimatatsine inqueapiniterica Nonanteariqui irantaveetapinitanteari aisati ariorica irisoquijanaje, eiroquea icamantatsi.

³⁶ “Pincanteri aisati impichee oro apataroquironi. Impoji irisanquenatero neantsi cantatsineri: ‘Inashitacaacari Tasorentsi.’ ³⁷ Impoji impataquero savoinarontsiqui irosotacotantaquearo soocatsa quitioncanirori. Aitaque ontimapiniteri. ³⁸ Cameetsaquea onconijatacotanaque neantsi ariorica irisavoinatacotaquearo Aarón. Irotaque irimatantarori incantacoventeri pishanincepee paitapeerica irantaque. Aisati iramenarorica impapinitenari pishanincepee timimotiriri. Ora impatacaqueneriri ivancainaiqui, irotaque naacameetsatantajariri.

³⁹⁻⁴⁰ “Aitaque oncanteari intijayetaqueneri lino inquitsaateari Aarón. Aisati irisavoinateari jero irishiticatsaquiteari incaninatacoyetaqueneri. Aisati inquempetaqueneri itomipee, cameetsaquea iroanencajeitanaquea inquitsaataquearorica.

⁴¹ “Irotaque pinquitsaataqueriri pirenti jeri itomipee, irosati pivitejainajeitantaqueari quejitsi. Aitaque noshineteri irantaveetantenari. ⁴² Irosati lino intijaqueneri intorosajeiteari, eiroquea iconijantantatsi. ⁴³ Irotaque inquitsaatapinijeiteari ariorica inqueapinijeite Pancotsiqui pampatotimentantenari, inquempejitantarori altar irantaveetantenari; eiroquea ipiatsatantantsi, icamajeiticari. Irotaque oca nocantacantiri oncantaitatitempani onttime, irosati irimoncarajeitajeri irishanincajeitajeari iriori.”

Inashitacantacariri Antaveeyetatsiri Inantariqui Tasorentsi
(*Lev. 8.1-36*)

29 ¹ “Jero panteri pinashitacanteariri antaveetenaneri. Paacantaque aparo vacajaniqui, irioquea apite ovishajaniqui cameetsatatsiri. ² Aisati paacantaque cameetsapanetatsiri tirico, povetsicantayete tantapee caari tapiacha, pinconoacantero oreji orivo. Iro otsipapee pintsiquirijacantayetero quejitsi. ³ Irosati

pintetacantantayetaquearo cantirijaniquiqui iraacotantanaquearori Nonanteariqui. Aisati paacantanaqueri iriori vacajaniqui jeri apiiteroqueti ovishajaniqui. ⁴Irosati paantanaqueari pirenti jeri itomipee anta pinqueantapinitearoriqui Pancotsi pampatotimentantenari, impoiji pincanteri incaajeite. ⁵Ariorica incaajeitaque, irosati pinquitsaatanaqueari iroicoro, iroicotacotantearori efod jero pectoral. Impoiji pishiticacoteneri ishiticatsaquiropi. ⁶Aisati pimpatacacotaquero neantsi isavoinarوقي, irosati pisavoinatantanaqueari. ⁷Irosati paantanaqueari quejitsi pivitejainatanteariri. ⁸⁻⁹Impoiji pincanteri inquempijeittempit itomipee iriori, pinquitsaajeitanteariri. Aisati pinquempetacantaqueri, piquempetaqueri iriri irantavejeitantajeari iriori. Tempa irotaque nocantacantiri oncantaitiyempani.

¹⁰“Ariorica paacantanaqueri vacajaniqui, irovanquetanteaririri iraco iitoqui Aarón jeri itomipee; ¹¹aitaque poimotentariri pinqueantapinitearoriqui Pancotsi pampatotimentantenari. ¹²Paacantavaqueroyea iriraja, impoiji poviinquero pacotsapaqui capichaji, pimpantayetantearori oshevatayetanaqueari altar. Iroquea timaarantapaatsine pisaitantayeteoro oitiyetanaqueari. ¹³Impoiji pintotacantayeteri irejitsaraquipee isheitoquiniri, iranatare jero ishonquepeo, irosati pintaantanaquearo povetsicacanteri altar. ¹⁴Iroquea ivatsa jero imeshina aisati itiapatsapee irisotoacaanaquero irointi, intayero otsapitapaaca pisavicajeitinta. Tempa irotaque intaimenteneriri caari cameetsatatsi yantayetiri.

¹⁵“Impoiji paacanteri iriori ovishajaniqui aisati inquempetajeri irajiricainatajari. ¹⁶Irosati iroamantajeari. Paacantavajero iriraja pintsiquirijantearo maaroni altar acaquerocapeequi. ¹⁷Impoiji pintotacantayetaqueri aisati pinquivacantayetaquero iramporetsapee, iitipee, irosati intsipataantanaqueari ivatsa jero iito. ¹⁸Impoiji iroanqueyetaqueri intaantenariri maaroni, pimpincatsatapinitantenari. Ari noneacameetsajencatasanoteri.

¹⁹“Impoiji paacanteri pashini ovishajaniqui. Aisati inquempetajeri irajiricainatajari. ²⁰Irosati poacantantajeari iriori, paacantavajero iriraja. Pimpantayetanteariri pirenti jeri itomipee overaapaaca iyempita iracosanoriquiniri, jivatatsiri iracotsapaqui jero antearotatsiri iititsapaqui. Iroquea timaarantapaatsine pintsiquirijantajearo altar maaroni acaquerocapeequi. ²¹Ora iriraja piojayetapaachane altariqui, paaque capichaji aisati pintsipataaqueri quejitsi. Impoiji pintiritacojeitanteari iitsaarepeequi. Aitaque pincantajeitaqueriri, tempa iriotaque nonashitacayeari irantaveetantenari.

²²“Impoiji paacantaquero ireji irishichomequiniri aisati iramporetsaquiniri, iranatarepee, ishonquepeo jero ivori iitisanoriquiniri. Tempa irotaque nonashitacanteariri antaveetenane. ²³⁻²⁴Jero tanta caari

conoacha tapiacaarori, timatsiri cantirijaniquiqui Nonantariqui. Paye aparo pimerancacantaqueri conoachari quejitsi jero aparo jentamerontari; irosati pimpantaqueari maaroni Aarón aisati itomipee iroancavancatantenarori. ²⁵Impoiji paayetajero irosati pintaantaqueari altariqui, pintsipataaqueri pitaqueri. Irotaque noneacameetsajencatasanoteri pimpincatsatantenari.

²⁶“Pinashitacanteariri Aarón, paavaquero aisati imonqui, irosati poancavancatantaquenaro. Impoiji pinashitearo. Irotaque pashiteari avirori. ²⁷⁻²⁸Ora ineji pinashitacaacari poancaquenari jero ivori pimpapinitenari. Irotaque pinashitacaapiniteanariri Aarón jeri itomipee. Oca nocantaquempiri incanteani iramapinijeitena pishanincepee; irotaque intaimenterori naacameetsajeitantajeariri nompeacojeiteneri caari cameetsatatsi yantajeitiri.

²⁹“Ora quitsaarentsipee pinashitacayeanariri Aarón, irotaque inquitsaatajeari coajicani poyetajearine irantaveetajena. ³⁰Yora antaveetatsine coajicani, irishanincatajeari Aarón, ariorica inqueero Pancotsiqui pampatotimentantenari, irantaveetanteari, oncarate 7 quitaiteri inquitsaatearo.

³¹“Impoiji iraaque ivatsa ovisha irinashitacayeanari Aarón, iriotaque incoteri anta tsompoinaqui oyaaraiteritequi Nonanteari nonashitacayeari. ³²Irosati iroajeitantaqueari inqueapinitenta, intsipataaqueri tanta tetachaneri cantirijaniquiqui. Inquempeteari Aarón jeri itomipee yoapinitari iqueapinitantaroriqui. ³³Iro iroajeitanteariri, tempa iriotaque intaimenterori caari cameetsatatsi yantajeitiri, nompeacotanteanariri. Aisati nompincatsaritacanteariri irantaveetantenari. Iro cantaincha eiro yoacaaritsi pashinisati. ³⁴Aisati ariorica intimaarantapaaque ivatsa iroorica tanta, ocameetsati intaajero. Tecatsi oimatearone catsini, tempa irotaque nonashitacaari.

³⁵“Ocameetsati pimatacaajeiteri ocapee nocantaquempiri, tempa irotaque nocoacaaquempiri. Oncarate 7 quitaiteri pincantapiniteri pirenti jeri itomipee irimatantearori irantaveejeite Nonanteariqui. ³⁶Oca sietetatsiri, pincanteani quitaiteripeequi pintaapinitenari vacajaniqui, nompeacojeitantempirori caari cameetsatatsi pantajeitiri. Aisati pisaitapinitero altar quejitsi, pinashitacantenarori. ³⁷Oncarate 7 quitaiteri pintaantapinitearo virantsi altar, irotaque nompeacojeitantempirori caari cameetsatatsi. Aitaque oncanteari nonashitacaasanotantearori oncameetsatasanotanaque catsini yora antaqueroneri altar nonashitacaasanoteari.”

Impapiniteriri Tasorentsi

(Núm. 28.1-8)

³⁸Ari icantiri aisati:

“Incanteani impapinitena ovishajaniqui incarate apite moncarataquerori aparo irosarentsite. ³⁹Iriotaque intaapinitenari

maaroni quitaiteeripeequi, eiroyea ipeacotarotsi. Aparo intayenari iroaque onquitaiteamane, irio itsipa intayenari irishaavijiiteanajerica catsirincaiteri. ⁴⁰Yora irinteari, iroyeri intsipataavaqueri cameetsapanetatsiri tirico oncarate 2 kilo, inconoavaquero oreji orivo oncarate aparo litro. Impoiji irisaitantaquearo ovaja oncarate aparo litro. ⁴¹Aisati inquempetajeri itsipa, yora intaanajeri ishaaviniji, intsipataayetavaqueri tiricopane. Tempa irotaque noneacameetsajencatasanotiri. ⁴²Yora intaapinitenari pinqueantapinitearoriqui Pancotsi pampatotimentantenari, irotaque pimpincatsatapinijeitantenari, tempa aitaque noneanatemperi. Aisati inquempetajea iriori pishanincajeitajeri, incantaitiyempani intaapinitenari. ⁴³Aitaque nonijayeriri notasorenca pishanincapee, iriojeitanteari irotaque nonashitacaasanotacari. ⁴⁴Aisati nonashitacaacaro Pancotsi pampatotimentantenari jero iroori altar, aisati iriori Aarón jeri itomipee, iriojeitaque antaveetenane. ⁴⁵Aitaque nontimimojeitemperi; tempa narotaque Pintasorensitetari. ⁴⁶Aitaque piojeitanajeri narotaque Tasorensisanori Pitasorensite. Narotaque omishitoajeitajimpiri anta Egiptoqui, nocantani quiso noajeitaquempi. Tempa narotaque Tasorensisanori Pitasorensite.”

Irovetsicacantantearori altar intaantearori casancayetatsiri
(Éxo. 37.25-28)

30 ¹“Povetsicacante aisati orijaniqui altar pintaantearori casancayetatsiri; irosati paaje taavera acacia. ²Oncarate 45 centímetro ontsantsate aisati onquempetaquea otsaranca. Iroquea ojenoquite oncarate 90 centímetro, poavisayetaquero, irotaque pishevatayetaquerori ampanaquirotantanaqueari. ³Aisati pimpatacacotaquero oro, manacotanaqueroneri jenoquiniri aisati pishevatayetaqueroriqui. Impoiji pishoncaqueri maaroni acaqueroqui poashinampiyeterori. ⁴Irisati oro piyempitantayetaquearo, pimpatacayetaqueri ishaaviji poashinampitaqueroriqui. Apite poaque acaqueroa osorinaquiyetapaaque aisati apite araquerora irotaque pisaquiintantearori inquijacotantearori. ⁵Ora inchaquii isaquiintantearori irosati paaque acacia oameetsaquiyetaquero, pampinaicacotantaquearo oro omanacotantanaqueari. ⁶Ariorica pintsoncacantaquero irosati poantaquearo oticaashiroqui Nonanteari, ontsipataimaataquearo Cajón ontimanteari Nocantacantiri. Tempa aitaque nonquenquetsatacapinitemperi. ⁷Ariorica impocapinite capichaji quitaite Aarón irovetsicapinitanteariri tsiorontsi, aitaque intaapinitenarori casancapatsatsiri. ⁸Aisati inquempetajero ishaaviniji ariorica intsiotanajeri. Aitaque incantapiniteari intaimotapinitenaro maaroni osarentsipeequi. ⁹Eiroyea itaantayetarotsi casancayevetachari aisati vatsatsiyetatsiri jero paitapeerica ipanquiyetiri; aisati eiro isaitantarotsi ovaja. ¹⁰Tempa irotaque nonashitacaasanoteari oncameetsatasanotanaque. Oncarate aparopee osarentsi

inqueapinite Aarón, irisaitantearori oshevatapeequi iriraja iroapinitenari. Tempa irotaque nompeacojeitanteanariri caari cameetsatatsi yantapinijeitiri pishanincaptee. Queario catsini nocantaque, oncarate aparopee inqueapinite osarentsi.”

Maaroni shiramparipee impinacoventajeari sanquenatacojeitachaneri

¹¹⁻¹²Ari iquemajiri Moisesi Tasorentsi, icantiri:

“Ariorica pisanquenatacojeitaqueri ivajiropee pishaninca, ontimatiye iramajeitaque aparopeeni impinacoventeari, eiroquea opocashijeitantaritsi oashinoncantsipee oamantatsiri eiorica isanquenatacotatsi. ¹³Incarate impayetena 5 gramo imentaqui plata ari nianqui, irimoncaratantaquearo moncaramentotsi timatsineri Nonanteariqui. ¹⁴Impinacoventajeitea carayetantsiri 20 irosarentsite jeri iriori avisayevetainchari. ¹⁵Ariorica impinacoventajeitea, yora ashitaarantincari eiro yojoquitsi quimota, aisati inquempetaquea iriori caari timasanotatsi iireequite. Ocameetsati irimoncaraavacaajeitanaquea maaroni. ¹⁶Aviro aayerine iireequite pishanincaptee. Impoiji pimperi yora antaveetatsiri Nonantariqui, inquempoyeantearori. Iriotaque povetsicacanteri timayetatsine coajica Pancotsiqui pampatotimentantenari, ari nonquenqueshiretacojeiteri ipinacoventajeitaca.”

Irivetsicacantantearori antearo chomo bronce

(Éxo. 38.8)

¹⁷Ari iquemajiri Moisesi Tasorentsi, icantiri:

¹⁸“Povetsicacante antearo chomo ioshitaquea bronce irosati bronce iraaque osavicanteari: poaquero nianqui pimontetacaquero Pancotsi pampatotimentantenari aisati altar. Impoiji pijaye nija irotaque pinquivacotapinijeiteari. ¹⁹Yora Aarón aisati itomipee irotaque irayeri nija inquivavacoteari aisati iitipee. ²⁰Inquivavacotea ariorica inqueero Pancotsi, aisati ariorica inquempjitearo altar irantaveetanteari, aisati intaantenariri yamayetanari; eiroquea icamajeitantatsi ²¹Eiro icamajeitantatsi, ocameetsati inquivajeitero iracopee jero iitipee. Irotaque oca nocantacantiri, oncantaitatiyempani ontime. Irotaque irimoncarateri Aarón aisati irishanincajeitajeari coajicani.”

Iroameetsajatacanteri quejitsi irinashitacayeari

(Éxo. 37.29)

²²Ari iquemajiri Moisesi Tasorentsi, icantiri:

²³“Aviro nocoacaquero pincoyeayete shiocayetatsiri casancajencatasanotatsiri. Pimoncaratantaquearo moncaramentotsi timatsineri Nonanteariqui: oncarate 6 kilo mirra, 3 kilo metaqui aisati 3 kilo cálamo. ²⁴Iroquea casia oncarate 6 kilo, 3 litro oreji orivo ari nianqui.

²⁵ Ontimatiye pimatacantero ocapee poameetsajataca antasanotero, iquempetiro vetsicayetirori casancajaripee; irotaque quejitsi casancajencatatsiri pinashitacaasanotaquenari. ²⁶ Irotaque pisaitantayetaquearori timayetatsineri Pancotsiqui pampatotimentantenari, Cajón pintetacotantearori Nocantacantiri, ²⁷ aisati meesa jero maaroni timayetatsineri; aisati iriori tsiorontsi jero maaroni timayetatsineri; ²⁸ aisati altar pintaantearori casancapatsayetatsiri; jero aisati altar pintaapinitanteariri virantsi jero maaroni timayetatsineri. Aisati pinquempetaquero iroori chomo jero osavicantanaqueari. ²⁹ Aitaque pincantayetaquearori pisaiyetaquero, onashitasanotantanaqueari oncameetsatasanotanaque catsini maaroni timayetatsineri. Yora antaquerone nonashitacaasanoteari.

³⁰ “Oca povetsicacantayeteri, irotaque pisainatanteariri Aarón jeri itomipee, irantaveejeitanaqueari Nonanteariqui. ³¹ Irosati pincantajeitanaqueari pishanincapae: ‘Oca casancajari noameetsajatacantasanotaquero, oncantaitatitempani onttime osarentsipeequi. ³² Eiro pisainayetashitaritsi picarajeitiri aisati eiro pivetsicashiyetatsi quempetearoneri. Tempa irotaque nonashitacaasanotacari, aisati avirori, irotaque pinquempetacanteri cameetsatasanotatsiri. ³³ Jaanicarica vetsicashiyetachane aisati sainatashiyetearine icarajeitiri, ontimatiye pintiancajeri, eiro icarajeitanajimpitsi.’”

Irovetsicantearori casancajari

(Éxo. 37.29)

³⁴ Ari icantajiri Tasorentsi Moiseshi:

“Paayete pintayeri cashiyetatsiri: jero casancajayetatsiri icanteetiri uña jero aisati oja icanteetiri galbano. Aisati pinquempetacantaquero nocantaquempiri povetsicacantero casancajari. ³⁵ Irotaque inconoantaquearori ariorica intononcaquero, cameetsaquea oncasancajencatasanotantanaqueari. Pinquempetacantasanotero iquempetiro vetsicayetirori casancajaripee. ³⁶ Impoiiji pintononcacantasanotero, cameetsa oncarenipanetasanotantanaqueari. Irotaque poacoteri Pancotsiqui pampatotimentantenari, pintsipataimaataquero Cajón. Oca pintayeri, irotaque nonashitacaasanoteari oncameetsatasanotanaque. ³⁷ Eiroya povetsicanontatsi avirori quempetearone oca; tempa irotaque nashi pincashiacaasanotenari, poameetsajatanari. ³⁸ Jaanicarica vetsicayetatsine intiritantayetearori, ontimatiye pintiancajeri, eiro icarajeitanajimpitsi.”

Icoyaequeri Tasorentsi vetsiqueroneri Pancotsi Irinanteari

(Éxo. 35.30; aisati 36.1)

31 ¹ Ari iquemajiri Moiseshi Tasorentsi, ² icantiri: “Pinquemena: Ainiro picarajeitica nocoyaequeri yora ishanincapenei Judá pajitachari Besalel itomi Urí, yora icharine Hur. ³⁻⁴ Iriotaque otasoncaventaqueri noshire, iotacaasanoyeteri intsapayetero paitapeerica coiteayetachaneri aisati

irovetsicantayetearo oro, plata jero bronce. ⁵Aisati irivintonatashiyetero mapijaniquipee cameetsaquiri pinatasanoyetachari, inquichatashiyetero taaverapee, cameetsa avicayetantapaaquearori oshanincapee. Aisati irovetsicayeteri paitapeerica shiacantsiyetatsiri. ⁶Ainiro nocoyeaqueri aisati amitacoterine pajitachari Aholiab itomi Ahisamac, yora ishanincapeeni Dan, jeri maaroni ioyetatsiri. Niotacaasanojeiteri irimajeitantarori irivetsiquero maaroni nocantayetaquempiri:

⁷ ora Pancotsi pampatotimentantenari aisati maaroni timayetatsineri, ora Cajón onanteari Nocantacantiri, aisati otatacoro;

⁸ ora meesa aisati maaroni timayetatsineri, jeri tsiorontsinaqui ioshitaquea oro aisati maaroni timayetatsineri; jero altar pintaapinitantenarori casancayetatsiri;

⁹ jero antearo altar pintaapinitantenariri pivirapee; aisati maaroni timayetatsineri; jero antearo chomo aisati osavicantanaqueari;

¹⁰ jero quitsaarentsi cameetsamaotasanoatsineri inquitsaateari Aarón jeri itomipee, ariorica inqueacaapiniteri Nonanteariqui irantaveetanteari,

¹¹ jeri quejitsi pinashitacaajeiteari pisainajeitantariri antaveeyetatsine; jero cenasancapatsayetatsineri pintayeri Nonanteariqui.

Oca nocantaquempiri ocameetsati irimoncarajeitero maaroni.”

Quitaiteri irimaoreantapinijeiteari

(Éxo. 35.1-3)

¹²⁻¹³ Ari iquemajiri Moiseshi Tasorentsi, icantiri:

“Pinquenquetsatacaapeeri maaroni pishanincapee; jero ca pincanteriri: ‘Otimatiye impincatsajeitero quitaiteri nonashitacaacari. Irotaque piojeitanteari quiso noajeitaquempi noncantaitiyempani; tempa avirojeitaque nocoyeajeitaqueri.

¹⁴ “ ‘Ora quitaiteri nonashitacaasanoaquempiri, ontimatiye pimpincatsajeitero; tempa irotaque nocantacantiri.

“ ‘Yora caari moncaraterone, ontimatiye poacanteri; aisati pinquempeteari yora antaveetantaquerone, eiro icarajeitantimpitsi.

¹⁵ “ ‘Ocameetsati pantaveejeite oncarate 6 quitaiteri; iro caratapaatsine 7, irotaque pimpincatsajeitantenari. Tempa irotaque nonashitacaquempiri, te onquempyeteoro otsipapee quitaiteri.

“ ‘Jaanicarica antaveetantaquearone, ontimatiye poacanteri.’

¹⁶ “Irotaque ocameetsatantari pimomcarajeitero pimaoreantearo quitaiteri sábado; ancaratavacaapinijeitanteari osarentsipeequi.

¹⁷ “Irotaque aisati piojeitanteari noncantaitiyempani quiso noyempi.”

Tempa ocarataque 6 quitaiteri yovetsicantacariri Tasorentsi timayetatsiri inquitequi aisati quipatsiqui. Iro caratapaatsiri 7, irotaque yoipacantacarori.

Yovetsicaque Aarón oro ishiacaantaqueri vaca
(Deut. 9.6-29)

¹⁸Isoncantanacarori Tasorentsi iquenquetsatacairi Moiseshi anta toncaariqui Sinaí, irosati ipacotantacari apicotatequeti mapi isanquenatacotantacarori iriori Icantacantiri.

Yovetsicaque Aarón oro ishiacantaqueri vaaca.
(Deut. 9.6-29)

32 ¹Ari ineaqueri ishanincapee Moiseshi osamani ipeaca anta toncaariqui te impoquitajeaji, irosati ijatashijeitancari Aarón, icantajeitapaqueri:

—Nocoajeitaque povetsiquena antasorentsitetajeri anquemisantajeitajeri. Te ayoteji paitarica avishimotaqueriri yora Moiseshi amajeivetajeeri Egiptoqui.

²Ari yacashitanaqueri Aarón:

—Je, meeca paayetateri oro otsayetiri oyempitapeequi pijinapeequi, pitomipeequi jero pishintopeequi, pamajeitaquenari aca.

³Ari ijajeitanaque, irosati yamajeitancanari Aarón. ⁴Ari yaavaqueri, icotaqueri. Impoiji yaaquero ashivotatsiri yovetsicaque, iquempetacantaqueri vacajaniqui. Ineajeitancari ishanincapee, irosati icantajeitashitanaca:

—¡Jeri yoca Atasorents site oimishitoajeitajeri Egiptoqui!

⁵Iquemantajeitancari Aarón ishanincapee, irosati yovetsicantana altar itsipataaqueri. Impoiji icantajeitaqueri quimojenca:

—¡Osaitequerani anquimoshirejeitamane ampincatsajeitancari Tasorentsi!

⁶Ari oquitaiteamanaque capichaji quitaite, irosati yaajeitancamanaca ivirapee, yoajeitaqueri itaasanotaqueneri aisati yoajeitaqueri iraacameetsajeitancari. Irosati isavicajeitancana yoimentajeitancari aisati irajeitaque. Impoiji icatijeitanaca iveshireimentajeitancara paitapeerica.

Te irineacameetsateroji Tasorentsi caari cameetsatatsi

⁷Irosati icantantajari Tasorentsi Moiseshi:

—Meecca poirincanaje pamenajeitapaajeri pishanincapee paajeivetajantari Egiptoqui, yantajeitaquero catsini caari cameetsatatsi.

⁸Intsipate ipeacojeitanacaro nocantacantavetancari. Irointi icotanaque oro ishiacantaqueri vacajaniqui; iriotaque ipincatsataqueri aisati itaashitancanari ivirapee. Icantavacaajeita: ‘Jeri yoca Atasorents site oimishitoajeitajeri Egiptoqui.’ ⁹Noneaqueri te incoajeitanajeji inquemisantanajena, oshequi ipiatsajeitanaca. ¹⁰Pishinetena meeca

nontsoncajeitajeri, oshequi noquisasanotaca. Te namavetacoteriji yantimojeitaquenari. Avintiquea noshequiacaasanojeitaje.

¹¹Iro cantaincha yora Moiseshi icoaque incatsimareacajeari Tasorentsi, icantiri:

—Notasorentsite, ¿paitaquea pintsoncajeitantajeariri? Tempa iriotaque pishanincepee. Aisati aviotaque oimishitoajeitajiriri Egiptoqui ponijaajeitancariri pitasorenca. ¹²¿Paitaquea pishinetanteariri incantajeite egiptosati: ‘Irompa yaajeitantanajariri Tasorentsi anta toncaariqui, icoaque intsoncajeitajeri maaroni?’ ¡Eiro piquishimentiritsi yantajeitaqueri, pincavintsaajeiteri! ¡Eiro pitsoncajeitiritsi pishanincepee! ¹³Pinquencheshireteri Abrahamani, Isaacani jeri Jacoboni, iriojeitaque quemisantimpiri; tempa peerani picantasanotaqueri: ‘Queario nocantasanotimpi, tempa narotaque Tasorentsi. Noshequiacaasanojeitajeri pishaninceajeitajeari inquempeteari impoquiropee.’ Picantasanotaqueri aisati. ‘Oca quipatsi, irotaque nompajeiteriri incanteani irisavicantajeitearo.’

¹⁴Irosati ipashinitantajaro Tasorentsi iquencheshirevetacari intsoncajeitajerime ishanincepee.

Yoirincantanajari Moiseshi

¹⁵⁻¹⁶Irosati ipitsocantanaja Moiseshi yoirincanaja anta isavicapaaquenta Josué. Yaanaquero apicotatequeti mapi isanquenatantacarori Tasorentsi icantacantaqueri acaquerocapeequi; tempa iriotaque vetsicaquerori.

¹⁷Iquemantacarori Josué icajemajeiti ishanincepee, icantiri Moiseshi:

—Noquemaquero icajemajeiti ashanincepee asavicajeitinta, quempetaca imanatavacajeita.

¹⁸Ari icantiri iriori:

—Te ari oncantea incajemacojeiteri anaacojeitantsiri; aisati te ari oncantea incajemacoyeeteri yanaacoyeetaqueri. Irointi noquemaque pashinisato pampoyeantsi.

¹⁹Yareetantajari Moiseshi isavicajeitaquenta ishanincepee, ineajeitapaatiiri ishiacantaqueri vacajaniqui aisati imitajamitajajeitanaque, oshequi catsini iquisasanotapaaca, irosati ipishonquimotantapaacari mapicota yamavetacari, ora isanquentaqueri Tasorentsi, oporocapaaque quipatsiqui. ²⁰Irosati yaantacari yovetsicaqueri vaca, ipishoncaqueri paamariqui. Impoiji itononcaqueri ishivetavanetanaque, irosati ijatantacari nija ipajeitaqueri ishanincepee iracojeitaqueri. ²¹Irosati iquisatsatantacari Aarón, icantiri:

—¡Paita pantaqueri! ¡Jaoca icantajeitaquempiri ashanincepee pantacaajeitancariri antearoite caari cameetsatatsi!

²²Ari incantanaqueri iriori Aarón:

—Iye, eiro piquisanatsi. Tempa pineapinijeitiri ashanincepee, aitaque icantajeita; icoasanojeitiro caari cameetsatatsi. ²³Irotaque

icantajeitantaquenari: ‘Pivetsicajeitena antasorentsitetajeari jivatacaajeitajeeneri. Tempa te ayojeiteji paitarica oaqueriri Moiseshi amajeivetajeeri aca.’²⁴ Ari nocantiri: ‘Pamayetaquenaqueti oropee yashiyetari acarajeitiri.’ Irosati yamajeitantaquenari. Ari naavaqueri, nojocaqueri paamariqui, irosati ishitoantanaca yoca quempevetacariri vacajaniqui.

²⁵ Ari ineaqueri Moiseshi ishanincapee yantashijeitacaro paitapeerica icoacaajeitacari. Te iramaajeiteariji manajeiterine irishirontimentajeiteari iroashiventanteariri; tempa yora Aarón te incantimenteriji. ²⁶ Irosati ijatantanaca Moiseshi otsapitapaaca inampi. Ari icanti:

—Maaroni coatsiri inquemisantajeiteri Tasorentsi, impocanaqueta aca incarajeitena.

Ari ipocajeitapaaque ishanincapeeni Leví.

²⁷ Irosati icantantari Moiseshi:

—Aitaque icantiri Tasorentsi, yora iquemisantaqueri Israel: ‘Meeca pijajeite pivancopeequi, paajeitapee pisataamento. Impoiji pintsoteayetero isavicajeitinta ashanincapee, poarantayeteri jaanicarica pintonquotavaqueari; omavetaquea iriorica pirementee, teerica, pitsipatapinivetari jeri pitsipanampiyevetari.’

²⁸ Ari imoncarajeitaquero icantaqueriri Moiseshi. Icarati camajeitaintsi 3,000 shiramparipee aparo quitaiteri. ²⁹ Irosati icantantacari:

—Meeca pimajeitaquero nocantaquempiri. ‘Poarantayetaqueri ashanincapee.’ Meecaquea intasoncacoventasanotempi Tasorentsi aisati impeasanotempi antaveetenerine.

Ipianaja Moiseshi toncaariqui

³⁰ Ari oquitaiteamanaji icantiri Moiseshi ishanincapee:

—Avirojei, oshequi catsini pantajeitaquero caari cameetsatatsi. Meeca nompianaje anta toncaariqui ininta Tasorentsi, nonquenquetsatacanteariri arioyeata impeacojeitajempiro pantaqueri.

³¹ Irosati itoncaantanaja. Ari iquenquetsatacaapaajiri, icantiri:

—Notasorentsite, queariotasanotaque yantajeitaquero noshanincapee caari cameetsatatsi, yovetsicanontacari oro ijitasorentsitashitacari.

³² Meeca noncantempi: Pimpeacojeitajeneri. Irompa eirorica, ¡ocameetsati poamayena narori!

³³ Ari icantanaqueri iriori:

—Eiro noamaimpitsi avinti, irintiquea noamaajeite yora antimojeitaquenarori caari cameetsatatsi. ³⁴ Meeca pimpiashitanajeri, paajeitanajeri anta quipatsiqui nocantaquempiri. Ainiro Nonampire jivatanajempineri. Ariorica omoncaratapaaquea noasanquetaajeiteri, aitaque noasanquetaimentaqueri caari cameetsatatsi yantajeitaqueri.

³⁵Irosati itiancantacanari oashinoncantsi, yoasanquetaimentajeitaqueri vacajaniqui ipincatsatashijeitacari yovetsicaqueneriri Aarón.

Icantajiri Tasorentsi Moiseshi: “Povaajeitanajea”

33 ¹Ari icantajiri Tasorentsi Moiseshi: —Pijatajequeti meeca paajeitanajeri pishanincepee pomishitoajeitajiri Egiptoqui. Pijatacaajeiteri anta quipatsiqui ora nocantasanotaqueriri Abrahamani, Isaacani jeri Jacoboni. Irotaque nompajeiteriri pishaninceajeitajeri. ²Nontianquempiri nonampire iriotaque jivatanaquempine. Irimatacaasanojeitantempiri pojocajeiteri cananeopee, amorropee, hititapee, ferezeopee, heveopee jeri jebuseopee. ³Pijajeite anta oshiocasanoyetapai maaroni panquiveerentsiyetatsiri, eiro ocoiteimojeitapaajimpitsi paitapeerica. Iro cantaincha eiro nocarajeitanajimpitsi, notsoncajeitimpicari; tempa avirojei piatsari, oshequi catsini piquisoshirejeiti.

⁴⁻⁵Ari icamantapaajiri Moiseshi ishanincepee icantajeitiriri Tasorentsi: —Avirojei piatsari, oshequi catsini piquisoshirejeiti. Ariorica quiso noajeitanajempi, aitaque nontsoncajeitaquempi. Meeca pinenquereajeitajeri paitapeerica pinenqueyeteri; naro ioterone jaoca noncantajeitempiri.

Iquemajeitantavacarori, oshequi yoashiretasanojeitanaca. ⁶Aitaque ocantari anta toncaariqui Horeb, yora ishanincepee Israel vojocajeitajiro inenquejeitarine oropee.

Pancotsi yapatotimentantariri Tasorentsi

⁷Ari yovacantajiro Moiseshi pancotsijaniqui nijanteaji. Ipajitaquero: Yapatotimentanteetariri Tasorentsi. Aitaque ijatapinitiri jaanicarica coatsiri iriote paita icoacairiri Tasorentsi. ⁸Ariorica ijatapiniti Moiseshi anta, yora ishanincepee icantani icatiapinijeita iqueantapinitaroriqui ivancopee, yamenacotapinijeitantariri irosati inqueantanaquea. ⁹Ariorica iqueapinitiro, irosati osaviincantapinita mencori ocatiatsantsaatapinita iqueantapinitaroriqui. Osamani onapiniti iquenquetsatacaapinitantariri Tasorentsi Moiseshi. ¹⁰Ariorica ineapinijeitiro iriori ishanincepee, irosati itiyeroapinijeitanta ipincatsapinijeitantariri Tasorentsi.

¹¹Yora Tasorentsi icantani iquenquetsatacaapinitiri Moiseshi, iquempetacantaqueri irio ishanincasanori, itsipatapinitari icantani iquenquetsatacari. Impoiiji ipiapinita isavicajeitaquenta. Irintiquea Josué, itomini Nun, amitacotiriri, icantani isaviqui tsoinpoina Pancotsiqui yapatotimentantariri Tasorentsi.

Yonijaaqueri Tasorentsi Moiseshi Itasorenca

¹²Icantiri Moiseshi Tasorentsi: —Notasorentsite, aviro coacaaquenari nojivajeiteri noshanincepee. Iro cantaincha te pincamantenaji jaanica nontsipateari, aisati picantaquena:

‘Noshinetaquempi pincaratena pantaveetena, aisati pineacameetsatana.’
 13 Queariotasanoataquerica oca picantaquenari, nocoi piotacayenaro
 ora picoiri pantayeteri, noshiretasanotantanaquemperi, aisati
 notanteari irosatirica pincanteani pincavintsayena. Tempa narojeitaque
 pishanincepee.

14 Ari icantanaqueri iriori:

—Narotaque quiso oajeitanajempine nosavicacaajeitempi cameetsa.

15 Icantanajiri iriori Moisesi:

—Eirorica quiso poajeitanajanatsi, eirota pishinejeititanatsi nojajeite.

16 Eirorica pitsipajeitanajanatsi. ¿Jaoca noncanteari notantearori
 picavintsajeitaquena? Ariorica paajeitanajena, irotaque iriojeitantearori
 maaroni itsipapee atiri pinashitacajeitaquena, te nonquempejeiteari
 pashinipee atiri.

17 Ari yacanajiri iriori Tasorentsi icantiri:

—Oca picantaqueri, aitaque nomataquempiro. Tempa
 niotaque pimocaratero nocoacaquemperi, irotaque
 noneacameetsatantaquemperi.

18 Irosati icantasanotantanacari Moisesi:

—Notasorentsite, meeca nocoasanotaque nonempi jaoca picantari
 pipincatsaritasanoti.

19 Ari icantanajiri iriori Tasorentsi:

—Coajica anta toncaariqui, ariorica navisanaquempi, aitaque
 nonijayempirori jaoca nocanta nocavintsanti aisati noncamantempiro
 novajiro. Aitaque piotasanotenari. Noneshinoncateri jaanicarica
 nocoakeri aisati noncavintsajeiteri jaanicarica nonintiri. 20 Iro
 cantaincha noncantasanotempi, eiro pimatirotsi pineavorotena.
 Tecatsi aparo atiri materone irineena; jaanicarica neaquenane, aitaque
 incamaque.

21 Icantiri aisati:

—Ainiro aca imperita, aitaque pincatiapeeri. 22 Ariorica
 navisanaquempi notasorencaqui irotaque noiminueantanaquemperi
 omoroqui, nomanantanaquempiro naco irosati navisantanaquea.

23 Impoiji nojocareavacotajea pineantavaquenari notapiiqui. Aintiquea
 novoroqui, eiro pineanatsi.

Ipacotajiri Tasorentsi Moisesi Icantacantiri

(Deut. 10.1-5)

34 1 Ari iquemajiri Moisesi Tasorentsi icantajiri:
 —Pincotaaje meeca apicotate mapi onquempetajeero ora
 nopavetavaquemperi piporocaqueri, nosanquenatantajeorori aisati
 Nocantacantiri. 2 Meeca pivetsicajea, pintoncaantapaajeeri osaitequerani
 capichaji quitaite. Pimpocantajeeri aca ochoviinaquitapaaque toncaari.

³Tecatsiyea pintsipataquea aisati tecatsi pocatsine toncaariquica. Aisati eiro catsini iquempejitacaaritsi oacaariri paashito ovisha jeri vaca.

⁴Ari imataquero Moiseshi icantaqueririri Tasorentsi, irosati icotantaja apicotate mapi, iquempetacantajiro intacarori. Oquitaiteantamanajari capichaji quitaite ari yaaquero, irosati itoncaantanaja. ⁵Irosati yaniireashitantapaajari Tasorentsi mencoriqui, itsipatacari Moiseshi icamantasanotaqueri ivajiro. ⁶Yavisantanacariri, antearojenca icantiri:

—Narotaque Tasorentsi Timitachaniri Aneashitachari, cavintsantatsiri, caari shemantacha. Oshequi catsini nonintanti; noqueariotasanti.

⁷Nocantaitatiani nonintanti, te nompashiniteji. Nocantani aisati nopeacotapinitanari antayevetarori caari cameetsatatsi jeri piatsajeitachari. Iro cantaincha eiro noneashitaritsi antayetirori caari cameetsatatsi, aitaque noasanquetaimentaqueri antajeitaquerori aisati iriori itomipee, icharinepee jeri intomintajeitajeari iriori coajicani.

⁸⁻⁹Intsipaite itiyeroanaca Moiseshi yoivotanaca quipatsiqui, ipincatsatanaqueri Tasorentsi. Icantiri:

—Notasorentsite, aviro Tasorentsisanori; queariorica picavintsaquena, nocoaque meeca quiso poajeitena. Queariotaque iquisoshirejitaque noshaninca, te inquemisantempiji. Iro cantaincha nocoaque meeca pimpeacojeitajenaro nantajeitaqueri, irointiquea paacameetsajeitajena; tempa narojeitaque pishanincepee.

Yovetsicaji aisati Tasorentsi ishanincatavacaajeitancari.

(Deut. 7.1-5)

¹⁰Icantanaqueri iriori:

“Pinquemena noncantasanotempi. Meeca nocol noncarateri maaroni ishanincajeitaniri Israel. Nomatasanotero caari ineapinijeiti pashinisatipee atiri savicajeitatsiri quipatsipeequi. Maaroni atiripee irineajeitero ora nomajeitempiri, aisati iroajeitanaquero cavaco.

¹¹“Meeca pimincarajeitero avirori nocantasanojeitaquempiri. Ariorica pimincarajeitaquero, irosati nomatacaajeitantempiri pintsoncajeitanteariri amorropee, canaaneopee, hititapee ferezeopee, heveopee jeri jebuseopee.

¹²“Queariompia picarajeitapairicari, aisati eiro paacameetsajeitiritsi, yantacaajeitimpircari caari cameetsatatsiri. ¹³Irointiquea pojoquitajeiteri itaantayetananiriri ijitasorentsinirotashiyetari, pimporoquitasanojeiteri imapinepee aisati pinchaquititajeiteri irinchatorepee inashitacaari ipincatsatashijeitari.

¹⁴“Eiro catsini pipincatsatashitaritsi ijitasorentsitashiyetari. Tempa narotaque Tasorentsi tsaneacotimpirori, apaniro pimincatsajeitena. Irotaque novajiro Tasorentsi Tsaneacotantachari.

¹⁵“Eiro catsini paacameetsajeiteri savicajeitatsiri anta quipatsiqui. Icajemimpicari ariorica ipincatsatiro ijitasorentsitashiyetari,

picarajeitiricari poajeitea itainirori ivira, ¹⁶ aisati paacairicari pitomipee irishintopee aisati yaitimpirocari pishintopee itomipee iriori. Ariorica irantajeitero caari cameetsatatsi impincatsatanteariri ijitasorensitashiyetari, aitaque irantacaajeitaqueri pitomipee inquempejeitantanaqueariri impincatsayetanaqueri iriori.

¹⁷“Eiro catsini pivetsicashiyetatsi oro jeri plata pijitasorensiyeteri.”

Inquimoshiretapinijeitanteari osarensipeequi

(Éxo. 23.14-19; aisati Deut. 16.1-17)

¹⁸ Aisati icantajiri: “Pinquimoshireventajeitero ora poapinijeitantearori tanta caari iconoyeeti tapiacaarori. Pimoncarajeitero nocantaquemperi. Oncarate 7 quitaiteri poapinijeitearo. Tempa iriotaque yoca cashiri pajitachari Abib, pishitoantajeitanajari peerani anta Egiptoqui.

¹⁹“Maaroni jivayetatsine intime itomipee pishaninca iriojeitaque nashi aisati inquempejeitea iriori irijanipee ivacate, irovishate jeri chiivo. ²⁰ Iriorica jivatatsine irijani aashino, ocameetsati impinaajeri ovishajaniqui, teerica chiivojaniqui. Eirorica ipinairitsi, ocameetsati inquentsireeri. Yora jivatatsineri intime itomipee pishanincapee, ocameetsati impinayeri ovishajaniqui. Tecatsi pocashitachane pishanincapee ariorica pinquimoshireventajeitena, ontimatiye iramajeitaquena paitapeerica.

²¹“Oncarate 6 quitaiteri pantaveejeitanteari, iro caratapaatsine 7 quitaiteri, irotaque pimaoreajeitanteari; omavetaquea omoncaratearica pantaveetanteari aisati pavijeitantearori oitsoquipee, ontimatiye pimaoreajeite.

²²“Pinquimoshireventapinitero avisayetatsiri 7 tomincopee, aisati pavijeitantarori pivanquirepee tirico intayetarori osampayeti; jero aisati pavitantarori vecarantarori osarensi.

²³“Nococaaqueri maaroni shiramparipee oncarate mava irampatotimentajeitena osarensipeequi impincatsatapinijeitenanta. Tempa narotaque Tasorensisanori, Itasorensite Israel. ²⁴ Aisati narotaque matacayerine intsoncantajeiteariri savicayetatsiri nampitsipeequi, irosati antearoitetantanaquea iipatsite. Ariorica irijatapinijeite inquimoshireventajeitero ocapee, noncanteani nojocacoventajeiteri, tecatsi aapitsatajerine.

²⁵“Poapiniteririca virantsi, eiro pitsipatairotsi iriraja tanta conoachari tapiacaarori. Aisati ariorica pinquimoshireventero quitaiteri Navisantani, eiroyea poanontavajatsi ivatsa poamanajeari.

²⁶“Ocameetsati irapinijeitenaro Pancotsiqui pampatotimentantenari intayetarori oanayeta ivanquirepee, impincatsatapinijeitenanta, tempa narotaque Tasorensisanori Pitasorensite.

“Eiro icotacotiritsi chiivojaniqui otsomija iriniro.”

**Isanquenatacotajiro Moiseshi icantacantiri
Tasorentsi aisati ishpaquireavorotaque**

²⁷Icantajiri aisati Tasorentsi Moiseshi:

“Pisanquenatero oca neantsipee; tempa irotaque otincami maaroni cantacotirori noncarajeitempi aisati iriori ishaninajeitaniri Israel.”

²⁸Ari ocarataji 40 quitaiteri aisati 40 tsiteniri itsipatacari Moiseshi Tasorentsi toncaariqui. Te iroyeaji aisati te irireji. Aitaque isanquenatajirori icantacantayetiri Tasorentsi caratatsiri 10. ²⁹Irosati yoirincantapaaja Moiseshi, yamacotajiro Icantacantiri Tasorentsi apicotatequeti mapi. Iro cantaincha te iriotacoteaji ishpaquireavorotaque. Tempa osamani ipeajanta iquenquetsatacantajariri Tasorentsi. ³⁰Ineantavajariri Aarón jeri ishanincapee ishpaquireavorotaque, itsaroacaasanojeitavacari, te inquempjeijeitavajeariji. ³¹Iro cantaincha icajemapaaqueri Aarón jeri jivatacaayetiriri ishanincapee. Ari ipocashijeitapaaqueri, irosati iquenquetsatacantacari. ³²Impoiiji iquempeijeitapaaajari iriori ishanincapee, yovaapaaqueneri maaroni icantaqueriri Tasorentsi anta toncaariqui. ³³Itsoncantanacarori iquenquetsatacaajeitiri, irosati ipashicavorotantanaca.

³⁴Ariorica iqueapiniti pancotsiqui iquenquetsatacantariri Tasorentsi, ipashireavorotanaja irosati irisoquijantanajea. Impoiiji yovaapinitiniri ishanincapee icantiriri Tasorentsi. ³⁵Yora ishanincapee ineapinijeitiro ivoro Moiseshi ishpaquireavoroti, irotaque ipashivorotantari, irosati inqueantanajea inquenquetsatacaajeri Tasorentsi.

**Quitaiteri irimaoreapinijeitanteari
(Éxo. 31.12-17)**

35 ¹Ari yapatotaqueri Moiseshi maaroni ishanincapee, icantiri: “Jeroica icantaquenari Tasorentsi pantajeiteri: ²‘Ocameetsati pantaveetapinijeite quitaiteripeequi irosati omoncaratantea 6 quitaiteripee. Iro sietetatsiri quitaiteri pimacoreajeitanteari irotaque inashitacaacari Tasorentsi pimpincatsajeitanteariri. Jaanicarica antaveetantaquearone, ocameetsati iroyeeteri. ³Jaocarica pisavicajeiteri, eiro catsini poishirotsi paamari quitaiteriqui pimaoreajeitantari.’”

**Iramayeteri irovetsicantearori Pancotsi Irinanteari Tasorentsi.
(Éxo. 25.1-9; aisati 39.32-43)**

⁴Ari yovaajiniri Moiseshi ishanincapee, icantiri:

“Jero icantaqueri Tasorentsi pantajeiteri: ⁵⁻⁶Pamayete pimpashiteariri Tasorentsi. Maaroni coasanotatsiri imperi, ocameetsati iramayete: Oro, plata, bronce, tocoyapee quitioncamaonirori, quisaamaonirori,

quitioncamaori, lino jentamaotatsiri jeri iviti chiivo. ⁷Jero imeshina ovisha ajacachari quitioncajari, meshinantsi jentameshinari, inchato acacia, ⁸quejitsi tsiotachaneri, quejitsi casancajencatatsiri irinashitacayeari aisati quejitsi intaapiniyeeteri casancajencatatsiri, ⁹mapiquipee cameetsatasanotatsiri, cornalina iroyeri efod jero pectoral irinejitacoteari yora jivatacairiri antaveetatsiri.

¹⁰“Maaroni iotasanoyetatsiri yovetsicayetiro paitapeerica, ocameetsati impocajeite irovetsicajeitero icoacaaqueeri Tasorentsi: ¹¹Ora Irinanteari Tasorentsi jero ompashicanaqueari Pancotsi ampatotimentanteariri aisati oticaashiro, oyempitayetanaqueari, otaaveratepee, antancotashiyetanaqueari, oatiashiyetanaqueari jero oncatiantayetanaqueari. ¹²Jero Cajón onanteari Icantacantiri aisati inchaquiire jero otacoro, impoiji ompashicanteari manacoteroneri ¹³Jero meesa aisati inchaquiire aisati maaroni timayetatsineri jero tanta anashitacayeariri Tasorentsi. ¹⁴Jero intimantanaqueari tsiorontsi aisati timayetatsineri jeri inaquí intimanteari quejitsi intsiotanteari. ¹⁵Jero altar intaapiniyeetantearori casancajencatatsiri aisati inchaquiire jeri quejitsi nashitachaneri isainayeeteari jero casancajencatatsiri taapinitachaneri, jero oticaashiro inqueapiniyeetantearori Irinanteari Tasorentsi. ¹⁶Jero antearo altar intaapiniyeetanteariri virantsi irovetsicashitaquero bronce, irampitataquero aisati inchaquiire atancotashiro jero maaroni timayetatsineri, aisati antearo chomo jero osavicanteari. ¹⁷Jero tocoyapee onticaashiyetanaqueari saiteriqui aisati oaticashiyetanaqueari jero ovicantayeetanaqueari impoiji oticaashiro inqueantapiniyetearori oyaaraiteritequi. ¹⁸Jero oaticashiyetanaqueari Irinanteari aisati oyaaraiteritequiniri jero iviritsatepee. ¹⁹Aisati intijayetaque quitsaarentsi irinashitacayeariri Aarón, inqueacaapiniteri Nonanteariqui irantaveeterica tsompoina jero inquitsaateari aisati itomipee irantaveejeiterica.”

Yamajeitaque ishanincapee timimoyetiriri

²⁰Ari maaroni ishanincajeitaniri Israel ijajeitaji. ²¹Icoasanojeitanaque maaroni impashijeiteari Tasorentsi timimojeitiriri. Ijajeitanaque ivancopeequi yaayetapaaquero maaroni coachari irovetsicantearori Pancotsi irampatotimentanteariri Tasorentsi aisati yaayetaque quitsaarentsipee cameetsamaotasanoyetatsiri. ²²Maaroni shiramparipee aisati tsinaneppee coasanotatsiri omperi Tasorentsi timimoyetirori, yamayetaque aparopeeni intsitacantearori paamari vetsicayetachari oro, aniiyo, arete, nenquetsiquipee jero pashinipee ioshitachari oro ocashiacaqueriri. ²³Aisati ashiyetachari tocoyapee quitioncamaonirori, quisaamaonirori, quitioncamaori, lino jentamaotatsiri, iviti chiivo, imeshina ovisha ajacachari quitioncajari jeri meshinantsi jentameshinari yamayetaque. ²⁴Irio itsipapee yamayetaque

plata jero bronce, pashini amayetainti inchato acacia. ²⁵Aisati tsinanepée iotasannotatsiri oquiricayeti, amayetaque otijayetiri quitioncamaonirori, quisaamaonirori, quitioncamaori jero lino jentamaotatsiri. ²⁶Jero aisati iotasanoyetatsiri oquiricayetiri iviti chiivo, otijacoyetaqueri. ²⁷Aisati jivatacantayetatsiri yamayetaque mapiquípee cameetsatasannotatsiri cornalina aisati pashinípee irinejitacoteari jivatacáiriri antaveeyetatsine Ivancoqui Tasorentsi. ²⁸Yamajeitaque aisati casancajencayetatsiri, quejitsi tsiotachaneri, isainayeetari jeri intapiniyeeteri casancajencatatsiri.

²⁹Aitaque icantacari maaroni shiramparípee jero tsinanepée yamajeitaque ipashitacariri Tasorentsi irovetsicantearori icantaqueriri Moiseshi.

Icoyetaqueri Tasorentsi Besalel vetsicayeteroneri Irinanteari
(Éxo. 31.1-11)

³⁰Ari icantiri Moiseshi ishanincepee: “Pinquemajeite, yora Tasorentsi icyoyetaqueri Besalel itomi Urí, icharine Hur ishanincepeeni Judá, vetsicayeterone paitapeerica ashi Pancotsi Irinanteari. ³¹⁻³²Iriotaque otimantashireacari Ishire iotacaasanotaqueri irovetsicantayetearori paitapeerica oro, plata jero cobre. ³³Aisati irovetsicantayetearori mapípee cameetsatasanoyetatsiri iroanqueyeteri aisati irovetsicantayetearori inchato. Aisati iroameetsatantayetearori paitapeerica irantayeteri. ³⁴Iotacaasanotaqueri Tasorentsi Besalel jeri Aholiab, itomini Ahisamac, ishanincepeeni Dan, iroametanteariri itsipapee. ³⁵Iriotaque iotacaasanotaqueri Tasorentsi irovetsicantayetearori paitapeerica: irisheroncantayetearori inchato, irimoncaratantayetearori aisati irishiacantayeteri paitapeerica, aisati irantsitantayeteoro quitioncatsanirori, quisaatsanirori jero quitioncatsari aisati intijantayetearori lino jentamaotasannotatsiri. Paitapeerica irantayeteri.

36 ¹“Aitaque icanteari Besalel jeri Aholiab aisati maaroni iotacaqueri Tasorentsi, irovetsicantayetearori cameetsa paitapeerica coachari irantaveeyetanteari Irinanteariqui Tasorentsi.”

Yamajeitaque ishanincepee maaroni timimoyetiriri

²Ari icajemaqueri Moiseshi Besalel jeri Aholiab aisati maaroni iotacaqueri Tasorentsi vetsicayeteroneri paitapeerica, coashitasanotachari iramitacojeiteri. ³Ari yaajeitaquero ipaqueriri Moiseshi maaroni yamayetaqueri ishanincepee, irintantearori irantero coasanotachari irantaveeyetanteari Irinanteariqui Tasorentsi.

Icantani ishanincepee yamapinijeiti maaroni quitaiterípeequi ipashijeitacariri Tasorentsi. ⁴⁻⁵Yora vetsicajeitirori yoipacanaquero yantaveere, ijatashitaqueri Moiseshi icantapaaqueri: “Shequiapaaque oni, yamapinijeitaqueri ashanincepee moncarataca ontsocanteari icantaqueri Tasorentsi.”

⁶Ari icantacantajiro Moisheshi eiro yamajeitantajatsi aisati. Irosati te iramajeitajeji ishanincepee. ⁷Tempa shequiapaaque oni ovetsicanteari, ari ontimaarantapaaque.

Yovetsicantacarori ovancoteari Irinanteari Tasorensi
(*Éxo. 26.1-37*)

⁸Yora iotasanoyetatsiri ari yovetsicashitaquero Irinanteari Tasorensi. Yovetsicaque 10 ompashicanaqueari quiricachari lino, quitioncamaonirori, quisaamaonirori, quitioncamaori isataacotantacariri apite ishiacantiri inampire Tasorensi. ⁹Aparopeeni imoncarayetaquero ocarayetaque 12 metro otsantsataque ari nianqui. Iro 2 metro oquimotsarancataque aisati oquempyetaca maaroni. ¹⁰Ora caratatsiri 5 ompashicanaqueari yoaviyetaquero pashinipee aisati iquempetaquero pashini caratatsiri 5. ¹¹Impoiji iyempitayatayetacaro quitioncatsanirori ocaramaotapaaque intacari. Aisati ocaramaotapaaque pashini. ¹²Ora intacari iyempitayetaquero ocarataque 50 aisati iquempetaquero otsipa aparopeeni ontsitacavacanteari. ¹³Aisati yovetsicaque 50 oro tapoitachari, iracotantayetearori otsipa tocoyapee, ompashicantanaqueari maaroni Irinanteari.

¹⁴Yora Besalel itijacotaque aisati ivitipee chiivo ocarataque 11 iroicoterori jenioquiji. ¹⁵Aparopeeni imoncarayetaquero ocarayetaque 13 metro otsantsataque ari nianqui. Iro 2 metro oquimotsarancataque aisati oquempyetaca maaroni. ¹⁶Ora caratatsiri 5 itsipatayetaquero yorimpitaquero, iro otsipa caratatsiri 6 inashitacaacaro yorimpitaquero. ¹⁷Impoiji yovetsicaque 50 iyempitayetaquerori ocaramaotapaaque intacari, aisati 50 iyempitayetaquerori ocaramaotapaaque otsipa. ¹⁸Aisati yovetsicaque 50 bronce tapoitachari iracotantayetearori otsipa tocoyapee ompashicantanaqueari maaroni Pancotsi.

¹⁹Aisati yovetsicaque imeshinapee ovisha, yajacantayetacaro quitioncajari. Impoiji yovetsicaque jentameshinatatsiri meshinantsipee, iroyeri iroicoterori jenoqui. ²⁰Aisati yovetsicaque taaverapee inchato acacia itampaticayetaquero cameetsa. ²¹Aparopeeni imoncarayetaquero 4 metro otsantsayetaque ari nianqui, iro 65 centímetro oquimotaroquitaque. ²²Aisati iquichatencayetaquero apite ontsitacavacantayeteari aisati iquempetaquero maaroni. ²³⁻²⁴Ocarataque 20 taaverapee iroyeri acaqueroca quirincaniri. Aisati yoayetaquenero 40 plata yovetsicaqueri oatiantanaqueari ishaaviji. Aparopeeni taavera otimayetaque apitepee ishaaviji oatiantanaqueari. ²⁵⁻²⁶Aisati acaqueroca catonconiri yovetsicaque 20 taaverapee jero 40 plata oatiantayetanaqueari. Aisati otimayetaque apitepee ishaaviji oatiantanaqueari aparopeeni taavera. ²⁷⁻²⁸Aisati acaqueroca pashini iqueapiniti catsirincaiteri yovetsicaque 6 taaverapee. Impoiji yovetsicaji apite iroyeri osorinaquiqui. ²⁹Ora taaverapee ontsipatavacaayetaquea ishaaviji aisati jenoqui intsipataacotantaquearo tapoitachari. Aisati

iquempetaquero apitetatsiri iroyeri osorinaquiqui. ³⁰Ari ocarataque 8 taaverapee jero plata oatiantayetanaqueari ocarataque 16. Aparopeequi taavera otimayetaque ishaaviji apite oatiantayetanaqueari. ³¹⁻³²Aisati yovetsicaque inchato acacia antancotashiyeteari taaverapee ocarataque 5 ashi acaqueroca aisati 5 ashi araquerora impoiji 5 ashi iqueapiniti catsirincaiteri. ³³Ora antancotashiteari onquenanaquero nianqui taaveraqui, irosati acaqueroca otsipa. ³⁴Impoiji yovichaacotaquero oro taaverapeequi. Irisati iyempitayetaquerori iroiminqueantearori atancotashiropee yovichaacotaqueri.

³⁵Aisati yovetsicaque oticaashiro quitioncamaonirori, quisaamaonirori, quitioncamaori jero lino tijacotachari. Yovetsicacotaqueri ishiacantaqueri apite inampire Tasorentsi. ³⁶Impoiji yoayetaque 4 tapoitachari oro intsatantayetearori oticaashiro, aisati 4 otincamipee inchato acacia yapinaicantacaro oro, aisati 4 plata oatiantayetanaqueari.

³⁷Aisati yovetsicaque inqueantapinitearori Pancotsiqui oticaashiro: quitioncamaonirori, quisaamaonirori, quitioncamaori lino quiricatsatachari yoameetsayetaquero. ³⁸Aisati yovetsicaque 5 otincamipee yapinaicantacaro oro, iro 5 bronce oatiantayetanaqueari. Jero tapoitachari ontsatsatantayetanaqueari oticaashiropee.

Yovetsicaquero Cajón onanteari Icantacantiri Tasorentsi
(Éxo. 25.10-22)

37 ¹Ari yovetsicaquero aisati Besalel Cajón, yaaque inchato acacia, ocarataque aparoni metro avishimaataque 10 centímetro otsantsataque. Iro 65 centímetro oquimotaroquitaque aisati 65 centímetro ojenoquitaque. ²Ipatacacotaquero oro ioshitaca maaroni tsoompoinaqui jero acaquerocapeequi. Irisati ishoncaqueri yoashinampitantacarori onampinapeequi. ³Yovetsicaque aisati 4 oyempita oro iroyeteri oitipeequi. ⁴⁻⁵Impoiji yovetsicashitaquero inchato acacia yoameetsaquiitaquero yapinaicantacaro oro, yoimínqueaquero oyempitapeequi inquijacotantearori.

⁶Aisati yovetsicaque otatacoro ioshitaca oro, ocarataque aparoni metro avishimaataque 10 centímetro otsantsataque. Iro 65 centímetro oquimotaroquitaque. ⁷Aisati yovetsicaque oro apite ishiacantaquero inampire Tasorentsi yoameetsatantacari martiyo, irisati vichaacotanaincha otataroqui. ⁸Itimaque aparoni otsapiqui aisati pashini otsapiqui. ⁹Cameetsa imontetavacaaca aisati ishivanquitavacaaca, yamenaquero otataro Cajón yojocaaquero.

Yovetsicaquero meesa oantapinitanteari tanta
(Éxo. 25.23-30)

¹⁰Ari yovetsicaquero aisati meesa, yaaque inchato acacia, ocarataque 90 centímetro otsantsataque. Iro 45 centímetro oquimotaroquitaque aisati 65 centímetro ojenoquitaque. ¹¹Impoiji ipatacacotaquero oro ioshitaca maaroni, irisati ishoncaqueri yoashinampitantacarori onampinapeequi.

¹²Aisati yovetsicaque iticaacotaquerori onampinapeequi ocarataroquitaque 7 centímetro, yoashinampitaquero oro ishoncaquero. ¹³⁻¹⁴Yovetsicaque aisati 4 oyempita oro yoayetaquero osorinapeequi oitipeequiniri, otsipatacaro iticaaquerori. Irotaque isaquiintantacarori inchaquii inquijacotentearori.

¹⁵Iro inchato acacia yovetsicaqueri yapinaicantacaroro oro. ¹⁶Aisati yovetsicayetaque timayetatsineri meesaqui; peraatopee, cocharonepee, jaarapee jero iramentopee ioshitaca maaroni oro.

Yovetsicaquero oro tsiorontsinaqui

(Éxo. 25.31-40)

¹⁷Aisati yovetsicaque Besalel tsiorontsinaqui ioshitaca oro yoameetsatantacari martiyo: incatianteari, itincamiro, ishenoquipee, ishintaquipee jero itsotaneyetaqueri apanaqui inanaque. ¹⁸Otimayetaque ijempequipee acaqueroapeequi ocarataque 6, otimaque 3 acaqueroa aisati 3 araquerora. ¹⁹Ora ijempequipee caratatsiri 6 otimayetaque 3 ishenoquipee jero ishintaquipee quempetarori oteaqui almendro aisati itsotaneyetaqueri. ²⁰Aisati itincamiro otimaque 4 oshenoquipee jero ishintaquipee quempetarori oteaqui almendro aisati itsotaneyetaqueri. ²¹Aparopeeni ijempequipee carayetatsiri 3 otimayetaque aparopeeni itsotaneyetaqueri oshaaviji. ²²Ora itsotaneyetaqueri jero ijempequipee apanaqui inanaque tsiorontsinaqui ioshitaca maaroni oro yoameetsatantacari martiyo. ²³Aisati yovetsicaque 7 tsiementotsipee, tenasapee jero platiyopee ioshitaca oro. ²⁴Yovetsicantacariri maaroni tsiorontsi icarataque 33 kilo ioshitaca oro.

Yovetsicaquero altar intaantearori casancajencatatsiri

(Éxo. 30.1-5)

²⁵Aisati yovetsicaque altar intaantearori casancajencatatsiri. Irosati yaaque inchato acacia ocarataque 45 centímetro otsantsataque aisati 45 centímetro oquimotaroquitaque. Impoiji 90 centímetro ojenoquitaque. Ora oshevatapee otimayetaque osorinapeequi irosati otimantayetanaca. ²⁶Impoiji ipatacotaquero oro ioshitaca maaroni acaqueroapeequi, oshevatapeequi aisati yoashinampitantacaroro onampinapeequi. ²⁷Aisati yoayetaque oro iyempitayetaquerori ishaaviji yoashinampitaquerori, ocarati apite ashi acaqueroa osorinaqui aisati apite ashi araquerora, irisaquiintantearori inchaquii iranatacotantearori. ²⁸Ora inchaquiire iranatacotantearori iro yovetsicaqueri inchato acacia yapinaicantacaroro oro.

Yovetsicaqueri quejitsi inashitacaacari isainayeetari aisati intaapiniyeteri

(Éxo. 30.22-38)

²⁹Aisati yovetsicaque Besalel quejitsi cameetsatasanotatsiri, inashitacaari isainayeetari aisati intaapiniteri casancajencatatsiri ioshitachari, iquempetacari vetsicayetiriri casancajayetatsiri.

Yovetsicaquero altar bronce

(Éxo. 27.1-8)

38 ¹Ari yovetsicaque altar intaantapiniteariri virantsipee. Irosati yaaque inchato acacia, ocarataque 2 metro avishimaataque 25 centímetro aisati oquempyetaca acaquerocapeequi. Impoiji aparoni metro ojenoquitaque avishimaataque 25 centímetro. ²Aisati yovetsicaquero 4 oshevataquipee osorinapeequi, irosati atsicacotanaintsi aisati ipatacotaquero maaroni bronce. ³Ari yovetsicaque aisati timayetatsineri altariqui: irojocavanetantearori samampo, paarapee, tasopee, teneroripee jero tenazapee ioshitaca bronce. ⁴Aisati yampitataquero bronce iticaaquerori ishaaviji nianquinaqui altar. ⁵Aisati 4 iyempitayetaquero osorinapeequi ovecaratapaaca ampitarentsi irisaquiintantearori inchaquii iranatacotantearori. ⁶⁻⁷Iro yovetsicaquero inchato acacia iranatacotantearori altar, yapinaicantacaro bronce. Ora altar yovetsicaquero taavera ocaaranaquitaque.

Yovetsicaquero chomo bronce

(Éxo. 30.18)

⁸Aisati yovetsicaquero Besalel chomo, Iro yaaquero amenaarontsipee yovetsiqueetiri bronce ashi tsinanepée antaveetatsiri iqueantapiniyeetaroriqui Pancotsi irampatotimentanteariri Tasorentsi. Irosati yaaque osavicantanacari.

Yovetsicaquero oyaaraiterite Pancotsi

irampatotimentanteariri Tasorentsi

(Éxo. 27.9-19)

⁹Ari yovetsicaque aisati onticaashiyeteari oyaaraiteritequi. Timatsineri acaqueroca iracosanoriqui, ocarataque 45 metro otsantsataque onticaashiteari tijachari lino. ¹⁰Ocarataque iroori 20 ontincamiyetanaqueari aisati 20 bronce oncatiantayetanaqueari, iro plata iyempitayetaquerori aisati iracotantayetearori. ¹¹Jero timatsineri acaqueroca irampatequi ocarataque 45 metro otsantsataque onticaashiteari. Ocarataque iroori 20 ontincamiyetanaqueari aisati 20 bronce oncatiantayetanaqueari, iro plata iyempitayetaquerori aisati iracotantayetearori. ¹²Aisati timatsineri acaqueroca iqueapiniti catsirincaiteri, ocarataque onticaashitanaqueari 22 metro ari nianqui. Ocarataque iroori 10 ontincamiyetanaqueari aisati 10 oncatiantayetanaqueari. Iro plata iyempitayetaquerori aisati iracotantayetearori. ¹³Jero timatsineri acaqueroca iquenapai catsirincaiteri ocarataque onticaashitanaqueari 22 metro ari nianqui. ¹⁴⁻¹⁵Ocarataque acaquerocapeequi 7 metro onticaashitanaqueari inqueapiniyeetantearoriqui. Ocarati mava ontincamiyetanaqueari aisati mava oncatiantayetanaqueari. ¹⁶Maaroni oticaashiropee shonquearoneri oyaaraiterite ioshitaca lino

tijachari. ¹⁷Ora oncatiantayetanaqueari ontincamiyeteari irointi bronze. Iro plata iyempitayetaquerori jero iraacotantayetearori, irosati plata yapinaicantayetacarori oatiitoyetapaaca ontincamiyetanaqueari oyaaraiterite. Maaroni ontincamiyetanaqueari yoayetaquenero tapoiyetachari plata.

¹⁸Ora onticaashiyetanaqueari inqueantapiniyetearoriqui oyaaraiterite, antsitacoyetaca quitioncatsanirori, quisaatsanirori, quitioncatsari quiricatsatachari lino. Ocarataque 9 metro otsantsataque, iro 2 metro ojoenquitaque avishimaataque 25 centímetro aisati oquempetacarori oticaashiro oyaaraiterite. ¹⁹Otimayetaque 4 ontincamiyetanaqueari aisati 4 bronze oncatiantayetanaqueari. Iro plata iyempitayetaquerori jero iraacotantayetearori, irosati plata yapinaicantayetacarori oatiitoyetapaaca ontincamiyetanaqueari. ²⁰Maaroni oaticashiyetanaqueari Irinanteari Tasorentsi aisati oyaraiterite shonquearoneri, ioshitaca bronze.

Ashiroyetatsiri yovetsicantacarori Inantari Tasorentsi

²¹Ari icantaqueri Moisesi, yora ishanincapeeni Leví, irimoncaratero maaroni ashiroyetatsiri yovetsicantacarori Pancotsi otimacotantari Icantacantiri Tasorentsi. Irio jivatacantirori Itamar, itomi Aarón, antaveitiniriri Tasorentsi.

²²Yora Besalel itomi Urí, icharine Hur ishanincapeeni Judá, imataquero maaroni icantaqueriri Tasorentsi Moisesi iranteri. ²³Irio Aholiab itomi Ahisamac, ishanincapeeni Dan, amitacotaqueriri, iotasanoti yovetsicayetiro ashiroyetatsiri, itijayeti aisati yoavimaoyetiro quitioncamaonirori, quisaamaonirori, quitioncamaori jero lino jentamaotasanotatsiri.

²⁴Icarataque yapatoanaca oro yovetsicayetaqueri 965 kilo yavishimaataque 30 gramo moncaratainchari moncaramentotsiqui. Iriotaque yamayetaqueneriri Tasorentsi irovetsicantearori Irinanteari.

²⁵Yora plata yaayetaqueri isanquenatacojeitantariri ishanincapee icarataque 3,319 kilo yavishimaataque 25 gramo imoncarataqueri moncaramentotsiqui timatsineri Irinanteariqui. ²⁶Maaroni sanquenatacojeitainchari moncarayetaquerori 20 irosarentsite icarajeitaque 603,550 shiramparípee. Aparopeeni yamayetaque 5 gramo plata ari nianqui moncaratainchari moncaramentotsiqui timatsineri Irinanteariqui. ²⁷Aisati icarataque plata 3,300 kilo yovetsicayetaqueri oncatiantayetanaqueari otincamiaropee Irinanteari Tasorentsi aisati ashi oticaashiro. Maaroni plata irotaque yovetsicaqueri 100 oncatiantayetanaqueari, icarataque aparopeeni plata 33 kilo yovetsicayetaqueri. ²⁸Yora plata timaarentapaintsiri, irotaque yovetsicayetaqueri iyempitayetaquerori aisati iraacotantayetearori otincamiaropee jero ompashicantanaqueari jenoqui.

²⁹Ocarataque iroori bronze yamayetaqueri 2,336 kilo avishimaataque 400 gramo, ³⁰irotaque yovetsicayetaqueri oncatiantayetanaqueari ashitacoro Pancotsi irimpatotimentantariri Tasorentsi aisati altar

jero ampitatashiro aisati maaroni timayetatsineri. ³¹ Aisati maaroni oncatiantayetanaqueari jero oaticashiyetanaqueari shonquearoneri oyaaraiterite Irinanteari aisati oncatiantayetanaqueari ashitacoro oyaara iterite.

Yovetsicaquero iitsaarepee antaveeyetatsine Inantariqui Tasorentsi
(Éxo. 28.1-43)

39 ¹ Ari yovetsicayetaqueneri iitsaarepee yora antaveeyetatsineri Irinanteariqui Tasorentsi. Iro yovetsicayetaqueri quitioncatsanirori, quisaatsanirori jero quitioncatsari. Aisati inashitacaacanari iriori Aarón inquitsaateari, imoncarataquero icantaqueriri Tasorentsi Moiseshi.

² Irovetsicantearori efod, irio yaaquero oro aisati itijaque quitioncatsanirori, quisaatsanirori, quitioncatsari jero lino quiricatsatachari. ³ Ipichaataroquitaquero oro martiyoqui, itotsayetaquero ipeanaca iirotsa. Irotaque inconoyerori intijacoyetantearori quitioncatsanirori, quisaatsanirori, quitioncatsari, jero quiricachari lino. ⁴⁻⁵ Irosati yovetsicantacanari apite irishiticacotantearori efod ishempaqui. Aisati iquempetaquero irishiticacoteari itsaqui. Imoncarataquero icantaqueriri Tasorentsi Moiseshi.

⁶ Aisati yovicaquero apite mapiqui cornalina ivintonaquei oro, osanquenataca ivajiropée itomipeeni Israel. ⁷ Impoiji yora Besalel yoayetaquero oshiticacoroqui efod ishempaquiniri, irotaque inquenqueshireacotanteariri Tasorentsi ishanincapeeni Israel. Imoncarataquero icantaqueriri Tasorentsi Moiseshi.

⁸ Aisati yovetsicaque pectoral iquempetacantaquero efod. Irisati yaaque marereatsari oro, quitioncatsanirori, quisaatsanirori, quitioncatsari itijacotaquero linoqui. ⁹ Ocaratsarancajaniquitaque aisati otontamaojaniquitaque ocarataque 22 centímetro omoncaratavacaaca acaquerocapeequi. ¹⁰ Ocarataque 4 oveshintaayetaca mapijaniquipee cameetsatanoyetatsiri onashiyetaca. Ora intacarori oveshintaaca otimayetaque: rubí, crisólito jero esmeralda. ¹¹ Iro apitetapaintsiri: granate, zafiro jero jade. ¹² Jero mavatapaintsiri: jacinto, ágata jero amatista. ¹³ Iro vecarantacarori: topacio, cornalina jero jaspe. Yoayetaquero maaroni ivintonapeequi oro. ¹⁴ Ocarataque 12, tempa icarajeiti 12 ivajiropée itomipeeni Israel osanquenayetaca.

¹⁵ Aisati yampitsataque oro oshiticacoteari pectoral. ¹⁶ Aisati ivintonataque apite oro aisati apite iyempitataque yoayetaquero ocaratsarancajaniquiyetapaaque pectoral jenioquiji. ¹⁷ Yora orotsa apitetatsiri yoiminqueaquero oyempitapeequi. ¹⁸ Aisati yoveraatsatapaaca yoayetaquero apite vintonatachari oro yaacotantacarori oshiticacoroqui efod oquisotantacari. ¹⁹ Aisati iquempetaquero ishaaviji iyempitataquero apite ocaratsarancajaniquiyetapaaque itsipataacotantacarori efod. ²⁰ Aisati yovetsicavaji apite oro iyempitayetaquerori oshiticacoroqui efod ari jenioquiji.

²¹ Impojji itsipataaquero oyempitayetacari pectoral aisati oyempitayetacari efod, ishiticacotantacaro iviritsa quitioncatsanirori otimantanacari jenioquiji pectoral. Imoncarataquero icantaqueriri Tasorensi Moiseshi.

²² Maaroni ocaramaoti efod ioshitaca itijeetaquero quitioncamaonirori.

²³ Ora imorotaquerori nianqui inquitsaatantearori, yapinaicaquero itsanoquiniri eiro otsereantatsi. ²⁴ Aisati yoameetsayetaquero overaamaotapaaca iroicoro yapitivimoncoinjaniquiyetaquero lino quiricatsatachari quitioncatsanirori, quisaatsanirori jero quitioncatsari. ²⁵⁻²⁶ Aisati itsayetaque campanajaniquipee ioshitaca oro, iconoayetaquero quempetarori chochoqui granada moncoinjaniquiyetatsiri, ishoncaquero maaroni overaamaotapaaca. Irotaque inquitsaatapiniteari irantaveeterica Pancotsiqui. Imoncarataquero icantaqueriri Tasorensi Moiseshi.

²⁷⁻²⁸ Aisati yaaque lino yovetsicaque cameetsamaotatsiri iitsaare Aarón aisati itomipee. Irosati yovetsicaque turbante, irisavoinateari jero itorosatepee ioshitaca lino. ²⁹ Iro lino quiricatsatachari irishiticacoteari itsaqui qui oconoayeta quitioncatsanirori, quisaatsanirori jero quitioncatsari yoameetsayetaquero overaamaotapaaca. Imoncarataquero icantaqueriri Tasorensi Moiseshi.

³⁰ Aisati yovetsicaque oro icarataroquitaque nashitacaacariri irantaveetanteari, aitaque isanquenataquerori cantatsiri “Inashitacaacari Tasorensi.” ³¹ Impojji yoaqueneri quitioncatsanirori irishiticacotantearori ivancainaqu i savoinaroqui. Imoncarataquero icantaqueriri Tasorensi Moiseshi.

**Itsoncaquero maaroni irovetsicantearori Pancotsi
irampatotimentanteariri Tasorensi
(Éxo. 35.10-19)**

³² Ari itsoncaquero maaroni ovetsicantanaqueari Irinanteari Tasorensi ora Pancotsi irampatotimentanteariri. Yora ishanincajeitaniri Israel imataquero maaroni icantaqueriri Tasorensi Moiseshi.

³³ Impojji ipajeitaquero Moiseshi maaroni yovetsicaquero aisati maaroni timayetatsineri: iraacotantayetearori, taaverapee, antancotashiyetanaqueari, otincamipee aisati oncatiantayetanaqueari.

³⁴ Jero ompashicantanaqueari vetsiqueetiri imeshina ovisha yajaqueetiri quitioncajari jeri meshinantsi jentameshinatatsiri oicotanaqueari aisati ompashicanteari Cajón. ³⁵ Jero Cajón onantari Icantacantiri Tasorensi, inchaquiirepee aisati otatacoro. ³⁶ Jero meesa aisati maaroni timayetatsineri, jero tanta irinashitacayeariri Tasorensi.

³⁷ Jero tsiorontsinaqui ioshitachari oro aisati intsiotantayetanaqueari aisati maaroni timayetatsineri jeri quejitsi tsiotachaneri. ³⁸ Jero altar patacacotachari oro, quejitsi irinashitacayeari jeri intayeri casancajencatatsiri intaapiniteri. Jero oticaashiro inqueapiniyeetantearori Pancotsi irampatotimentanteariri Tasorensi. ³⁹ Jero altar patacacotachari bronze aisati ampitashiro jero inchaquiire aisati maaroni

timayetatsineri. Jero chomo aisati osavicanteari. ⁴⁰Jero oticaashiropee oyaaraiterite, otincamiqiiropee aisati oncatiantayetanaqueari jero oticaashiro ashi inqueapinitantearori oyaaraiterite jero oviritsatepee aisati oaticashiropee oyaaraiterite. Jero maaroni timayetatsineri irantaveetanteanariri Tasorentsi. ⁴¹Jero quitsaarentsi inashitacaacanariri Aarón, irantaveetacayeri Irinanteariqui, jero inquitsaateari aisati itomipee.

⁴²Imataquero ishanincajeitaniri Israel maaroni icantaqueriri Tasorentsi Moiseshi. ⁴³Ineantacarori Moiseshi yovetsicayetaqueri, icantaqueri: “Ocameetsatasanotaque maaroni pivetsicajeitaqueri.”

Inashitacaacanari Tasorentsi Pancotsi yapatotimentantariri

40 ¹⁻²Ari iquemajiri Moiseshi Tasorentsi icantiri: “Ariorica intanajeero quitaiteri yora shoncapaajantsine cashiri Abib, irosati poatiacantantaquearo Nonanteari aisati Pancotsi pampatotimentantenari. ³Aitaque poacanterori tsonpoina Cajón onantari Nocantacantiri, aisati pimpashicacotaquero. ⁴Impoiji poiminqueacantero iroori meesa jeri tsiorontsi. Cameetsa poacantayetaquero. Impoiji povicacantayeteri intsiotantanaqueari. ⁵Aisati pominueacantero iroori orijaniqui altar pintaapinitantenarori casancavaneyetatsiri aisati pimontetacantaquero Cajón. Impoiji pishintsaacantero onticaashitanaqueari anta pinqueantapinitearoriqui. ⁶Iroquea antearo altar, poacantero anta pinqueantapinitearoriqui Nonanteari. ⁷Impoiji poacantero iroori chomo ontsipatimataquearo altar, irosati pijaacantantaquea nija. ⁸Aisati poatiacantayetaquero otincamijaniquipee, pishoncacantaquero maaroni oyaaraiteritequi. Pisaatencatacantaquero nianqui pinqueantapiniteari, impoiji pinticaashitacantaquero.

⁹“Irosati paantaquea quejitsi, pinashitacaari pisaitantayetaquearori Nonanteari jero maaroni timayetatsineri. Aitaque pincantaquerori. Pinashitacaasanotenaro oncameetsatasanotanaque maaroni. ¹⁰Aisati pinquempetaquero antearo altar jero maaroni timayetatsineri. Aitaque pincantaquerori, tempa irotaque oncameetsatasanotanaque catsini. ¹¹Aisati pisaitaquero iroori chomo jero osavicantanaqueari. Aitaque pincantaquerori, irotaque pinashitacaasanotenari.

¹²“Ariorica pintsoncacantayetaquero poacantayetero, irosati paantanaqueari pirenti jeri itomipee, poatiapeeri quempeji pinqueantapinitearoriqui Pancotsi pampatotimentantenari, pincanteri incaajeite. ¹³Impoiji pinquitsaateri pitijacantaqueneriri lino cameetsamaotasantatsiri. Irosati pisainatantanaqueari quejitsi, pinashitacanteariri impeanteari antaveetatsineri Nonanteariqui. ¹⁴⁻¹⁵Aisati pinquempetaqueri iriori itomipee, pinquitsaajeitaqueri impoiji pisainajeiteri. Piquempetaqueri Aarón irotaque impeajeitanteari iriori

antaveejaitatsineri. Aitaque inquempejitejae iriori irishanincajeitajeari coajicani incantaitiyempani.”

Yoatiacantaquero Moiseshi Inantari Tasorentsi

¹⁶⁻¹⁷Ari ishoncapaaja cashiri, aparotanaji quitaiteri, intantanajearori osarentsi apitetatsineri, omoncaratapaaja ishitoantajeitanajari Egiptoqui. Irosati yoatiacantantacarero Moiseshi Irinanteari Tasorentsi. Imoncarataquero icantaqueriri. ¹⁸⁻¹⁹Intacantacarero oncatiantanaqueari taaverapee jero otincamipee. Impoiji yoanquetacantayetaquero atancotashiyetanacari otanto, irosati ipashicantantacarero, aisati yoicotacantaquero. Imoncarataquero icantaqueriri Tasorentsi.

²⁰⁻²¹Impoiji yaacotaquero Icantacantiri Tasorentsi, itetaquero Cajóqui, ari yashitacotaquero; irosati isaquiintacantantacarero inchaquiiqui oyempitapeequi. Irosati yaacotantanacarero yoiminueacotaquero tsompoina Irinanteariqui. Impoiji ipaencaquero oticaashiro, aisati ipashicaquero Cajón. Imoncarataquero icantaqueriri Tasorentsi.

²²Aisati yoiminueacantaquero iroori meesa, yoacantaquero araquerora oticaashiroqui. ²³Impoiji yoveshintsaacantaquero tantapee inashitacaanariri Tasorentsi.

²⁴⁻²⁵Aisati yoiminueacotacantaqueri tsiorontsi, yoayetavaqueneri maaroni yovetsicashiyetaqueriri imontetacaqueri meesa, irosati itsiotantacari.

²⁶⁻²⁷Aisati iquempetacantaquero orijaniqui altar, iquempejitaquero oticaashiro, irosati itaantaca casancavaneri.

²⁸⁻²⁹Impoiji ishintsaacantaquero oticaashitanacari inqueapinitenta. Irosati yoiminueacotacantantacarero iroori antearo altar intayetanteanariri Tasorentsi virantsipee jero ivanquirepee.

³⁰Aisati yoaquero antearo chomo, jero altar otsipataimaatacarero Pancotsi irampatotimentanteariri, impoiji ijaacantaque nija inquivapinijeitari. ³¹Irotaque yaajatapinitiri Moiseshi jeri Aarón aisati itomipee, iquivacotapinijeitari aisati iquivaquiitapinijeitari. ³²Ariorica iqueapinijeiti Pancotsiqui, aisati ariorica iquempejitapinitaro antearo altar, iquivapinijeita. Imoncarataquero icantaqueriri Tasorentsi Moiseshi.

³³Iro yovecarantacarori yovetsicacantaquero oyaaraiterite, ishoncacantaquero maaroni Pancotsi yapatotimentanteariri Tasorentsi. Aisati yominqueacantaquero antearo altar, aisati yoanquetacantaquero oticaashiropee iqueantapintaroriqui oyaaraiteri.

Aniireapaaque mencori omanapaaquero Pancotsi yapatotimentantariri (Núm. 9.15-23)

³⁴Itsoncacantantacarori Moiseshi yovetsicacantaquero Pancotsi irampatotimentanteariri Tasorentsi, irosati osaviincantapaaca mencori omanapaaquero, aisati ishiquaireacotapaquero Tasorentsi

catsini Inantari. ³⁵Irotaque caari imatanta Moiseshi inqueero; tempa otimantapaacaro itasorenca Tasorentsi.

³⁶Yora ishanincapee Israel, ariorica ineiro oancapinita mencori, irosati irovajeitantanajea. ³⁷Eirorica oancatsi, irosati incantea irisavicajeite iroyeavajerota oancanajea. ³⁸Aitaque ocantari, yaniijeitantapaacari ishanincajeitaniri Israel osamani, ineapinijeitaquero ora imencorite Tasorentsi otimapaaque Inantariqui maaroni quitaiteripeequi, aisati tsiteniripeequi oquempetacaro paamari oquitasantetacotapinitaquero.